


文恭集

春卿遺藁





97.451  
5359  
=14

14

0 1 2 3 4 5 6 7 8 9 10 11 12 13 14 15 16 17 18

Inches  
Centimetres  
1 2 3 4 5 6 7 8 9 10 11 12 13 14 15 16 17 18 19  
TIFFEN Color Control Patches  
© The Tiffen Company, 2007




文恭集卷三十一

書啓

上江州張殿丞

伏自署吏南淮整裝東路背浮雲之高關過修竹之舊園適逢王  
 國之才得請天臺之告上廬齋刺竊沿雅故之情密坐邀談猥厚  
 將迎之禮言樞煥發心府洞開教督諄諄迴曝秋陽之氣燕胥侃  
 侃僅侵夜鼓之聲迫中路之思歸歎征車之莫駐一別如雨恨身  
 迹之靡停千里背淮幾營魂之獨逝來還堵室伺守交官芳桂攀  
 援山中之思無賴春梅折贈隴頭之訊益稀允懷穆若之姿屢下  
 赧然之汗自當末局日力迷書司民之版掌寔繁將何批卻舊尹  
 之政經尚在得以伐柯惟宇摩之恢疏深仕塗之棲倚曠伸懿仰  
 併積瞻翹諒恬育于貞襟固動臻于吉履伏惟殿丞性資上哲名  
 俊中州仕版聯華蚤協南魚之詠禁門引籍聿參翔鳳之朝端勝  
 範以照人服清猷而高世斯言無玷本願行以相先所至有聲益



試功之惟允迺者秦川將命漢傳鞫辭財利是寬出仁心之恤隱  
訟喧既解亦朝論之歸高屬求刺部之賢適下舉知之詔需頭薦  
削交集于公車方底恩章首頒于東省矧溢城之名壤壓江紀之  
上游自守東平之麾已報營邱之政追車降命將聞二節之來煩  
幄承光行輟一臺之妙某楊疏無狀庇賴有年奉言侍以末階幸  
葆綬而適願

上蔡龍圖

再調銓符遠縻吏綬山城僻左塌居淮服之旁人迹闕疏鮮去日  
圍之下跂旌塵而殊邈撫鍾律以屢遷流水託音久莫馳于尺記  
高山仰德未始忘于寸心內惟筮仕之年早詣序賓之館三握髮  
而迎士適振緒風一引席以與言猥參末論仰荷深中之量曲垂  
嚮下之風旋收跡于門庭率抗容于塵土日月云邁歲星將近于  
一終節物再更春目屢傷于千里逃瞻姿度遐鬱心魂仰惟駸駸  
之賢適處保釐之任鎮雌堂而克靜保虹氣以彌充伏惟龍圖學

士德本上成仁爲己任元陽高識出眾議以居多次道宏才結萬  
夫之所望早侍法宮之側並參端委之遊直躬見于王臣大略推  
乎國器爰奉价藩之寄用寬制閫之謀南國是疆倚梁臺而爲重  
東郊出尹降畢冊以爲優白大旆之肅臨實樂都之說化朝議益  
資于夾輔師瞻益在于弼違千室鳴弦已播陪京之地十晨易筆  
行歸議政之堂中外所祈晝宵于是伏冀順茲炎燠務乃燕申上  
扶宗社之靈以慰華戎之望

上馬少保

早隨毛檄獲仕鄭鄉仰天臺舊齒之臣辭仙殿納言之寵安車就  
第獎元老以惟優行馬施門旌上卿而惟厚間趨恩館會曳鄒裾  
逃瞻哲艾之姿仰霽威嚴之色三握髮而迎士式振前猷一引席  
以與言猥參下綴屈尊崇而展接忘浮賤以見收旋奉役于他邦  
因贅名于侍閣仍賜箋函之召曲開宴俎之筵荷盼飾以兼常在  
心銘而罔敦迫尸官之煩溷惕奏記之淹違方義馭之戒炎仰莊

環而處順莊環二字不經見據本集與孫祕校啓有勉味莊懷句疑此環字亦懷字之訛無爽味腴之道益隆生福之基伏惟致政少保功煥太常謀高前箸勤宣一德有樊侯秉彝之風逮事三朝奮林父盡忠之節寶名照世惠政及民方隆維石之瞻俄請引年之制三孤進律峻周典之官儀五福備身享箕疇之陰隲况簡在于上帝方圖任于舊人位雙節之登賢由小車而命相永綏眉壽上翎丕圖中外所瞻旦暮如是伏冀為國自重

上祠部謝學士

伏自蟻淮補吏亟擁于單車鱣序橫經驟遙于文席流光邁迅外役煩挈嚮屬私奴之行嘗修亭長之問逮速郵之既至辱温教之詞頒書意甚親榮降孟公之几字褒見獎寵踰尼父之經銘淑貺以無涯拜高命而增悖且有乞靈之意猥煩下聽之聰雖推轂之興憐終觸機之為累鵠雛抗志應增腐鼠之貪龍斷圖榮甘竦賤夫之詭旋攜銳志來自迷書賦芋勞神寢歎狙公之識折麻寄意

空馳楚客之心撫愧汗以自流鬱煩襟而增結兼審伏延英之上閣奉永定之成書聯三府之鉅公摘一朝之大典專春秋之筆門人訥于措辭奏新語之篇天子為之稱善居然麟作副在玉京式均鴻霈之恩用紀婉微之績道家藏室爰止于史官太微積星迺升乎郎位矧靈臺之宏峻且理窟之精明清襟之篇已歸于仲寶黑頭之望當在于王公勉重青冥之期勤進素絲之食雅承誨矩正闕師門遐瞻貴秀之資永有庇暉之地

上小謝學士

闕略師帷奔趨吏局滔滔江域阻從一葦之航冉冉年華驟易四時之柄雖復吳舳接尾晉傳交塗繭幅據言悵嗣音之久絕鶴天寫望徒蒿目以增疲仰恩制之善居用惟規而自處載經素齋克守冲機恭惟某官精識超殊雄辭鼓動豹文蔚變駭帝囿之珍羣璧采混成冠天壇之粹寶自聯飛漢牘更直應廬國典係其辯章朝英以之欽服入陪庭議常諤諤之匪躬出佐郡麾每皇皇而求

義方稜鼎盛業守俱高適隆丹辰之知遽結素冠之釁杯棬如昨  
諒至性以奚堪霜露載均幸哀懷之少抑式安履用以叩天光某  
猥用薄能資承惠訓席間侍坐飽聞談塵之微詔下取才首預歌  
萃之薦因緣慰藉承被甄收濫按策之分科叨絲言之補吏州縣  
爲職揣鳧鶴以自安冰檠在公憂駑駘之莫強庶幾卿蔭施及危  
蹤楚旆搖風接辭顏而尚邈汝評改月求題品以未遑系頌之誠  
實邁常等

上梅學士

近飭歸裝爰經樂國款聲姿而有舊喜占拜以無窮更僕乃畱久  
陪于譚塵終宴不倦屢接于朋樽將迎之禮過優洪墨之顏增甚  
適旋冗局驟隔雋鋒未遑摩削以致誠猥辱丁筵而賜教蓬心所  
激荷環意以無忘蘭德彌薰佩嘉言而不舍載懷谷養久格時休  
伏惟學士王國上流天臺駿望紳纓胥伏闕閱居高夙駕雙轡未  
副材于雄寶走趨二節行被召于凝巖幸公食之勉加仵恩綸之

狎至瞻懷所劇布序盥殫

上胡諫議

近者祇赴敝局驟闊後塵瓊樹瞻風方懷于勞想銀鈎布體猥降  
于華賤仰荷屈尊敢忘拜賜屬景文之貫序諒沖氣以均和伏惟  
省主諫議密勿宣猷浚明邁德吉逢昌會先展宏圖總成賦于中  
邦克昭丕績贊大謨于近幄行冠冢司辱在獎題倍深翹頌

又

濫紆帝綽關掌國財一乘敝車方駐北轅之役十連大幕匪遙東  
路之程自跼躄于煩拏闕致誠于摩削猥蒙輝盼先損函封灑鏤  
管之珍詞布朵雲之妙蹟仰承佳腆之貺俯盈感篆之懷適臨朱  
夏之交諒安純氣之守伏惟諫議高岡瑞質東序瓌姿識俾大蔡  
之靈材任崇臺之幹出入周衛斷國論以優長典領大權宅玉畿  
而平秩峻坡上之華級鎮浙西之巨藩報政營邱薦凝于丕績攷  
庸大寢行需于殊恩勉葆懿和用符欽頌

又

近拜璽符諒塵鈴侍屬漕舟之特役渴大幕之趨風遠荷懿憐嗣  
頌温教捧華賤而為重披縹旨以增勤銘說交懷悚兢次集晏陰  
協序令朔告辰諒保順于天倪必坦寧于福履岳岳峻望式注于  
外朝噩噩寶書行催于召節勉尊寢膳用副瞻祈  
上馬尚書

榮臨制闔肅接前旌奏刺行臺嘗聳瞻于輝表參謀支郡彌薰疊  
于風猷屬曹專之敷紛媿箋問之疏闊仰高齋之笑詠亮粹宇之  
寧和伏惟某官識貫神著材表國棟練朝章而精密達治體以該  
深帝幄敷言運嘉謀于漢著師垣賦政得良翰于周邦圖勳舊以  
在茲握鈞衡而孔邇勉遵福履行契官占淪滯之蹤甄揚有所企  
頌之素寤想弗忘

上晏侍郎

素籥迎寒仲商紀候四時為燭發顛氣之清英萬寶得秋極崇邱

之高大伏惟某官對司神化副掌天鈞夙夜在公秉賢猷而克壯  
惠和濟世翊聖政以惟新居然內輔之臣實繫蒼生之望行踐上  
公之席永扶太極之尊蚤荷埏鎔彌深傾禱

又

迺者之官利局假道京華飾固陋以曳裾恭修爵里霽威嚴而開  
閣虔接詞顏嘗欽禮遇之優稽拜箋封之問茂涉迎郊之令蔚為  
生福之基伏惟侍郎業擅謨明體包光智參裁有密之命敷融政  
令之和萬戶離宮暫分于管籥三公神化方寄于阿衡伫圭觀之  
修儀由師瞻而正席甄揚所託系咏尤深

又

近者漕車上計爵刺修名邇台座之榮光深蒙委照接山庭之粹  
表屢獲承顏霽鈞軸之威嚴厚茵憑之禮遇載旋冗局驟隔後塵  
戀賢館以回瞻幾馳營魄仰樞庭之坐論彌富祺祥伏惟樞密侍  
郎識造動微才周治體逢辰萬世之旦稟氣五潢之精自入輔于

帝圖彌緝熙于神化典樞慎密襄天緯以在茲賦政將明位星垣而匪夕資承鈞造倍切頌瞻

上分司李侍郎

近擁單車適旋敞局曠致問于左右寢結戀于朝晡自清暑之協辰諒衰光之爲美伏惟侍郎望高肅哲體具誠明踐歷三臺阜衣之朝有日藩宣四國甘棠之政在民樂南華繕性之言慕子文逃富之志懇辭貴仕榮保令名方圖任于勳賢位冠居于台屏風叨題獎倍積欣翹

上安州范侍郎

寶魏全封乾台舊德地雄垣屏朝倚金湯惟參變于化鈞諒同休于國體節焉巖石久孤師尹之瞻是有袞衣行位我公之復歆炎甫盛頤護有加欽嚮禱悃誠無喻焉

上轉輸許祠部

載擁高麾來巡支郡棠陰拂地咸歌召伯之仁竹騎滿郊實慰并

兒之戀煦冬曦而愛物傾丹府以遇人私慚擊柝之才竊庇柔嘉之德宿官以業旣乏臺駘之能有文者東復曠翁歸之美仰荷汪汪之度猥矜齷齪之姿忘持斧之尊嚴厚分庭之顧遇其言有味若炙輶之無窮厥德不退回輜毛之克舉廣冀天而垂蔭冒燕地以生春內惟浮賤之蹤永刻獎提之貺屬鳴騶之在御思託乘以無階悅別旌軒坐移鍾律思致箋函之問想塵几閣之嚴叢爾幽悰居成曠禮惟溫陽之戒序諒沖氣之在襟恭以祠部性本自誠體資洵直太邱道廣躬博愛以能周吳公治平集茂勳而居最旋領商功之任益資足食之謀三官之寶已充萬乘之知尤異卽奉追車之命行歸簪筆之司日侍清光冥升貴級惟祈葆育以副瞻翹

上亳州李觀察

伏審觀察近擁使旌暫辭天陛帝旒凝睇乍別于威顏侯闔臨戎適資于機略寵靈加異慶慰僉同伏惟觀察文雅光朝簡和濟世

聿修厥德本戴記之中庸克壯其猷協周詩之元老爰從近列式  
將廉車四牡于藩莫奧區于景毫百壺出餞聳榮觀于都門初宣  
條教之文已載歌謠之路哲艾之美方簡于二宮將明之材伫歸  
于三事未遑參覲徒此頌瞻

上高郵劉國博

近者奉役外邦經途樂國修名上舍瞻傑表以彌溫筮蹟末行挹  
清言而有味軫懷楚履展接融樽嬰圃之賓且賢濫陪射鵠太學  
之驩已醉未許歌驪篤英眇以迥深刻幽襟而罔報屬詣斗筭之  
任亟奔星火之程去丹戟之戎扉別紫芝之眉宇乃心增繫惟日  
弗忘在信次之甫經諒宴安之克暢伏惟國博材標磊砢器韞高  
閒學總羣言游掌成均之職政提眾目遠符循傳之風伫一節之  
恭趨期十旬而遠至勉精恬育副是牢悰

迎呂相啓

茂德格天精忠貫日才肩房令居多應變之功智比姚崇允號濟

時之相

此下有闕佚

答簽判張監丞謝及第啓

去夏嘗汎吳航相值淮服申尋舊好略諧少日之畱契闊清言忽  
成環歲之別山間之蹊辟在日下之問闊稀但懷想于盍簪終絕  
馳于去牘鳥嚶鳴于山谷尚或求聲魚相忘于江湖無由煦溼日  
者通郵馳報守邸傳音初聆第課之勞擢丞大匠旋審攷文之盛  
親策羣廉升造秀之士名協方聞之詔選恩華舉集才令喧傳昭  
王涂拔士之賢見文代嚮儒之勝間年得俊榮玉籍之再升故事  
題名美翠珎之雙刻仍慶左曹之詔來從下郡之游同官爲僚得  
名彥而殊樂因心則友緣夙契之愈深矧營道之所同固首公之  
無間實有仰成之望深慰索居之懷兼審行已戒裝將卽赴幕開  
秋始肅闌暑西頽惟導養之有方諒燕申之增鬯恭以某官才思  
通敏格量淵虛文素擅于天經學皆優于師法赴鋒車之勸駕常  
被詳延應拱璧之嘉招早居參畫勤績素聞于大府薦函交委于

內臺會齋伐于東銓仍充賦于神甸一登文石之陞再至太微之  
庭謁者臚傳推湛恩而進秩太常籍奏程高藻以升科用階萬里  
之途實養一時之棟親逢在旦遠志莫涯猥辱曩情首貽榮牘閱  
腴辭之溢簡題淑貺以盈襟念挹晤之甫諧實笑抃之交會行矣  
自愛適茲願言

與孫祕校

承服大名從來有日棲遲衡泌闕略辭顏豈期天陞之簡良得預  
邦英之接迹高山在日頓祛仰止之勞清風襲人可量穆如之快  
尋沿官牒來戾士鄉且知星駕之行已赴瓜時之往雖忠信之室  
近接于雞音然名理之談阻陪于犀柄逃懷神守妙集天倪同年  
某官識具深明德華森茂久著聲于俊域誓養晦于英僚魏煥之  
風方開于聖旦峻良之器宜備于皇家勉味莊懷少符邱禱  
徐紫微問候啓

間者修好寶鄰託蹤後乘忝無辱命良自依仁旋赴局于南州阻

趨風于西省尺題展問迫煩鞅之未遑下館翹心覺饑虔之已甚  
載瞻德履允固道冲伏惟某官國棟挺材天球薦質抱周時之器  
用蘊表世之文華典命于右曹裁成大訓奉思于武帳祇告嘉猷  
被宸睠以方隆竦師瞻而克峻行參槐鼎以右家邦欽頌之私度  
越常品

樞密侍中間候啓

間者蔥鬱之城恪修于王覲熒煌之座恭接于台光旋回跡于漕  
司日搖心于賢館萬機兢業方藉于弼違五福康寧允鍾于嘉告  
伏惟某官大修厥德夙壯其猷爲一代之宗臣論三公之至道樂  
只流詠式殿于大邦良哉作歌克康于元首永毗寶統長處師瞻  
凡在幅員僉同禱望

知郡郎中啓

頃在內朝驟瞻峻采承入辭于幄坐已夙駕于藩麾顧通謁之匪  
遙亦敘違之莫及瞻言尊府素號名城陶齊魯緒餘之風居然雅

俗被龔黃寬簡之政卓爾樂郊凡牘用希神明增勝伏惟某官器  
能開敏行義端修垂紳早列于周班起草久潛于漢署西京循吏  
甫揚豈弟之風宣室邇臣行踐論思之地永惟系頌實倍等倫  
運使郎中啓

博約之風曷違于文繹悃勞之想久積于咨悚比辱教函常銘謙  
眷屬有羈牽之累頗稽裁答之誠必冀實明未繩曠慢自素商之  
屆序諒沖氣之臻和伏惟某官學迺名家行惟高世躬靖康而樂  
道體深沈而著書雅意在于本朝未躋法從直指銜于使節猶滯  
美材制異俗之跳梁成遠民之安阜仁疇茂績并迓崇恩未獲晤  
言尤增沖塞

知郡司封啓

伏自藩府出總臺舸戒行忽星歲之載華悵山川之云邈阻陪談  
塵曠奉書郵自宣布于教條諒綏寧于戩福伏惟某官簡溫迪德  
膚敏懷才早登進于英髦亟躋榮于禮闈佐列侯之受計歷典要

司領大使以宣風聯分劇部稍滯朱轡之守猶稽紫橐之持行奉  
詔除入升法從願言瞻禱曷旣敘宜

上淨覺啓

道風斯偃法會且遙企三昧之嚶呻阻親慈相叩一乘之圓頓莫  
挹微言徒馳資仰之誠未救悃勞之咨緬惟宴坐增集吉祥伏惟  
闍黎大士夙植密因廣薰眾德以一音而說法爲四眾之導師蹟  
應三吳若優曇之出現教行諸部等法雨之普滋尚阻披承可涯  
瞻結



與情恭惟某官卿喬開祥肅溫成德居然千載之俊卓爾萬夫之望被累聖之知勳庸懋建仰元侯之治風烈猶存十連蓋重于撫綏四牡更煩于俞往優優之政夙結于民瞻善善之功久隆于帝念仁聞召節式觀法宮庶幾哲艾之姿永列丞疑之輔某雅承獎勵實愧空疏奏尺記以未遑辱鈞函之薦委背芒斯集袞字增華拜隆賜以匪忘刻懦衷而無報感銜之極抽述豈能

賀晏公轉刑部侍郎

伏審紫詔疏恩白雲登秩穆清有命華夏交懽伏惟某官性貫誠明德符亮采識探天人之曠氣鍾河嶽之靈而自陟降帝臺毗維王室建周官之六典治具式張陳說命之三篇忠規克壯功成暫退道闡彌章絳侯出就于列藩令尹坦然無愠色嘉禾瑞鳳潁川之賦政有聞方底綠綈太室之效唐斯在總司寇外朝之治峻太師維石之瞻枚卜功臣方寄調元之任疇咨舊德竝膺熙載之求辱在甄鎔倍深懼躍

賀永興安撫何侍郎

近審榮奉徽恩進膺顯命綽章惟允物論攸欽伏惟某官性履醇優猷爲敏濟早植祕圖之地屢分籌筆之權進秩貳卿式峻中臺之望作藩全雍實資良帥之才暫奉外游行當內輔豈期謙眷特枉榮函載玩情辭增銘棕抱

賀張太傅轉官

伏審光被徽章寵升華序罷廣內藏書之職秩奉常典禮之司凡辱瞻存舉增慶慰伏以某官懿文綯道閱識照鄰韞經國之遠圖分貳車之優任局無再事已彰循吏之能爵以勸功實顯大君之任某恪居下邑坐遠清藩此下有闕佚

賀燕諫議轉給事中并加勳

伏審被西清之異渥擢東掖之崇資傳聽之間忻詠如一恭以某官藝文該洽器識融明才兼包于三長學通貫于五絕爲國著令作時楷模刑署盡心夙寬于中典諫垣分職久矢于讜言帝睠已

深具瞻尚鬱果奉紫宸之命顯升青瑱之榮且遇光華已膺于夕  
拜政資圖任遠告于宸猷某抗塵滋深荷顧最舊側聽芝封之澤  
第深柏說之誠遐企風徽良增傾躍

賀王密學加勳爵

伏審祇奉宸恩榮加勳典伏惟慶慰恭以某官謨明迪哲柔則居  
方懿績紀于廟彝茂德隆乎國棟踐揚膺任對越盛辰間升樞侍  
之嚴往莅坤維之服中和樂職興起于民聲寬大詔書布揚于上  
意亟承霈澤聿被徽章增體貌以迴殊隆等威而彌峻伫膺召節  
歸掌化鈞

賀王給事中

伏審寅奉霑綸撫臨大屏進圖書之華局輝方面之行臺成命之  
有初愜心之增慰伏惟某官貞亨節明允休誠謨懿德以資贊  
襄日宣匪懈奮謀猷而加啓沃晝接惟親屬雄闔之須賢由中宸  
而付命金鑾地峻暫辭坡上之班策府望華式典禁中之祕簡良

克重鎮雅攸資寅亮天工方贊延于哲艾典司國柄伫參列于阿  
衡系頌之誠實萬常品

賀宋內翰

伏審被鳳韶之温章踐鼇山之祕府寵聞休命抃極輿情恭惟某  
官嶽鎮吐符奎鉤產氣西京典策蔚惟廊廟之高東魯文章迴到  
天人之際而自入居藥省專掌芝函峻體貌之有加告謀猷而罔  
伏益厚中宸之顧爰登內相之崇占地望于銀臺已鄰槐府副民  
瞻于具闕卽掌台司

賀朱祠部

伏審再迂使轡出按祥刑奉灑爾之帝書副恤哉之天旨斷獄四  
百適邁于治平奏書三千矧隆于瞻渥行膺芝璽入典宮臺豈謂  
光謙首貽華削仰恩勤之致意但銘悚之裝懷

賀和州朱給事中

伏審方底疏恩象河進秩伏惟慶慰恭以某官器懷優裕識擅精

明嘗陟降以法官特便蕃于宸眷久從郡寄實爽朝僉天綽成章  
式頒于雅誥月曹馭貴爰正于名卿方圖時棟之才伫踐良肱之  
位傾瞻茲切抽削匪殫

又

伏審被獎帝綸升榮卿寺伏惟慶慰恭以某官識研奧蹟道貫中  
庸秉安節以惟亨蓄懿文而載郁內朝賦職蚤居青瑣之闈巨屏  
宣風屢建赤油之戟休令之聲簡帝惠和之化在民屬綈檢之攷  
庸由月曹而正秩九卿之下括河海式峻榮階三公之坐論廟堂  
行參魁柄某夙承輝昞克聽寵光託毫幅以未遑辱函封之荐及  
載仰履謙之德居多克己之辭感策匪忘惟兢增集

又

伏自濫榮中詔承乏外臺幕府樹風瞻亭舉而匪遠牢盆守器託  
竿牘之未遑豈期象海之名卿猥降薄雲之高義枉史公之馬走  
頌鄧守之泥封犀管摘詞驚華文之溢幅玉音借譽覺虛美之熏

心榮昞所臨感懷增極屬南訛之長育諒泰宇之燕寧伏惟某官  
文獻挺才明誠廣業體忠精而濟位秉器略以致君未賦政于兩  
樞實結望于四國勉寬冲雅之量行宣毗輔之勳參觀尚賒系凝  
交積

賀徐紫微

伏審榮被綈函寵躋綸閣伏惟慶慰恭以微樞置院俾星掖之垂  
文綵邸頒書法天風之申令允資時哲克代聖言伏惟某官斷兕  
雄鋒鳴岡瓌質步玉除而振藻冠仙籍以升名拂霧旦朝早參飛  
于鴻黨望雲晝接常密侍于龍姿蘊賢業以宏深注聖懷而優厚  
記言史局納王法于婉微庀職省聯導國財于强富旋紆帝綽再  
易使麾九賦漕輸不頓芒于恢刃兩宮簡在特申召于追鋒延英  
既開宣室斯對芝封郁穆爰隆東觀之書藥署陰岑乃踐曲臺之  
地典謨攸託名教是瞻雲漢成章布堯言而伊始華蟲觀象裊山  
袞以在茲伫奮壯猷式參魁柄庶幾輔賤永託甄揚

賀王寺丞

比者賢郎監丞狀元煥揚高藻卓冠羣英恢世德于華宗昭義方于善教寺丞獨持高義退損珍題仰降抑之敦風但銘藏而匪石永言欣竦曷可舒陳

賀趙監丞

同判監丞蘊崇懿業發決榮科邁東戶之亨嘉叶南魚之頌歎寵承天綽不佐使麾徙池之勢方初儻物之來曷測猥辱異牀之禮先貽置袖之函感篆交懷敘宣匪罄

代賀齊殿丞書

某伏審祗奉明緡驟躋通籍側聆新命竊怵牢襟恭以某官品格淳修業術精與父母一邑殆治狀之洽聞文章當時矧物議之僉允伉繇盾省之局亟踐書林之游未列慶函遽貽榮牘永言感躍曷究指云謹具狀陳賀兼謝謹錄狀上

賀樞密侍郎

伏審丕膺寵綽光踐榮階丹展用才仰謀猷之鼎盛白雲進秩在名數以益隆德舉再光師瞻愈赫伏惟某官識窮繫表道貫時先翊寶運以飛天灼清暉而照世典樞之任方倚于俊臣進律之恩爰崇于貴級式厚當陽之階伉躋論道之司大副朝僉益恢帝載永言竦抃實倍等倫

賀樞密左丞

恭審被帝檢之温文進天臺之左轄樞衡是典式倚于珍賢名數載加克光于凝績伏惟某官元精降氣大敷生材植德本而端方體道冲而淵邃承光震邸有調護之勳賦政藪庭極贊襄之美屬九闈之第賞亞八座以飛榮總乃懿綱毗于至治巖巖師尹方接于具瞻赫赫公台即期于延拜永言慶慰實邁等倫

賀參政侍郎

伏審被綠綈之雅誥進碧落之貳卿端委星樞對司王政法官注意延體貌以方高繇宇承風企龍光而竊忭伏惟某官太和陶粹

奕世生賢起韋平舊相之家輔勳華至治之運歷更貴仕綽著茂  
勳謨九德以熙朝浚明斯在參萬樞而濟位寅亮居多爰舉進律  
之文用煥秉鈞之績亞秩宗而典禮式副疇庸正茂宰以調元諒  
應匪夕某屬當官守阻覲鈞嚴徒慶慰以兼深在趨參而弗獲  
賀參政給事

伏審光被璽章進崇階級踐東臺之貴近貳宰府之謨明天渥遂  
行民瞻胥協伏惟參政奮絲直道光輔本朝亮節不回素仰蓋臣  
之操嘉謀罔伏益隆元后之知用青宮翼贊之勳佐黃閣倚毗之  
政爰疏高爵式煥大猷方委重于邦英仁正司于台席永言慶忭  
度越羣倫

賀司諫

竊以朝廷置官七爭爲重賢俊居職萬事得言志策所伸功利益  
遠伏惟某官克生王國雅意本朝方幅獻言屢抗其疏宴間召見  
未始不冠簡絲上心任以近職漢世儒者給事于中唐制從官供

奉于內今茲妙選允穆羣談伏自拜恩未遑奉記出于謙眷惠以  
教函仰諭馮情益增欣素哀索參累敘復甚稽感戢之私悚兢無

賀陳州太尉相公

伏審肅奉帝俞升臨輔鎮伏惟慶慰恭以某官氣鍾英粹道契亨  
嘉宣一德以同寅翔萬機而成化蔚彰社稷之衛允播股肱之良  
屬肆類之均禧首膺圖任委陪京之舊治彌表眷懷而某夙荷埏  
鎔倍增瞻頌欣沃之至有異常均

賀畱守相公

天元復始王歲開端寅杓回東陸之春蒨律贊少陽之氣茲爲獻  
節允納殊休伏惟某官性合誠明道全經緯協千齡之願望爲一  
代之宗工坐運鈞衡秉甄陶于巖廟出兼袞鉞方眷倚于畱都仁  
聞舊德之圖卽冠前疑之列某馳情東閣方欲奉牋猥屈常尊首  
紆台翰永言感愧莫克敷宣

又

天元上日王歲首正史策美于端辰卦氣榮于泰象伏惟某官茂  
勳奕葉碩德佐時爰履三朝之亨彌膺百順之祐出持管籥暫居  
都輦之畱入輔本朝行陟樞台之重趨承未獲系頌何深

賀知府太尉

人正著統王歲啓元受圖盛于漢京設樽傳于晉會伏惟某官履  
三陽之吉膺百順之宜以漢世外家之親處周邦良翰之任總司  
畱印早分兩使之榮延拜齋壇行帥十連之重方深善頌猥沐撫  
情特貽記室之函增佩元侯之眷

賀知郡學士

伏審已承守邸之音將被解龜之命騰裝西路行奉紫宸之朝降  
劄中臺伫峻天坡之位何乃一謙之益遠移十部之賢銘悚交懷  
保綏是願  
賀運使郎中

膺奉制函就遷吏部煩長淮之漕職按全楚之提封賦政有初治  
書甫及曲盡親疏之意尤多款密之辭研玩弗忘感藏斯至惟嚴  
凝之邇臘諒寶練之臻和強濟之才尚淹于遠用清切之任行陟  
于近班未獲晤言但增遙悚

賀知府密學

伏審拜瞻宸綽進職天樞華煥遂行中外胥說伏惟某官該練治  
體敷洽朝章革履見于步趨温室旌乎慎密連分制閩之寄丕昭  
良翰之風河災既平允資于碩畫帝心期簡方赫于茂功峻名器  
于有初參鈞衡而匪遠勉精調護行副傾祈

賀知縣虞部

伏審光奉聖恩榮遷茂秩漢臺故事郎曹是應于星辰周典舊文  
虞官實掌于川澤甄升有漸慶慰惟深伏惟某官德尚簡溫性資  
通敏承狐毛忠教之厚資石建孝德之餘膺渙綽于宸庭撫鳴弦  
于洛邑莅官行政固多最迹之稱奏課攷功果被深辭之獎豈謂

謙眷猥示書牋在欣佩以匪忘于敘宣而莫既  
賀新轉官海用啓


伏審光奉帝恩榮升朝籍伏惟慶慰某官清芳駕俗良具幹時自  
撫翼于亨衢亟榮飛于顯仕居有懿績沃乃上心果膺出綽之恩  
榮進中閨之秩未遑賀牘先辱飛緘載形撫抑之謙交集悚銘之

素  
賀新轉京官海用啓


伏審芝檢發中方延于灑澤棘曹引秩序進于榮塗伏惟某官夷  
雅飭躬中和布慶頒條貳局早彰若騁之聲第課疇勞亟奉丁寧  
之旨某側聞成命竊怵丹衷限疆禁之所縈造賓趨而莫及

又

螭庭湛渥渙發于徽章棘寺分曹延登于美局某官躬桓瑞品杞  
梓奇材協贊藩條早聞于治狀參評國令荐啓于榮塗凡辱依游  
俱懷茂說未遑晤挹莫量傾瞻



文恭集卷三十二



文恭集卷三十三

書啓

謝李相公

近卽眞祠獲趨盛府半氈均席濫東閣之翹才百豆陳儀辱西園  
之愛客撫薄軀而至陋玷英明以迴深旋祗事於殊庭復回轅于  
冗局永懷恩遇交切震惶適臨歆暑之辰邈阻高明之德伏望上  
膺毗倚勉順寢興宣哲茂功方圖于碩老秉均當軸行冠于宗臣  
庶託甄鎔彌深系望

又

比者肅齋眞像遐款祠宮去相幕以匪遙辱鈞函之胥洎朵雲媚  
采乍閱于雕華攢箭在心頓增于危慄永懷降挹曷敢弭忘

又

邇者虔託短封扣聞侍閣重煩記室遐纘鈞題形金石之重言極  
雲天之高義發函披彩飾袞垂裒誠屈大臣之尊敢拜嘉命之辱

庚金在伏季火將中勉慰萬夫之瞻載加方丈之食卽期旦暮入  
冠宗公夙被甄陶日深翹頌

又  
比者相公奉寶書于方底冠羣后于東藩嘗因奏記之文遠叩當  
關之吏有煩鈞重俯霽威嚴越從靜練之江垂賜朵雲之牘永懷  
謙亮之德益增赧汗之誠

謝宋相公移鎮

近審改藩旋聞莅府河濱託乘徒羨于鳴笳境上馳郵未遑于裁  
牘屈茲威重崇以謙饒游墜教函載摛名筆仰服襄華之飾彌裝  
感篆之懷臘過嘉平春回東陸初賦仁平之政益臻福嚮之宜伏  
惟判府太尉相公先覺照民宏謨緯國全德光于出處盛業著于  
規隨謝傅東山方繫蒼生之望伊人幸野行聞舊老之圖入正中  
階益升上袞三元行始百順來臻系頌之私實倍常品  
轉官謝江寧相公

帝檢宣恩天臺進秩祇應崇渥伏積悖兢竊以六職肇開百工是  
督東京故事始建于民曹典午舊官爰分于起部掌繕營而至重  
在選擢以爲優夫何蒙鄙之姿猥玷光華之命此蓋相公大謨在  
德俯育羣材神化自私曲被丹青之飾天光所濟遂塵渙渥之恩  
仰鎔造以知歸感生成而有自

謝相公

祇守成命方遂赴官振棹三淮適臨于任所引纓數仞未覘于風  
規豈謂眇私遽頒誨翰闕高雲之懿義踰褻袞之增榮佩服輝光  
曷勝銘篆恭以相公鴻猷斧藻元化羽儀植德本于羣倫播仁聲  
于巨屏載騰物論益簡天衷南部宣恩疲瘵久蒙于綏撫中宸溫  
詔倚毗伋復于凝嚴屬清和之在辰祈繁馭之多祐

謝馬尚書

近辭象闕已託甄揚屬以戒塗之間猥奉濡毫之賜俯惟誠踊尤  
備德輝恭以尚書淵宇育神天倪粹美肇履朱曦之候益臻鴻祐

之祥瞻望軒墉卑情無任激切悽悽之至

又

近者恭率賦輿恪趨軒陛旋之穴局常拜柔函敬仰元臣式臨雄  
闔欽翹華館莫叩下風忽頒記室之書載馳長鬣之士藻章巨麗  
慰誨隆優爰披有味之言更慚拜命之辱凱風貫序畏日揚光在  
吉履之所安固福基而彌厚稟精維嶽修輔本朝全德在躬懋勳  
在世出藩王室式資元老之猷入贊帝圖仲總阿衡之任幅員咸  
仰鑒察于茲詒在甄揚倍深傾禱

謝亳州馬尚書

近隨下瀨之船私出樂郊之地長波激箭悵鼓棹之難停大幕汎  
蓮愧趨風之不獲豈圖行履遽達聰明過煩撫問之私竊動震惶  
之色自旋敞局嘗拜尺題適瞻樞斗之尊苦恨米鹽之侈猥蒙台  
睠曲齒外僚裁記室之榮緘貶兵廚之珍醞朵雲盈簡華袞在言  
拜賜兼常洪顏增悚況中臺之八座接上袞之三司實體貌之有

殊豈尊嚴之可屈此蓋某官府矜蕞質特越常倫不遠脩程遂流  
下問永惟銜刻何以弭忘屬維夏之啓衣肇景風之育物勉敦福  
履榮保天和方圖哲艾之姿行涉熒煌之座願言跂頌實託陶甄

謝副樞侍郎

駟騎風馳遠降絲綸之命天恩雨露益兼鍾釜之權循牆莫遂于  
固辭臨谷但增于多懼竊念某才華不茂識度非宏早逢開泰之  
期預獲明揚之列金閨著籍參諸彥以無聞粉署聯班廁仙郎而  
有覲矧辱兩朝之采菲繼叨三仕以飛駕舜帝明功宜舉黜幽之  
典湯王寬德忽加懋賞之榮南連五嶺之區北接次畿之地咸均  
按率允謂優隆愧忝冒以非宜省品題而有自此蓋伏蒙某官包  
荒育德嘉善存誠因鴻樞密勿之餘奉黃屋詳延之問致茲蕞品  
濫被渥恩敢不淬礪鉛刀驅馳駑駕公忠盡瘁上酬雷雨之恩廉  
潔無瑕次答鈞衡之施

謝晏侍郎

朝綉驟頒使符改涖祗膺渙渥伏積凌兢竊以督貢篚以修方禹  
州甚闊權牢盆而商利漢制尤難將責實以任才必簡良而付命  
豈茲懦品猥掌大權顧忝冒之所來知獎提之有自此蓋某官卿  
雲借蔭鉤璧分輝榮轅下之薄蹄曲令引重飾溝中之斷木不使  
棄才方竦佩于恩私忽寵貽于書教枉郇公之雲朵休昉何深比  
陸氏之橐裝寶持不佞永言感刻奚可强忘  
謝南京吳侍郎  
乃者汎下瀨之歸艗涉陪京之大幕恭齋刺字肅款賓門瞻臺座  
之熒煌从塵輝庇挹兵廚之醪醪曲被宴私辱英盼之兼常撫懦  
衷而增愧泊旋宥局闕拜空函豈圖樞宥之尊特尚謙撝之操猥  
頒荆紙躬灑郇雲煥華袞以致衰掩南金以申貺拜嘉增重撫己  
興慚伏惟畱守侍郎道貫中庸識精秘奧聖業資其潤色賢德仰  
乎秉彝奮庸萬樞補王職于無闕接武三事納天工于太和進中  
臺之貳卿總畱都之管籥中外宣績聊出試于价藩旦暮逢辰仁

入冠于鈞席系頌所切餐寢不忘

謝安州范侍郎

阻奉台儀坐馳勞慙逃仰維翰之重允繫共治之良伏蒙某官曲  
徇鳴謙特貺芳訊訂芬椒而有馥均永雋之踰滋竊用中藏式敦  
至眷歲華晚晚邦政靖嘉願協頤賢仁圖熙綽瞻懷所萃粗略匪  
宣

謝李密諫

謬塵天渥猥席使權戾止淮郊纔駐巾車之役瞻言江府未遑免  
胄之趨方懷犀額之姿驟降繭封之問金坡著位匪接于常僚瓊  
藻摘文敢安于榮貺字置袖而可寶言飾袞以相輝心石用銘背  
芒增集仰葆真于莊室諒協福于貧疇伏惟某官藻簡刻名奎鉤  
稟粹升華崑閬蚤參仙蹕之遊訪道溫宣屢前帝席之對邈避列  
侯之計聊屈价人之藩位太寢之策勳副法宮之命相勉調常膳  
式慰巖瞻矧蚤託于甄揚但日深于企頌

又乃者某官輟坡上之近司奠江西之福壤車檐所過壯弩矢于前  
 驅里開云歸耀錦衣于白日適臨藩翰大樹風聲實雅俗之所瞻  
 固外臺之胥仰不費庖刀之利諒臻莊室之祥恭惟某官闕月淪  
 精楚珩挺質早升華于貴近特被睽于聖神坐進訃謨日深毗倚  
 仙瀛之籍過陟于鼈頭帝檢之女嘗批于鳳尾旋主甘泉之計大  
 富水衡之錢允隆師尹之瞻且議公台之拜懇辭柄用聯奏囊封  
 阮麾暫出于東平賈席久虛于宣室大猷協贊式賴清光之臣召  
 節延登即處前疑之輔獎題有素傾頌兼深

謝梅學士

逋寇即誅樂郊罷警露章南闕彌束于宸襟封檢東臺首膺于襲  
 綽虔仰薄雲之義遠行流牘之音勤三復以敦誠秉一謙而行已  
 銘貽來貺悚刺懦衷伏惟某官大雅充朝仙風拂世殿門引籍蚤  
 峻于清班使斧宣威屢分于寵寄謀猷宏博幹局精明所至洽于

風聲惟良冠乎郡國近者淮山聚盜頗達于黠聰漢劄命賢遂更  
 于麾守改轍夙駕解瑟更張大振肅于綱條重明申于購賞蕩除  
 小醜安帖齊民方底之書或褒于天語中繩之府行陟于仙瀛銘  
 戀所深述宣匪暇

又

謬被天光擢司國賦一埤從役方駐于征輪十舍傾風匪遙于大  
 幕瞻言鈴侍曠託郵音適懷泐墨之顏猥貺珍榮之牘抒英詞而  
 溢美篤瓌意以兼常仰荷撫存交深銘愧肇戒長贏之序諒臻沖  
 懿之風接宴辯以未階鬱襟悰而增極勉遵吉履行需殊恩翹詠  
 之私倦談奚悉

謝周大諫

近將命于殊疆方攝官于敝局屬牽疲役曠拜柔函豈期上笏之  
 英猥損圓封之貺極謙沖而致意假題品以抒言仰推轂之見私  
 覺集芒而增愧引天坡之貴重處侯閭之藩宣豈此具寮可當隆

禮永言佩服奚敢弭忘適臨歎暑之辰尚阻高明之德勉順粹和  
之氣行登宥密之私傾頌所深述宣罔逮

謝胡少卿

言睽韻宇迅易年華引襟望風實賒于丹抱抽毫致訊罕屬于飛  
郵恭惟疇厚之知遠貺珍華之翰河南憑几仰意愛之彌親孟陵  
辱書實欣歡之無極逃瞻坐嶺弗爽冲和恭惟某官偉望逸羣宏  
才御眾名臣刺部方總于教條上帝簡心將延于體貌式登二府  
用慰輿情未克承顏敢祈葆質

謝睦州朱給事中

自濫需綸常馳柔幅近邁石城之使遠貽瓊蘊之書墨妙相輝迴  
奪宜官之善牘珍可寶斗踰從事之賢仰蘊藉以居多辱褒揚而  
太溢伏惟某官宣猷克壯秉德惟醇蚤引籍于東臺乍淹賢于外  
服金甌之下久覆于香名玉鉉之間卽調于芳飪暄蒸未解系頌  
滋深勉覲葆光茲茲延拜

謝朱給事中

近者恪修貢職祇覲宸闈式瞻幄坐之尊猥被綈函之命星鳥結  
秩濫造于冬曹金節均權復塵于使額自省懦庸之質詎堪進擢  
之恩此蓋某官善育人材曲私風鑒慕先民之推轂致卽日之濫  
巾遐走伉俪俯傳真教披英辭之藻爛仰環意之淵虛拜命增慚  
佩音無斃永言敢戴奚克序宣

謝子莊知郡

願言違摻坐積悃勞襍被以居慚禁門之尸職棲毫且久缺郵舍  
之通書豈謂攜冲未緬曠慢遐記朋簪之舊荐貽訊牘之華執玩  
以還感藏無斃自炎辰之順履諒冲氣之保和伏惟某官風識清  
夷局量開敏久次道山之籍夙陪文石之朝臨摯而顛未濟橐從  
之列不瑕有害尚淹符守之居勉思塞馬之言行進階鸞之綴末  
由款睇益冀珍調

謝福州袁待制

近者曲被恩章亞升卿序省叨踰而誠幸繁獎引之素深尚稽書  
驛之儀先枉記曹之問過垂謙眷增萃感悰伏惟某官名世傑才  
熙朝俊德早直祕文之所復聯拜瑣之榮江城奧藩暫資于偃治  
斗樞近府行覩于參毗尚遠披承益祈保輔

謝狄祠部

邈疏宴對寢結寤思居多簿領之迷罕託書郵之問猥蒙疇念遐  
損珍題敦隆久之懿誠延華虛之美譽逖懷意愛備積襟悰屬流  
火之協辰諒味腴之加勝樹風岷益矧恢刃之有餘賜對溫宣佗  
追車之降召勉精葆衛式大寵光

謝鄭都運

近覲清風獲攀舊契奉折樽之禮叨更僕之延遽屬卽途未周素  
意忽奉垂訊彌紉隆私緬惟計局會閒道腴增集尤順和倪之理  
俟膺大用之恩其在瞻依曷勝銷黯

謝親家寺丞

自睽儀矩載涉暄涼方懷捉塵之譚忽辱偃波之翰衰敝之族幸  
聯于華宗謙挹之辭遽形于縛旨載仰懇勤之睠彌增感象之懷  
克副瞻依攸宜葆育

謝知府密諫

言睽勝範湯奉仁遊絕憑操染之誠第積悃勞之吝比者鄰疆訖  
聘輶乘言還踐首境以方初邁伉兵之忽至特貽函教繇布旨辭  
欽惠好之匪忘佩嘉音之無斃伏惟某官風致高劭識業精明雅  
意在于本朝美猷濟于名閣萬兵督府聊施羊杜之才三事冢司  
行繼韋平之拜永惟眞禱實倍常情方屬緒寒益期冲嗇

又

都圻孔邇書舍相望徒企見于風微頗闕通于誠幅豈謂未忘餘  
眷尚軫撫情比因行李之臨猥辱函封之貺絢英辭而累牘秉高  
義而薄雲執翫忘劬佩藏增至久苦冗煩之思稽憑柔削之誠尚  
冀并容未攻逋慢大冬積凜元陽甫升允納善祥別膺華渚系頌

之至敷述罔殫  
轉官謝路轉運

比者帝扉修觀式輟于周班天詔升華猷塵于茂級擢冬曹而結  
秩正禮闈以充員表著增隆寵輝至渥念僥榮之所自識延譽之  
有來此蓋某官道高提衡志崇推轂齒牙不惜遂竊于靈名爵位  
相先俾叨于榮賁永言感篆匪克宣陳

文恭集卷三十三

文恭集卷三十四

書啓

知湖州謝兩府

越從凡品超補列藩地介江湖之饒俗兼魚稻之利溪山勝秀土  
風善平前世稱州得者謂之佳郡本朝用吏初亦選諸名臣未及  
孤生特爲妄施竊念某稟才空劣受性愚駑不通道數之方罕研  
世務之要起于徒步真厥周行寡過未能常勤思于往行哀名不  
令亦勉勛于前修幸階制治之辰狼藉繙經之館位貌凡近旣不  
足以動人文采荒疏復無能而表世衛方多于君子魯且號于真  
儒迫生業之屢殫加親年之在懼亟營外祿薦叩上仁天子當陽  
規樹凱風之化相君輔世與憐鳥鳥之情從欲推恩油然曲盡往  
俞敷命惕若無從況乃邊梗未夷戎車方駕汪童之齒宜執于干  
戈終軍之才不習于金革未束置于高閣尚假守于黃堂忍愧宴  
安懷私熙盛此蓋伏遇某官使人以器代天之工度用百材胥協

誠陳之矩曲成萬物各懷性分之方施及至愚謬延良選惟佩乃  
賜以竭其頑有社有人不忘于力政在官在庫但職于首公舍是  
以還未知所措

兩浙運使謝兩府

孤外守藩訖無報稱東南領使遠有允華度越餘州超按本道寵  
過素望憐集丹衷竊念某品在下凡跡絲少賤早緣寒素之日偶  
及仕進之門謬籍朝閣濫巾儒館以鄒魯之鄙朴值唐虞之欽明  
當九官之吁都聞百工之賡誦陪廁大夫之未出入周衛之中不  
有忠言少裨上聽曾無治策以拾朝遺止玷書筵空塵計闈昨以  
私門違閔親匱在攢因章請以歸躬幸詔除之賜補授中吳之右  
郡給東省之左符密邇家園偃息廡舍濱帶江湖之利資承魚稻  
之饒視于他邦最爲豐壤芻狗萬物顯繫聖君之靈坯冶一陶陰  
知宰匠之力然而治無三最事且百疏猥賜告宐之恩聽營舉附  
之禮成區區之小亮繫蕩蕩之至仁宿素所期嘗甘溝壑存亡爲

感何答邱山方還舊貫之棲且謹寬條之布庶伸久效庸追羣譏  
不圖睿恩就升使領降尺一之詔檢易方寸之印章服冕巡邦懼  
忝朝廷之寄過家上冢併成邑里之榮所封之墳土未乾告第之  
泥書尚渥有懷春露之感得慰寒泉之思加以前後十年周旋三  
郡皆叨善地並在南州聯蹟二吳均有湖山之勝分行八使復居  
風土之佳于己雖豐在民未泰大則餘杭一郡江役繁興次則浙  
西數州人饑流冗糟糠不厭杼軸其空官司之狂獄實繁部內之  
賦輿尤重早衰多病至陋極頑旌陟之恩雖蒙于曲造負乘之質  
終懼于疾顛此蓋伏遇某官平秩天工敷施神化百材皆度俾安  
輪柄之宜庶尹允諧克贊蕭韶之化致茲擢序敢忘昭銘願竭其  
愚少供乃職過此以往未知其他

知制誥謝兩府

名器之公假人攸慎車服之賜章德爲先施及腐生恩踰本量內  
循空素交積悻竊竊以內史官儀號稱華重西台資地進陟邃嚴

演如綸之言式是羣下敷渙汗之令形于幅員在宣賦之才難信  
選掄之任重安于之善爲命令隨用宰人射父之能作訓辭見誇  
敵國宜敷求于髦彥用典作于詔文必也冒居奚逃聳謂如某文  
非根道學不名家以野生一介之微玷士鄉三物之學會皇初之  
紹宅濫宵雅之始官隨牒肆勤脫巾待罪治朝博納務收士幹之  
良下國召還猥玷材林之選預游騁躡竊覘祕圖浩如觀海之莫  
涯惕若學山之遽止徒嚮迷于疑闕奚訂正于謬譌日費大官之  
餐歲重高門之地自惟空劣無裨補于本朝願試劇煩因馳驅于  
外服去文史切劘之益因簿書聽斷之勞契闕十霜竭來三郡入  
預計官之聯屬出膺漕節之治煩輿賦是經顧才資之素短吏文  
所責去學術而已疏有原魯將落之譏乏武仲不休之思矧雋髦  
之輩出願鴛蹇之早襄比來試郡之行始避當塗之勝方受言而  
刺郡忽辱召以還台爰當入謁之辰俄被已行之命擢居記史參  
備禁聯應文象于極東司言助于君側延英墜典曾未暇于建明

史觀移文猶弗違于序次會承使乏出講鄰驩幸謹彝儀獲通常  
聘迨南轅之復命辱公府之試吏悅迷制目之淵僅就詔篇之次  
荒疏已甚擯黜是虞乃蒙含垢之收進辱代言之任仍賁身章之  
飾併增神觀之驚況書詔之煩當五曹之重而宿官之業有四禁  
之難藐是瑣材疲于文俗心源久翳病幹弗支將何以宣究典彝  
發揮謨訓尋權輿之所自知封殖之匪他此蓋伏遇某官寬假用  
人謨明致主物有未獲則曰時予之辜善或可稱斯惟我后之德  
翊魁杓而上運持坏治而曲成乃因密勿之餘愛奉詳延之間致  
茲藁品猥玷清官雖成命之在茲愧用才之不值敢不恪修乃職  
祇謹攸箴考父鼎銘用服益恭之訓虞人皮弁更堅所守之方某  
臯抱危疴久居寬告雖偷存于殘息終稽奉于謝牋怠慢之尤心  
顏靡措成拔之惠肝膈弗忘卑情不任依歸之至  
知制誥謝外任  
叨奉制函謬躋詞掖預裁方底之詔復從屬車之塵祇荷寵甄交

增榮憐某才資疏劣器質方愚感會昌辰階緣薄技與游大國之  
俊領校外史之書佔簡畢之謬譌莫能訂正守瓶筭之隘局無所  
建明姑避時髦之鋒斯存拙者之效比來補外寢欲退藏久服吏  
文之資殆將學殖之落竭來都輦更踐江湖十稔于茲百憂可既  
出于誤聽旋被召還參二史之記言預一介之修好徂裝甫褫試  
札就頒遊升西省之聯入備右樞之屬典司名命主作文辭宜先  
膚敏之求猥厚瑣涼之進省循甚熟慰藉有由此蓋某官扶厚時  
風獎成士類見私品目得遂恩章仍敦沖挹之風首枉褒華之牘  
言多溢美意切相先第增簸糶之慚莫罄汗筠之述

謝知郡考功

言睽德範阻奉優游相望荆粵之暇坐積參辰之歎山川云遠歲  
月徂長曩置郵筒管紆函教屬冗煩之嬰思惕操染之愆儀尚特  
眷私未攻瑕短自商風之協候諒妙氣之棲襟伏惟某官風識夷  
通器懷閔敏克繼名門之韻聿升禮闈之華剖符臨藩早布宣于

德教乘輶握節復糾正于天刑薦著平反之風卽奉寵休之命仁  
祈襄渥入躋禁嚴遡德企深馳誠凝竚望風懷想尚阻拜于光儀  
飛驛傳郵辱猥頒于華檢仰銜惠好居極銘藏

謝知郡都官

言阻溫儀坐更華序屬伉兵之至止辱榮牘之見貽惟顥氣之甫  
回諒冲腴之彌勝西陵地密今者事叢諒幹裕之煩神冀保頤之  
綏福

又

風期云邈星序北遷曷因書驛之臨常損教函之問旨辭有溢謙  
眷彌冲以衰繭之病姿玷深嚴之禁直居多燥吻曠致柔誠自素  
籥之戒涼固冲襟之集祉伏惟某官器懷明劭才局周通早聯畫  
省之曹尚滯朱轡之守能名最目已推冠于州藩優詔陟文佗入  
翔于臺省未階披晤但切頌瞻方遡蕭辰冀綏顥氣

謝知郡郎中

言違德矩企挹談叢屢星舍之云移曾書郵之莫寓豈圖謙眷迴  
篤情期流款密之教函損褒華之文致久緣衰幹竊冒禁聯徒佩  
服于嘉音曠裁修于謝幅尚期寬裕未卽訶嫌緬惟班政之餘保  
厥頤神之妙矧才猷之茂著加治績于洽聞仁膺溫密之章進踐  
高華之任未諧披晤但積頌瞻

謝知郡少卿

睽異風期淹移歲序莫遂晤言之適但馳勤望之勞猥辱摛情見  
尋雅好遐損八行之翰增銘三復之言承舍味于真腴彌協宣于  
妙氣未涯良覲尚冀精調系詠之私敷述奚旣

謝知郡學士

閒宴違談浚明企德坐易暄涼之序絕馳問訊之音夙睽匪移函  
題荐及雅情彌腆榮藻益芬執玩惟勤感藏兼積具承訟筭日簡  
治目歲凝文史自強神明逾粹道山諸彥久企俊游策府羣書適  
資訂正卽奉更書之入別膺渙綽之遷系頌所深願言曷已

謝知郡中舍

睽奉溫標遷流華序方企浚明之德忽行款密之函飾袞致褒折  
瑤流問服摛情而斯在慰衷抱以奚忘自順履于時寒惟肆勤于  
政實無虧道養允協福綏矧惠化之凝成仁寵恩之舉集未階宴  
晤徒切願言益冀保頤用寬馳系

謝知郡祕監

涓休日策受事堂皇因毫驛以寄通辱書騰之流貺仍加味腴之  
勝彌臻綏福之宜伏惟某官履德清純栖神簡素含全球之質性  
蘊韶夏之聲文進秩大蓬峻官儀而伊始宣風列郡賦臺札以方  
初仁聞政最之褒將大老成之用傾素增積造次罔殫

謝知府學士

祇局匪遑吮毫寢闕猥承謙節曲枉珍題越百舍之脩塗託九文  
之仙跡獎憐加厚銜刻匪忘屬星火之方中諒風襟之益快伏惟  
某官溫文具體雅尚邁倫久更畫省之曹特厚遂旒之睠約史三

長之筆哲聖翁歸宣風萬里之沙治聲藹異行紆衷檢卽峻貴塗  
勉務葆光副茲懷戀

謝知府大夫

自睽溫範比辱榮函屬寓直于北門居常襍被思寄聲于南國幾  
歎栖毫惟寬裕之見存幸疵瑕之未露瞻言靜治彌宅至和外屏  
宣風暫治別車之任中臺參務伴還起草之司益奉衷華庸躋要  
劇莫由挹晤但切頌瞻

謝運使郎中

叨奉宸恩進兼祕職以空疏之才品冒蕃疊之寵靈方切愧魂猥  
承謙眷枉褒華之訊牘敦茂說之襟情載欽獎借之私彌切感藏  
之志迫于衰拙局在禁嚴居多寓直之勞闕致報章之問厚意未  
答愧汗無從敢冀并容莫殫敷敘

謝提刑郎中

積稔睽風繫時懷德曷承挂冤之老特枉行書之郵高義服之無

窮厚意久而不答每惟逋慢第切兢慚緬思繕性之方舉協治神  
之理想啓期之三樂無廢援琴願衛武之百年益宜加飯永言馳  
系莫克敷宣

謝兩制

近者被詔叨榮亞卿外秩首辱謙沖之誨過形裒借之辭展誦忘  
劬寘藏增耀伏惟某官韞才閎邁履德端方踐荷橐之近班結藻  
旒之隆瞻竝符士論入奉朝咨尚阻款瞻徒深馳詠

謝成都鈐轄

風猷言阻歲序載華早愆裁削之儀尤積瞻馳之素曩承謙眷屢  
枉榮函比伸款洽之辭益諗周勤之志感藏無替敘答有乖自順  
履于寒凝諒舉臻于休祉末由披會尚冀節宣傾系之懷造次奚

既

謝解替

被詔還都辦裝有日言念當衢之第將諧免胄之趨仰寶練于機

神沓祥臻于吉祉依仁匪遠結吝猶多勉奉本朝動遵福履  
謝轉輸

近頒明恩適諸莅任引領遐增于素悃順風猥奉于圓封佩翫攸  
深欣慰彌集恭惟某官清猷輝鏤雅度淵冲流馬之功洽聞于康  
濟蓼蕭之渥方位于敷求隆祐用臻虔祈無已

又

比者祇護睟容恭詣珍館挹瓊姿而匪遠浣牢想以居多仰沐懿  
憐俯頒華削窺英辭之溢幅辱映貺之兼常銘說交懷序言盥悉  
謝諸鎮大僚海用啓

謬奉帝綸擢居使繡單車從役適憩于樂郊大幕瞻風迴搖于楚  
旆未奉赫蹠之紙猥頒方絮之函灑五色之仙毫時紆妙蹟秉一  
謙之懿德曲貺華褰荷輝眇之兼常激懦庸而增感瞻言吉履式  
保太和伏惟某官秀範冠時壯猷迪哲身兼數器挺國棟之偉材  
牘奏千篇包王臣之大略禁闈之聲名籍甚外朝之表著特高繇

上帝之簡心資良臣之刺部行膺迅召式迓霑恩奉三接之清光  
參萬機之大政雅承慰藉深頌瞻翹勉保興居用宣靈寵  
謝獲羣賊獎諭海用啓

小寇逋誅偶嘯聚于山谷大君有命爰會合于甲兵未張一目之  
羅已覆綠林之黨如某粗修封管准奉詔條空竭愚駑詎施方略  
洎投恢網益警威靈夫何蕞爾之姿忽被發中之命此蓋太保道  
存激勸言炳丹青露章深達于穆清衷詔下敷于幽仄永言蔭庇  
惟極肺肝敢不益勵寸心勤修懦節期于盡瘁上答所知  
謝都督諸牧

伏以歆溥在辰企韻堂而不接鞅煩嬰思奉心畫以尤疏某仰承  
謙挹之風繼損珍榮之牘丁監持意超十部而並賢婉約成章灑  
五雲而有爛永懷恩紀併集襟襟某官隆棟偉才宰朝茂器貳宮  
協化方延擢于正人兩府須賢仁對持于魁柄願言系頌庶越等  
倫

謝卿監

茲者叨被詔函參聯卿省冒榮過厚揣己知慚敢期冲挹之私先枉褒存之誨珍藏無斃裁敘罔殫

謝人賀

比者叨塵天綽擢正郎曹伏蒙某人命記室以裁書走仗兵而賜教鈞銜荐委慈誨下臨郇國朵雲麗筆精而布體孟公榮牘煥言袞以成章捧戴有初凌兢失次況中台舊相貴絕于等倫而外計庶官禮無于匹敵仰荷謙鳴之德但增夕惕之懷感蒙所深序宣罔逮

謝人賀冬書

某再拜違奉以來可涯馳系屬以牽鞅曠致誠幅比因行李數蒙教函稽于修答期在見寬長至令辰允納新福猥承寄示華緘感悚之懷無以云喻末由瞻覲益冀珍厚致仕謝兩府


抱疾乞身甘守垂綸之瀨蒙休起廢復彈挂壁之冠洪造何私蒼顏有覲伏念某智迷寡達途遠多窮發策收科倚青陽而款轡辭榮就養懼華髮而循咳既銜弗洎之悲仍困益侵之疹固當掃迹非敢爲高松菊陶軒悄無車馬簞瓢顏巷尚有琴書微倚樓看鏡之懷習尋壑經邱之陋敢圖淪昧猶辱矜憐此蓋伏遇某官量合四溟事兼九德闢振淹之公道崇礪俗之宏規拯拔湮沈與繼千帆之後吹噓朽蠹俾同萬木之春而某瓠落奚堪液楠無用自初聳激猶弗如人向晚衰遲豈能就列遠隨煙霧固非巢父之掉頭近處雲林願效堯民之鼓腹有恩弗報懷德空慙

夫人謝賀封啓

某啓久違婉範日企芳猷空盈思遠之懷莫致問安之禮緬惟春首聿此陽中無虧冲養之方益協懿和之美今者幸會近忝渥恩得疏南郡之封仍進小君之號適塵溫綽欲奉謝牋猥沐仁慈特賜函翰形褒華而溢幅積感篆以在襟虛涼未獲于瞻依柔德更

祈于保育

文恭集卷三十四



文恭集卷三十五

真州水閘記

夫權以濟事智在利人鄧訓改石臼之河

石臼原本誤作石舊今改改鄧訓傳因理漕

此言改石臼之功難立奏罷其後前史謂有陰德謝傅築新城之埭

後人比之甘棠猶忠利之在時邈今昔而同貫江漢紀于南國設

地險而稱雄舟楫濟乎巨川前民用而為急若乃疏巖險之道貫

利涉之津息肩乎風波之民盡力乎溝洫之義則建安水閘之制

其利溥哉國家神基萬年天宇一統海隅日出具為帝臣域中地

大莫非玉土文軫所薄賦輿攸共自江之南寶藏是出有禹書金

璆之貢兼漢官鹽鐵之利齒角羽毛之所產資糧扉屨之所入固

已府無虛用而國有餘財維迎鑿之奧區乃瀕江之劇郡寶勢橫

野壓楚地之五千大浸稽天吞雲夢之八九南踰五嶺遠浮三湘

西自巴峽之津東泊甌閩之域經塗咸出列壤為雄據會要而觀

來大聚四方之俗操奇貨而遊市號爲萬商之淵淳化中始建外  
臺竝置大使領山海經畫之重督星火期會之嚴九賦斂財日以  
商乎功利萬艘銜尾歲乃實于京師先是水漕之所經頗厭牛犂  
之弗便江形習下河勢居高斗絕一方壁立萬仞每歲木葉秋脫  
天根夕見七澤收潦當涸水之有初萬里連檣自上流而竝至將  
乘高堰之險必俟靈潮之來淺涸貽憂引挽甚苦守卒達旦而不  
寐嚴鼓終夜而有聲人相告勞官不暇給乾興中侍禁陶侯鑑寅  
奉辟命掌臨岸局槃結必剖精幹有餘將剗革于舊方特起發于  
新意按歷長河之曲行營大江之濔經始二閘之謀關白一臺之  
長時制置發運使工部方公仲荀文思使張公綸咸以碩望注于  
上心秉牙籌而籠貨財握金節而宣命令樂聞經畫肇敏成功爰  
駐益于章程旋條析于經費移屬本部調給治具時太守都官曾  
公乾度前倅職方王公汝能咸秉心勤瘁協志贊襄諸賢好謀而  
成眾材不戒而備扼其別浦建爲外閘礪美石以甃其下築疆隄

以禦其衝橫木周施雙柱特起深如睡驪之窟壯若登龍之津引  
方艦而往來隨平潮而上下巨防既閉盤渦內盈珠岸浸而不枯  
犀舟引而無滯用力寢少見功益多卽其北偏別爲內閘鑿河開  
奧制水立防瞰下澤而迴深截澄流而中斷月魄所向潮勢隨大  
上連漕渠平若置梁湍無以悍其激地不能露其險木門呀開羽  
楫飛渡不由舊埭便達中河憧憧斯來沾沾相喜商旅息滯淫之  
歎公私無怵迫之勞歲省之費甚多邦儲之運益辦自天聖紀號  
三年之冬庀徒皆作越明年孟夏僦工大畢材用所給取于城守  
之餘力役所資輟于篙工之暇坏土不奪于穡地秋毫咸出于縣  
官未幾制置二公秉命圭觀曉闕表其功狀刻寫規模由東塗而  
進觀自中宸而簡在復降溫詔獎勸勤略且有天旨申諭郡將飭  
其必緝貽于無窮噫自建隆之元王塗日闢五土反乎正色天下  
號爲重開控于南邦茲爲北道總攬眾職更歷羣公求民之瘼則  
多此川之阻未達豈漢陰抱甕恥用于機心將溱水脫車未周于

病涉承弊達變踵在今乎是標輿地之圖書大事之策作鎮輿壤垂法永年俾神靈而支持與天壤而相弊可矣侍禁陶侯思紀成績昭示方來過聞畫餅之名俾記他山之石重追制置文思之命史君都官之請溫教屢下亟讓弗皇作器能銘遠慚于長筆表年首事始務于直書云天聖五年十一月十七日記

常州興化寺記

晉陵興教院東南距縣三十里圖志脫略了不究創刹之始按沙門從喜所撰石記寺本名南蘭會昌前寺已有之厥後例從詔毀至南唐保大中始復舊額易為禪院廢址僅在遺棟蕩然我之曾門夙植善本往以亂故泊無宦意治財以專施修稼以勤貸糾合鄉義捍固生聚他盜引去茲境賴安一旦出橐中百金聚其族而謀曰方今國步尚擾人道未夷幸而宗門得免亂世吾聞西竺之教利生接物因權顯實使人崇十善持五戒去貪離著尋本究原復一性之真常息萬塗之流競擺落根境超出生滅此神道之極

摯津梁之至妙無生上法雖然成于解行有爲勝業亦以董于種性盍興故刹以勸同開且爲香火之集庶厭金革之難于是上下恭命壯幼畢力卽其故處敞爲蘭若崇門峩峩高殿岌岌齋房環合步廊周旋像設具嚴海會來續煥焉大壯號爲中興國初汎恩詔賜今額自僞唐保大丁未本朝乾興後元甲子凡一周有奇矣年祀寢久咸安厥成風雨所漂弗支其壤金碧漫滅棟梁摧頽有孫曰震于某爲伯父行善持門戶之業深惟堂構之言率籲諸宗議建大殿哀合眾施凡得錢若干萬命寺僧自遷繼巒顯尸其役工未及傷而我伯父奄捐館舍子襄悼先志之不就痛遺恩之罔極虔奉治命誓成夙願有同里湯見素者思植善果樂預能事亦施五百萬錢協齊材瓦復命義園注源二僧關領其事天聖丁卯十二月新殿成觚稜竦峙欄牙開張威鳳欲歧名翬將翔重轅眈眈睥容煌煌左鐘右磬夜梵晨香裝嚴百福鎮茲一方妖子格跪而前曰曾大以來家世樂善寺已絕而崛起殿將壓而勃興宜著

文辭有表後世復援孔攄銘鼎論讓先祖之意辭之弗可因斐然直紀且以詒諸雲礽云

潤州金壇縣清修亭記

縣邑之任有社稷民人之眾兼典刑政令之重春秋齋祠尚于肅朝夕聽斷主于明大率神過用則疲形太勞則殆鄙吝乘間而得入和粹有時而致虧君子防其然也故官寺設宴息之所公日著休澣之令撥去几案依于琴壺宴嘉賓友多聞陶冶情性發舒誠明節適語默之宜均齊誼靜之觀天然則神與境會心將道俱乃可以彊有涯之生應一切之用以之事神治民則有成志而無違心疵吝日銷純白來舍者也濮陽吳君中復端粹而文爲金壇長縣治三茅之左密邇勝秀精氣利澤延施此郊山記所載句金之壇取是紀邑而縣寺湫底承前弗治廳前數棟裁容受署至于委蛇退食之餘則無他齋以息外物患其若此議未從出會民有輒伐叢祠材竹者事發當籍之入官計踰百章足支一構因宜乘利

究奇選勝迺得西偏爽塏之地裁作崇址揭爲新亭繞帶清渠環映碧竹野色在望真想滿前榜之曰清修亭君寶元初登科聞喜宴日上用故事賜第一人以下御詩于時斷章有勛爾在清修之句因摘二字以名其亭且虔上化而服官政亭成不日書至言狀求記乃事欲詒諸後使知命名之自而識置亭之本不止專宴游資賞眺樂禽魚馴閒玩卉樹華滋而已靖恭爾位其有意于大雅者乎君以緒餘風力能舉其政字綴諸岷不翅己子勤恤此職有踰家事退則發舊書曩牘觀前言往行間命僚佐相與觴詠曹無畱事訟源自閉引伸此道奚適而弗裕哉雖一亭一邑之細其規爲思致所存蓋遠矣

高齋記

南中江山類多託賞之美金陵故都緒餘六代華人夏士盛棲此土雖一邱一壑之細皆經高賢名輩嘗所畱連茅許世外之風王謝江表之德山林皋壤號爲名勝子城東北趨鍾山爲近南唐李

氏嘗因城作臺臺上望月人相呼爲月臺下臨濬濠正面覆舟南對長干西望冶城榛煙漁火泉華谷氣山禽川鳥翔嬉其間林木嘯唵之聲雲霞起滅之狀須臾眺聽萬態遞出此名勝之內特又名勝者也臺傾地荒介在人外一境之秀未有眇者康定辛巳之夏龍閣南陽公自三司拜符安輯江介政尚凝簡日多休暇寄意琴酒之適畱好風泉之賞他日因行後圃遂登故城適廢臺畱壞趾躊躇四眇愛歎形勝指言佳麗之觀此最妙處因衰材瓦之羨調兵幹之使塞蕪穢養華薄開逕自下立齋其上環植百柱通敞四軒高侔譙樓廣容宴豆檐宇飛竦勢將干雲旁矚郊垆俯見廬井句曲之地肺華陽之洞壚三峰參差彷彿在目雖進躁之士怵迫之人暨遊其藩一踐茲境其心絳然猶以爲已登崑崙涉閬風澹乎忘歸有超離昏俗之意又況眞粹之流平日隱几反照正性保御太和入境相得其樂如何哉公旣用鐘鼓落其成復須金石記其始比辱來教見命記事曰我作是齋姑欲榜之佳名而絕境

難摹了不可得今采謝宣城宴坐之意直題曰高齋夫齋戒潔之稱休舍之所君子根本于道德拯墊性命利用于安身有餘于治人不役志以營己常虛心以待物其有爲也精義致用以經世務之韞及其無事也恬熙相養以濟天均之和故道用不勤而氣守自若庖丁之奏刀老扁之斲輪顏生之坐忘伊公之強德神機之王繇此物也公抱道混成栖神高映初總機劇未嘗榮華比辭禁奧亦忘欣戚方舍山水之所以穆仁智之性高情遠尚焉可跂耶人之登是齋者當領會公意不止邀樂壺觴取說于林岫而已足使軋者忘其名夸者辭其權長畱清風以遺永年慶曆二年四月十九日記

題湖州西余山靈化寺弄雲亭記

西余山東出吳興城十八里初二山介溪兩傍俱名曰余土人以東西別其稱而西余特著單見于地志焉支水北引注于山下有廢寺十餘棟律徒不窻其宇景祐中沙門寶實聿來尸之崇治僧

坊安集禪侶慶曆壬午予假守在雪客有詫茲山之勝者始欲一  
往仲冬乘雪初霽晏溫少寒因與治中諸僚洎一二禪老刺舟而  
造焉履莓苔捫蘿蔦凡三休甫達于土方蔭長松坐盤石躊躇四  
顧有翛然遐舉之想然猶恨登覽之差晦攀躋之良勞有亟其還  
未盡所適他日再往則天風自戢水波沸揚嚮之荆榛翦而爲徑  
途昔之土石累而爲磴道安行百級遂至于高頂復又瞰山西面  
結宇十楹通清遶間曠之觀坐已實師前請曰山去湖十許里陵  
谷何常之有庸詎知千百年後此山不在湖之中耶盍與之名且  
志其事以遺來者使知創寺之始因以弄雲名其亭亭之妙處予  
能言之下山當其西如蒼龍蟠據勢欲奮挺太湖在其北若元氣  
磅礴浩無津涯洞庭林屋綠毛縹緲諸峰了了在目遠帆參差飛  
鳥凌亂溪雲往還野艇出入百色映見如在鑑中此北眺之勝最  
也夫真妄在心諠靜依觀上智之用不泥于物中人之習迺牽于  
境吾知夫暫登茲山憩茲亭可以無諠無妄惟真惟靜境與心俱

冥神與氣俱生又況長樓巖阿而玩永年者其真粹之樂可涯也  
哉慶曆癸未三月十八日記

常州晉陵縣開渠港記

常領四邑治吳西境晉陵戶二萬丁十萬過江來東列爲大縣其  
土會之法田第九賦第七帛宜絲枲穀宜秔稻美川澤饒魚鱉太  
湖底定其南大江繞出其北閒民無事擅魚采之利以生其生有  
二浸之大而農不能引以灌迹其所以民非棄之顧上謀之未及  
究旅力之不能集爾天時稍或亢縮人心乘以焦窟慶曆辛巳高  
陽許君恢以大理丞治于斯旣視邑事審江湖之利可以活夫田  
也迺歎曰昔西門豹治鄴漳水在鄴旁豹不能用故史起譏之謂  
其不足以言智今茲邑南趣湖北倚江據是美利田其舍諸委而  
弗謀大懼後世之嗤予也因環按四封周咨野老迺得申港戚墅  
竈子三港皆往時溉田之川所溉萬餘頃中間廢不復治緒餘且  
在因倅圖言狀列于外計且曰湖水可以灌戚港江水可以灌申

竈計司移官覆視其利信然比得符文報從所請始籲厥眾開陳以利民飭其言說以承使不戒而廩食具未幾而馨鼓興其集如雲迺奮迺錘自二年冬十月濬申港凡二十八里引潮水抵城之西北隅朝夕再至焉竈子港去申港三十里自江口濬之凡四十二里斜趣縣之東北不與申港合戚墅港東南去縣二十里自湖口濬之凡九十里太湖之舟楫至焉三港之漑申港爲最博繇三大港之側聽民自射其便復引支水分注運瀆東面等十九小港以醜其利長波之所貫眾渠之所殺變培土成腴壤稽于大浸暢于四肢最凡計工二十六萬前後凡三月而罷歲在鶉首秋夏仍旱他田不粒港旁獨稔華黍蕤蕤清渠泱泱耨耨者賴焉網罟者依焉爾牛爾羊來羣來思噫江湖以善利利萬物不私所利至矣哉從于政者猶夫川也據能濟之勢操有爲之資胡利不可興曷害不可去棄而弗營者非力不足由無志于民耳從是而觀高陽之政其惠之所字于民至矣後之長此邑者當監前人之休卹百姓

之欲嗣而浚之繩而廣之使繼繼不絕則三港之利庸可竭乎慶

曆四年正月二十八日記

流杯亭記

城邑之粹依于山川所以通氣象而宣底滯府寺之勝寄于亭沼所以棲神明而外氛濁許昌之右其水曰西湖自東北導潁水一支納于湖中淼漫瀰淪浸可數里精氣利澤秋冬不涸蓋壁田所依之川也一名綠鴨陂唐薛能增廣其泚作亭其上所謂綠鴨亭者名今在焉大抵湖水脩于南北狹于東西芹蘋芡芰菰蒲菡萏之植含葩聳幹或丹或白羅映洲泚粲若繪境秋鷺寒鷗鼓浪往來晨鳧夕鴈乘煙上下翩翩去翼嗶嗶餘聲江湖幽情滿于眺聽天王都汴許在寢內殿藩之重率用二府前弼及兩禁邇臣于以均執恪之勞就偃休之適亦由湖水名勝可以濯煩襟而養妙氣也前後諸公構亭環其上者甚夥釣臺射棚左右樓映隨所面勢咸極佳趣其規摹宏大者有若湖中之堂曰清暑錢思公之所作

也橋跨一面樹環四際青蒼俯映潺湲可弄湖陰之亭曰會景呂  
文靖之所構也正據北岸臨瞰泉水禽魚卉木形無遁者會景之  
北有梅梨桃杏之園履中十畝中有堂曰淨居淨居之北有池曰  
迷魚清泉碧樹幽邃閒靜有山間林下之思慶曆丙戌植直李公  
給事之治許也年獲豐茂日多暇豫間引參佐觴于湖上躊躇四  
顧超然獨得曰湖居之麗前人亦作究奇選勝殆窮目巧然上已  
修禊勝集也念此獨闕濕水在側而弗知用豈未之思耶乃立亭  
于迷魚之後西北置闕巖石作渠析澗上流曲折凡二百步許彎  
環轉激注于亭中爲浮觴樂飲之所東西植雜果前後樹眾卉與  
清暑會景參然互映爲深遠無窮之景焉亭成榜之曰流杯落之  
以鐘鼓車騎夙駕冠蓋大集賢侯蒞止嘉賓就序朱鮪登俎淥醅  
在樽流波不停來觴無算人具醉止莫不華藻篇章間作足以續  
永和之韻矣復卽湖之坤隅乘羨水以作磴紆旅力之弊廣羣游  
之觀使漢陰老父見之其必曰施于觴酌遊觀之美何其佳哉時

友人梅聖俞參畫郎幙且導府意託記亭事因念小雅鹿鳴之詩  
必言燕樂者所以和人心而通政道也李公宣風阜俗怡神樂職  
以餘力治亭榭以暇日飲賓友式宴以樂旣惠且和引而伸之河  
潤九里政之在物從可知焉又惟杭潁二州西偏皆映帶流水同  
得西湖之號與許爲三嘗試評之杭挾武林天竺之秀而地偏東  
南潁占女台林刹之佳而傳舍居其內許在三輔密邇神甸芣騶  
作鎮輶嵩在西介于二京嘗遊七聖春秋重地尊先京師神明氣  
象湖水之勝應以陪京爲首焉慶曆丁亥三月五日記

常州太平興國寺彌陀閣記

昔迦文于舍衛國宣說妙法稱讚四方之佛曰阿彌陀過十萬億  
刹居上品勝上其名曰極樂其壽曰無量以莊嚴爲世界以慈悲  
爲道場六時雨于異花八木涵于奇寶大光普照靈風回翔樹林  
之聲皆演真諦禽鳥之慧悉談苦空含眾妙而叵量狀羣經而莫  
盡斯境也從萬行而報彼國也無三惡之趣婆娑土穢眾生根雜

放逸不返苦惱無安有生老病死之悲有邱陵坑坎之污備造眾  
惡牽蹈諸趣夫境勝則欣歧情苦則疲厭故彌陀如來深愍迷子  
爲現淨土持四十八願拔濟羣品令厭濁惡而欣妙嚴也雖大慈  
平等饒益一切而于閻浮提之人機緣最熱雖復陵遲末劫具縛  
凡夫決能精誠稱誦名號修三十六妙觀臨終之際真相締定乘  
大悲之接引隨喜品而往生境界難思動念卽至眞實佛語四眾  
具聞廣長舌相諸聖同表神者不疾而速豈謂是哉及捨畏塗得  
依樂國普董妙行進登聖果安不退之智地證無生之法忍還入  
三界營救羣迷同嚮菩提成等正覺則知迦文之現穢彌陀之現  
淨調柔折伏同示大權延促依正並歸眞智輔以觀音之慈悲勢  
至之寶猛悲願參運象力總持幽贊咸通其應不一常州太平興  
國寺蕭齊舊刹吳土名藍大江東流夙擅佳麗香海右轉地稱吉  
祥大比邱可尊闡繹圓宗循持梵行神栖安養之境志皈度脫之  
門開幕信根崇修淨業同結生方之社以爲卽實之基上首信士

傅廣門人子蘭與其邑中之良夙殖善本勇結勝因樂聞言音歸  
趣信誓室多忠信之舊戶興禪頌之風而又率籲檀那哀合財施  
飭豫章之峻幹巖他山之密礎選良剖闕究奇塑範營閣于本寺  
正殿之西偏造阿彌陀佛丈六金像居寶蓮花之坐威德殊勝相  
好端嚴鐘梵落成金碧宣照繚素和會幼艾咸集大治純陀之具  
廣施上妙之珍咸苦乃心冀履其域有通淨名之說者相與歎言  
良匠之依空地乃成宮室菩薩之取眾生以淨利土觀殖因于卽  
世知圓果于未來又若祖師何二之有茲閣也始事于慶曆甲子  
成于戊子眾緣所集最凡計泉刀五百萬尊師以宿早參道照託  
序緣興綴文匪工涉教殊淺寶嚴所載聖妙難模雖殫無量之聲  
莫讚甚深之典矧輕毫燥吻所能庶幾哉儻助宣流默祈回向至  
和丙申三月十三日記

皇姪孫右監門率府率世護墓記

夫析天潢之源分玉葉之蔭承雲雨之渥施託日月之末光生于

其間貴莫之上噫既榮以地而嗇之年此造物者不可得而致詰也右監門率府率世護左屯衛大將軍秀州團練使榮國公從信之第五子曾祖吳懿王大父惟忠彰化軍節度使舒國公母富陽郡君孫氏少而聰悟過絕于人所好經書見輒能誦亦工篇詠頗有思致良玉遽折靈芝早焚悲夫以皇祐二年六月八日感疾天闕年十二歲初薨殯于奉先之佛刹嘉祐庚子十月乙酉改葬于河南之永安附懿王之前域謹記

文恭集卷三十五

文恭集卷三十六

志銘

宋故左龍武衛大將軍李公墓志銘

昔在漢火之微焱燄起蜀其後唐土之圯餘烈在南公諱從浦字

可大本名

初謙

與此初謙五代史作從謙

憲宗第八子建王恪之後

南唐烈祖之孫元宗之子後主之貴介弟江左之佳公子也後主

友愛異于他弟開寶中受言奉幣入貢誕節太祖皇帝嘉其占對

厚膺蕃錫迎勞甚渥休舍未遣後主嘗因置酒惻然有勤望之勞

賦青青河畔草一篇章未有王孫歸不歸翠色和春老之句當時

士人莫不傳諷累封宜春吉水二郡王我真人既興歸運有屬臺

城隨下青蓋入侍太祖記使乎之舊寵裸將之敏授右神武大將

軍領漢東郡事未幾夏師繼捧挈河右之圖舉國內屬朝廷授以

崇信節制移公江夏歲滿授代政號連最復拜尺一出典同谷淳

化中蜀盜竊發王師致討郡扼印符之要據汧隴之交羽檄迅召

王人旁午資糧屣履之給文書調度之煩按以軍興急于星火公畢力匪懈內憤小醜操心甚危外防一切劇煩難給瞿爾弗支以疾自陳有詔聽還京師且便醫藥家居滿告表求分務優不之許厚令自持久之進秩武勝軍節度行軍司馬簽書州事固辭簽書從之特賜錢二十萬非例也後病寢劇以至道元年六月癸卯卒于南陽之館舍享年五十公體傑且秀神遠而清幼習自然長蹈彌勝辭有思致書善真行不眩紛華所履恬素少有學尚能談禪要遺去法縛獨與神會用能時進退而兩得履險夷而一致澄撓不見其際纖介莫窺其間目非誠而明之邃于道者孰能預于此享食二藩歷典三郡所至必又去輒見思厥初至同谷郡有重繫獄已告具公察囚色意其有冤呼之使前屏人獨問久乃自言農家子持糧前行暮夜亭長錄以爲盜規贖未獲之負爲決曹掾吳廷皎楚掠因自誣服公徒繫別獄剖驗乃實所全活者十餘輩人以爲神明轉運使盧公之翰鄭公文寶皆偉人也以狀條聞乞加

擢序太宗嘉歎璽書褒勞焉少貴率禮寬中尚恕折獄多陰德典城有遺愛官止環衛年纔中壽知其畱慶自他有裕也後以刑部有著于朝累贈左衛上將軍夫人徐氏桂陽郡公邈之女在江南日以鄖國封小君之號次彭城郡君劉氏亦華腴之選竝先君而亡次虢略郡君楊氏躬柔間之尚後公而終男子七人長仲儀左班殿直仲昕右班殿直仲勛無祿仲某三班借職竝相繼而殞仲偃登進士第以清文雅行士林向慕歷踐省閣參著風業今任尚書刑部郎中淮南轉運使仲連右侍禁仲荀郊社齋郎三女長嫁瑯琊王祐之次三女內寺出家爲尼竝賜紫方袍善才號妙智大師善聰號崇因大師嫁王氏與善聰皆早卒孫男孝友以下九人孝友剡縣尉孝嗣試校書郎公含璧之際權窆于穰之佛寺至咸平己亥仲儀官龍舒始遷窆于瀟之某里介于靈仙道館山谷之間宜體魄之用靈而慶靈之來復銘曰彼公子兮眞李枝初使我兮敏有辭奉裸將兮來京師秩環衛兮屏于隨政寬惠兮眾以熙

三去郡兮輒見思茲有數兮不可知甫知命兮哲其萎德既充兮  
壽弗支來葉茂兮實纍纍滯山秀兮下有溪精氣利澤舒所依三  
祖往兮靈仙樓公眞宅兮介于斯

宋故宣徽北院使奉國軍節度使明州管内觀察處置等使金紫  
光祿大夫檢校太保使持節明州諸軍事明州刺史兼御史大  
夫判并州河東路經略安撫使兼并代澤潞麟府嵐石兵馬都  
部署上柱國滎陽郡開國公食邑二千五百戶食實封三百戶  
贈太尉文肅鄭公墓志銘

皇祐五年冬十一月甲子有宋儒帥宣徽北院使奉國軍節度使  
鄭公薨于并天子震嗟朝不御者二日以太尉贈册告其第大鴻  
臚賻以常典加等官上易名之典請用文肅詔曰嘻可初公以疾  
聞上立遣左璫賜殿中湯藥勅太醫馳視聞其未有聞也復遣高  
手乘急置以往至則無及己公初疾革猶力條備邊十數事謂虜  
驕難制邊費益困勸上詳思至策規強中國因言命在漏刻不復

奉望帷幄不勝至願願歸葬先隴以是累陛下上嘉納遺忠益哀  
傷其意遣使給舸護喪還東勅所過治道詔本郡給葬事以明年  
八月二十八日寔體魂于吳郡大塋之次成公志也公諱戩字天  
休其先諸姬之近封寔內者曰鄭後世爲大姓偉人六世祖肅經  
爲唐相大中末節制荆南子孫宦東僑占吳下今爲吳縣人也曾  
祖諱思正卒烏程長生太父諱延紹終蘇州錄事參軍大父生考  
諱文遂卒溫州巡官舊門自令薄宦不屑慶氣回復繫公而發及  
陪樞幄賁寵三世曾祖贈太子少保配吳氏封太康郡夫人大父  
贈太子太保其配沈氏其繼方氏封吳興京兆二郡太夫人禰室  
累贈太師中書令以廣平郡爲妣沈氏夫人湯沐公少孤穎特骨  
法峻異伯氏載吳士之望器公殊于他弟從學官下尤能自力及  
壯志業磊落不爲諸儒章句通訓詁大義莫不造聖賢之韞屬文  
雅麗學者嚮慕焉遇醉抵西山下亡何暮夜大水失道有父老自  
叢祠中出翼公絕流乃免已而環顧忽失所在久之從淮海遊京

師時翰林楊文公號稱辭宗名有鑒拔篤于獎進故賢士大夫日遊其藩公以縫衣謁前見賞英峙一面若舊許以棟輔延置門下介于諸公歎愛其文謂爲入室公名所以藉甚貴勝先達皆忘年願交者以文公器而揚之也干試貢部輒不在選中處之泰然自待益厚上肇位二年始延見方聞之士擢公甲科釋褐太常寺奉禮郎簽宣德軍節度判官親嫌移宣城故相李文定時守金陵薦公材堪器使秩滿召試學士院除光祿寺丞集賢校理未幾通判越州代還改太子中允同知太常禮院汎恩遷太常丞踰年除三司戶部判官賜緋衣佩魚受詔注釋御製三朝寶訓遷直史館景祐初同修起居注改太常博士繼爲開封府發解官及攷較御試進士與今翰林宋公子京建議禮部所行韻略及廣韻繁簡失當訓詁不正有司攷士多以聲病被黜請修三韻是正音訓書成學者便焉改判鹽鐵句院爲聘契丹使首還以正言知制誥賜紫莫綬時西臺之選極一時名勝故景祐中號令溫雅辭訓深厚者公

豫唱焉層構落成聯章敷請上親用籀法書紫微閣三字以揭詞掖且旌名臣領判國子監以謂教化根本先京師而後諸夏乃選明經義誦說有法者以訓導胄學復乞田以給之又請立學州郡以廣育才五年同知禮部貢舉多拔名輩務略小疵翕然稱爲得人寶元初知審刑院讞天下之獄原心麗法值帝長者多所全活無畱牘前後四被詔獎從容訪對去必曰送自是簡注日隆未幾除起居舍人龍圖閣直學士知開封府豪吏馮士元挾狡數通貴要多爲姦利睚眦必中以禍操制一府畏甚于尹都人目之爲立京兆公廉知罪惡窮按姦賊悉得其受賂撓法之狀權貴多爲請者了不以聽獄具奏流海島家沒償贖首惡既除餘皆股慄註誤及愚弱坐法多見貸舍卽豪右犯法必連治窮按無所顧避而轂下政清康定初高選主計命公權三司使事先是居計席者未暖輒遷不暇講求財策吏治益弛計文寢耗至是四方用武急于調度公檢多門之蠹抉辟召之非勅正簿書參比經人民不加賦未

久得羨縉四百萬轉運使舊有攷課之法廢格不行公請復舊制以振綱領時邊兵六十餘萬坐甲待食軍興期會急于星火公迎事輒辦臨劇益裕上圖公展成之效謂終足負重任斷大事乃拜右諫議大夫同知樞密院事尋改樞密副使舊制二府進律錫予優豐公以甫畢前恩堅辭後賜許之既參前箸之訪所以代謀制勝者甚眾嘗入白虎帳議遣高材使者就問西北諸將攻守所宜使悉條其策謀且探覘其識略能否足辦緩急可任上用其策馬時黠羌擾西縣官肝食一日上召對二府問有唐大臣巡邊故事因言寇難未夷師老勤戍欲煩吾一二舊德往撫西眾因以圖上方略大臣未有對者公自惟布衣主上拔從羣右任以本兵思欲畢力竭忠圖報乃已卽時歸第手疏請行上亟以公疏付中書深爲當國者忌憚卒見沮格明年遂以本官資政殿學士知杭州公出無他了不自直至是過家乃散百金悉召見故人親屬醞牛酒以上冢先是詔謹內盜大籍四方鄉丁申勅部官閱習武技時西

師新喪東人大恐謂將取以戍塞日夕悲涕公檄以諭父老復奏減其半使還田業自是人心甫定郡中西湖卽白傅所記錢塘湖也環三十里漑湖上良田千頃唐相李泌卽湖中作陰竇引水灌城中六井以資汲者武肅置撩清軍以疏其惡自錢氏納土至公居郡凡甲子一週矣而湖穢不治豪奪以耕僧侈其構浸淫蠹食無有已時公按舊記復故隄程工無慮十萬調境內丁夫闢之湖利中興焉二年除給事中移并州未行改鄆州鄆齊等九州安撫使冬移長安兼本路兵馬都部署規中入覲從容言羌寇逋誅陝服寢困宜勅有司計料調緩急差爲三等軍興急須自如法他可緩以期會非急者一切可罷以明恩施上深然之至雍復表西人瘡痍宜在寬卹因是曲爲降赦諸更徭賦斂傷害于下者類皆施行公議以紓民力又奏罷括糴之法誘邊人蓄粟以平穀價吏自渭涉河輸木京師漂沒備償及不中程者至破家產公條冤狀歲裁減二十餘萬是時羌未悔過兵連不解浸軼疆候虔劉邊城天

子覽宣王大雅之詩思召穆中興之將博采文武枚卜公卿進厥  
帥臣付以西略以公有已試之效有納忠之先三年除陝西四路  
緣邊兵馬都部署兼經略安撫招討使遷禮部侍郎受命上道老  
小叩馬至暮不得前因夜半馳去眾復詣闕上書願留時邊將新  
經定川之敗士氣益奪公建上將軍旗鼓盡護諸將合眾軍于涇  
原健銳者訓勵之瘼傷者安息之拊循喚咻人皆自奮元昊擁眾  
黑山號稱十萬公行邊抵鎮戎勒兵趨蓮花堡進據險要天寒置  
酒高會虜不敢近自是軍聲始振邊寇絕人時邊部將利邊境有  
事用公錢亡節緣賂售進收私人已無名之費不啻泥沙公私疲  
勞遠近嗟毒公槌其尤不奉法者斥逐去郡餘稍自戢四年疆事  
稍閒詔公還治長安養持威重雍人若幼若艾重趺數百里拜迎  
車下部中適旱踐境卽雨眾喜曰此涇州雨隨鄭公來也初帥四  
路有生氏帥烏靈率諸帥願奉水邏地入附諸氏亦獻山林願得  
內屬水邏直隴坻之右自石門西出臨洮趨秦中爲近二水環城

而遶帶河渭雜氏十餘萬落無所役屬往時名將自曹武穆等欲  
城其地而不可得至是公遣靜邊成長劉滬觀相形勢滬還勸公  
亟城天贊之機不可失以資賊卽以狀馳奏遣滬往城以從軍董  
士廉尸其役會公移雍涇原帥毀沮其策卽日檄收水邏兵趣使  
罷役滬士廉守便宜不從公爭之甚切上遣三司副使魚周詢宮  
苑使周維德同都轉運使程戡行視利害涇原帥以滬等不應令  
遣將械籠于獄將斬以徇羣氏遮使者車稱冤使者卽時出滬等  
還奏城便詔趣訖之城成賴其保障公復謂環慶涇原二路相去  
道里回遠緩急首尾勢不相救又敏珠彌臧康努三族隔闕其間  
首鼠援賊昔孟獻營武牢而鄭人懼晏弱城東陽而萊子服若城  
細腰奪賊要害遇有警過師猶在廷席之上雜種畏懼亦且不敢  
附賊賊無鄉導必難內侮召部將种世衡將偕程工計日度三月  
罷業已版築會公解帥公度失今不治必開後患志在憂國表上  
其事未幾宣撫范公來西詔下城之如公所策凡斥境數百餘里

是秋戎人詣延帥送款西方益無事五年上書乞守內郡朝廷倚其名重璽書勞勉天王都汴根本兩河晉迫羌胡土俗勁悍大鹵謀帥無易公者六年除戶部侍郎資政殿大學士知并州兼并代澤潞麟府嵐石沿邊經略安撫使兵馬都部署時甲馬隸麾下者凡十二部部將有貴門有寒族所部之兵及所給鎧仗其間精怯不等公慮怯者遇敵勢必先敗敗則牽沮大軍非便于是均配強弱合置十將自往訓勵并無武鋒精兵復閱廂軍精勇者得三千人遷補清邊聲其數爲十萬以夸戎人潛遣戍兵還京師者數萬眾獲休息幾減邊費半吐渾守捍尤力自諸校而下名級閫外得專補署不從臺請庸人建議欲徙補別部公上言士出死力者以有分寸軍賞人情戀本不宜輒動詔趣從舊制澤潞遼絳之賦移餉河北公以瘠土賦不足以自支奏罷外輸以寬四郡帳下吏浮冗者裁損四十餘人以省經費邊將爭遣人覘虜被遣者貪利財物實不能得其要領還卽給言以報虜欲爲寇邊郡承謬至發奔

命書以疑誤上聽已而卒無纖介了不按問公懼習玩啓慢備豫不逮因下令諸覘虜不實者論如軍法自是不敢給報多得實而還契丹之將討夏人也造船于天德軍或曰虜態難常我盍備之公曰虜出無名匈奴本以甲馬戰鬪今爭舟楫之利是棄長技而取所短彼將取敗我馬用虜後契丹果以敗聞二虜之將戰也邊部警奏重迹而至獨太原不發羽書上怪問公狀且詢之策公曰夷狄自相攻討不足煩中國慮願勅邊將務在持重而已麟府熱落經寇驅率略盡公招還離散撫綏荒餘益弓箭五千浮二萬戶以實塞下空虛之地以耕河上良腴之田以口益增歲糴彌賤尙嵐軍東草城川近壓虜境隋大業中置戍以扼賊衝虜貪地肥間出田牧公與約地距塞二十里內虜不得預徙實邊雜戶數萬家以爲扞蔽中國限戎本以豐之橫陽川爲限豐州沒後城主失戍元昊旣已送款因遣人請沒寧浪地公上言麟府孤立介在河外若以美地資賊二州乃墮其吻終爲吞噬臺議遂不肯與戎人請

之益堅復因使者附奏具道不可與地狀卒用策論還西人公治尚嚴明天性疾惡并土年少喜伺姦使公設耳目知其主名窟穴犯者輒錄窮按株連自是姦盜衰息在杭雍亦然惡子皆逃之他境狂卒以甘陵叛訛言寇且至晉人乘之洵懼推迹所起乃定襄男子爲之因戮以徇遠近帖息壽陽豪李化殺人誣郭鸞以規免鸞不勝楚掠因自誣服公察非是詰化化詞大屈鞫之具得其賕買真狀化卒棄市邊地寒苦囚多噤死于獄公奏條元魏恤獄故事上惻然降詔自是繫者涉冬多活鐵錢惟輸關右後河東亦施其法晉地產鐵人爭冒鑄犯者殊死日報而姦不止公論作法之弊請用三當一以消姦源上選近臣通政事者參議經久咸是公議改幣令下姦人不說羣訴公所守卒不納有噪于牙門者公坐黃堂使前諭以幣輕物貴盜鑄多死朝廷所以改幣使重禁民爲非者正是全活汝輩何乃敢拒明詔因執渠魁不率教者致之于理是日閭巷無賴者輒掠奪市物公勅牙兵收捕竄首惡十餘輩

自是姦鑄遂息物價益賤于今受其賜秋冬閱材官鄉義二十餘萬號令明賞罰信旌旗鉦鼓風行電照故太原遂爲天下勁兵之首苛慝不作威名播越朝廷以公威名累稔底定有勞七年除吏部侍郎未幾拜宣徽北院使檢校太保仍判并州事公表陳孤生感會明主倉卒之際謬奉馳驅幸賴國家之靈邊隅訖定兵官猶可併省微職不宜外除固辭殊章願守閒郡優詔不之許天子以公忠力外宣功效尤著明年就拜奉國軍節度使復表陳前志自言衰疾不任軍事願還節制手疏懇到卒不得謝久之寢劇以至薨落年六十二士大夫多爲流涕公外濟以和內果于斷倜儻以尚風誼慷慨而好功名精力過絕于人英詞鼓動于物尹都府幹大計二職竝劇萬事倚辦老吏持案待決訟者操契滿前准量錙銖判別臯白神無滯用機應不差旁接談賓行答尺牘毫法俊健書意婉文理盡親疏體甚閒暇參以善謔杳然虛舟前史稱發百函占十吏殆無以過也有一善旣稱道之不舍又申以獎拔故出


門下者多臺閣名彥貧賤有舊接之者驩然有恩爲振其乏在宛陵收葬故人孫漢經恤其孤楊文公高直忤時天禧間愈不得志及卒賓客益落公病方困吳郡日夕馳走赴其葬義士躋之伯氏吏部代還左蜀病卒岐下公時在西省請急赴喪大感于行路及在軍中士有疾病行自省恤軍市之入厚于犒軍下伍有勞多見拔用纖微坐法闕略不問故眾莫不思奮焉嘗讀兵書至謀攻篇善用兵者屈人之兵而非戰也因歎曰上兵節制要在靜勝故每檄諸將常以堅重待敵終能制戎羯安邊境者繇此策也惜其在樞宥日淺謀謨未究服勞于外益徙而北不得推所蘊于天下每處邊議多蒙報可前後詔書褒寵凡十八至焉奉公憂國遭時得君若天假之年授柄以相其老謀遠業猶將安生民強公室烏肯管晏而休耶公撰著文章凡五集曰制誥原武紫溪長安太原總五十卷才高而兼華實文雄而有氣骨蓋人倫之華袞而材林之傑藻也攻詩出于餘力尤極清麗與故翰林葉道卿夙期相許心

照莫逆篇章酬寄別爲一集以訂元白云道卿出守河陽自太原寄詩四十韻以將篤好葉復次韻以答詩成未幾物故世傳名句絕麟于此公聞河陽之訃慟哭不食者數日力疾捉筆以銘道卿之墓纔百餘日相繼薨殞同時葬于吳下神反郢質近時少比范張款款復存今日夫人李氏贈都官員外郎昌言之女賢有至行生于名門協濟高明參穆丙外累封丹陽郡夫人男子五人民彝民初民秀民慶民用並太常寺丞太祝咸有學尚兼資才令六孫估侑佻倜億億皆祕書省校書郎二女長適三司鹽鐵判官太常丞直集賢院王珪次未嫁上錄其家若子若孫及別族者凡十人及諸婦班簪鑲者八人賜晉陵廡舍一區以郡幹給使公九歲卽失怙恃念及泣然常欲以感慈之名置寺塋側未及請而薨家丞緣雅意以聞詔賜之榜且有別旨間歲度苾芻一人以虔香火忠義獲寵哀榮異常如公者鮮焉臨薨語家人見託銘墓左右或泣下公諭以至數勅勿悲神明若茲公爲不亡矣宿疇昔周旋平生

獎勛見評州里預游藩牆契闊限于死生頽仰成于今古緒言有  
屬感涕無從輒稽宗譜之傳與夫官簿之實寄通如在傳信無窮  
銘曰次舍之精歲昴著明東南之鎮秦稽蓄靈巖巖文肅王佐之  
英精明卓傑降神及星惟天右民付畀間氣帝初器之使材諸位  
曰訓曰謨以經以緯尹茲都畿相我邦計萬事倚成三邊仰濟名  
赫厥聞功昭于試若時用武惟密本兵選眾以舉好謀而成憂勞  
西歎感慨請行見排異己實貫神明忠圖未究讒言其興屏毗于  
外允一乃成前疏未乾上眷攸注卒帥于西授以節度宣明國威  
剷除民蠹生氏奉圖析肝願附水邏往城細腰白戍我闢我疆之  
策之慮上繫睿明弗爲讒沮荒憬尋柔壘垣增固復來長安益從  
太原厥戎孔邇其武惟桓臨御以重拊循則寬悉復棄地大徙實  
邊歲有高廩時無姦錢長城屹若敵國隱然惟時念功節旄卽授  
告于文人桓鬯一卣曾是偉賢胡不大壽奄忽棄藩弗究其有晉  
人涕洟用懷孔疚如蒼生何公亡于牖公雖云亡名不得朽雲棲

迷兮大鹵水幽咽兮昌門從先公之舊兆啓茂苑之鮮原穆將安  
兮眞宅些歸來兮英魂慨梁木之其壞感華屋之生存武邱兮北  
峙凝嵐兮夕昏嗚呼雄俊儒帥鄭公之墳

文恭集卷三十六



文恭集卷三十七

志銘

宋故奉直郎守侍御史王公墓志銘

慶曆乙酉上用太原王公為侍御史數進方幅切劘庶政又明年  
以天禧故事參領諫職臺中雜細一不復省顯繩違納輔而已公  
強學精志多識前載孝武時兒寬以經學進建武中杜林以名德  
用公膺時學其殆幾乎九月十三日對延和殿敷敘未究疾作遽  
退明日卒于家治命葬于穎上聞蠶然傷之法賻有加復錄其子  
向為三班借職且曰使有祿以養其母恩從特出例前不著葬有  
日矣諸孤條官闕世譜託銘于學史者且云友也義不得辭公諱  
平字保衡五世祖唐末避地自徙居閩之侯官王審知之據郡也  
會大父隱晦弗仕常署大父為安遠使已而謝去考諱居政以行  
義稱于州里娶姚氏早亡繼室以陳氏及公有位于朝陪祀延漏  
禰室官至祕書丞以昭德仁壽二號為繼姚封邑之寵公生而穎

文集三十七  
特少擬淳至十二歲丁昭德之喪號慕焦毀不能自存大父敦譬益更感絕後與從弟甲同研席相友愛久之游學不利春官試還客江淮間所至交其士大夫之賢者好自整飭不妄舉動強于記問有制度之學經史汎達誦說有法好學者日至其館從授大義諸生奉幣爲謝初不之卻痛節游費還資養具章聖後元年以同進士出身授許州司理參軍里中女乘驢單行盜殺諸田間褫其衣而去驢逸田旁家收繫之覺吏捕得驢指爲殺女子者訊之四旬田旁家認收繫其驢實不殺女子公意疑甚以狀白府州將老吏素強了不之聽趨令具獄公持益堅彼乃怒曰掾懦耶公曰今觸奏坐懦不過一免耳與其阿旨以殺無辜又陷公于不義較其輕重孰爲愈耶州將因不能奪後數日河南移逃卒至許核之乃實殺女子者田旁家得活後因眾見州將謝曰微司理曷幾誤殺人再爲臨安扶溝二主簿翰林徐公爽治京府薦其材除開封府法曹參軍董希顏爲推官持法喜深公處以正與之背戾滿歲當

遷故事闔府保任希顏持奏不署或諷公往謝公曰脫遇知我安用謝爲如其不知謝適取辱使謝而署奏交有所喪希顏聞之慚索奏亟署尋除祕書省著作佐郎在職如故初府掾任京司者見尹廷謁未幾汎恩諸掾悉遷朝秩公除祕書丞同府掾佞尹拜謁廷下公以朝有定著引他掾羅拜堂上識者謂其有體尹後奏罷諸掾有朝籍者出知洪州分甯縣士多強宗大姓前宰以嫌不之按公無間然雖賓興未預皆以禮迎見至其家負法雖細弗貸用是眾服焉就遷太常博士入爲審刑詳議官操憲甚均持心近厚景祐四年冬地震于晉忻城壞人多壓死公上書推災異之變大抵言陰宜靜而反動今失其性四夷之于中國陰也戎狄將有搖叛乎宜勅邊將豫嚴兵備歲中蠻寇宜桂二州殺守將河西外叛元昊入寇契丹乘間以重兵壓境上求三關故地爲言誓外增物僅乃得止如公之疏云除尚書屯田員外郎通判徐州未行丁祕書君憂免喪還臺會中執建議諸七十在官一切致仕之法公以

謂古者養老所以納民于忠厚今士大夫雖不能據禮引去從而斥辱殆非所以爲國養恩之道奏養老頌諷焉不省出通判荆南府遷都官員外郎守臣操政多任便宜公據法不從以嚴見憚朝廷高選憲屬于是有臺端之召初石元孫延州兵敗傳云已死縣官舉贈典錄諸孤已而西人請成歸元孫于我議者責其不死節請戮以厲後公上言西戎比年犯塞將校覆歿幾何甫歸元孫隨而見戮是堅降者之志而絕內顧之望非計之便元孫卒得不誅監察御史閻詢治王素獄讒者言詢與素姻家匿不自避疑其姦上立黜詢詢惶懼不敢辯獨公奏言詢妻弟娶素從女耳論情則至疏在法不當避業已黜詢莅河陽酒局然尋起通判隴州公議論務大體略碎煩所彈應法嘗乘間爲上言人情不能無過且宜開略細微問諸忠義何如耳上深納之數條白邊關利害及摘財賦之蠹他日宰相擇專對者往迓敵使公不在選中上卻奏曰王某識敵態敏且辯胡爲弗遣遂命爲接伴使還言河北春月猶習

土兵違時妨耕可趨其會自是鄉兵閱習以兩月爲限斷盡冬須罷除三司戶部判官尋充契丹國信使至幽州敵方蒐兵試戰聲言伐夏遣其相蕭忠孝來云元昊侵侮敝邑敢以告諸使唯唯公遽曰南北盟好歡固踰于金石何讓之能間且治兵有國常事脫吾邊鄙討貳庸可間乎忠孝旣退公之介曰彼妄誕非其主意公曰不然及見戎王面論伐夏事略與忠孝語同公拾前對對之戎王喜規中還奏題其所答廣親邸災公坐省曹案領修造有詔營繕令主督作廣親秦悼王邸也年祀浸久支庶彌廣無容室處至爲樓居上患其然方議益邸會其火因度取邸旁民家地以廣其宮說勸工徒省約用費有以舊例送錢者公拒而弗納尋代賈漸知諫事延和之對辭解宮役曰臣愚爲修造有司今爲諫御史護役于體非是上曰宮役垂訖煩卿旬日事耳公病語不及究猶力疾自退還于牖下以至于啓手足享年六十三公介而敏造次必于儒雅論議依于名節與朋友信于閨門孝從弟甲後登進士第

與今資政范公同年生也調澧州司理參軍病卒于京師公哀慕  
收斂不啻同產范公高其義往弔之復以同年齒爲之拜雅爲故  
集賢殿修撰曾公會所器妻之愛女賢善柔閒經是二物以金華  
爲湯沐邑男五人回岡向同問家子學有家法行爲士範諸子咸  
保家之令志局叵量一女嫁光祿寺丞陳臻古以皇祐己丑八月  
十二日葬于汝陰之旌義新安里辱公最舊舍我先逝惜其疏遠  
孤進晚始得供奉諫諍素所蓄積曾宣濟之未暇一旦奄忽其命  
也夫銘曰公嘗游兮穎之湄愛穎水兮清且漪壯有氣兮陵虹霓  
冠岌業兮佩陸離挾時策兮步來西思綠髮兮殫所施命與力兮  
不可支與一御史兮衰且遲驥將騁兮蹶之年不與兮已而望閭  
樹兮東南涯貧不資兮葬不得歸循故穎兮水依依丹旒舉兮秋  
風吹匪良友兮我孰思有賢子兮君勿悲尚逝者兮有知靈體魄  
兮于斯

故尚書都官員外郎丁公墓志銘

至和甲午六月二十四日尚書都官員外郎濟陽丁公卒于京師  
之朝集院年五十四位不配德論者傷之君諱某字元規其先齊  
公伋之後于姓爲著中葉遷播徙貫于晉陵曾大父匿景大父衡  
泌考諱某與同產兄力學比于試于貢部以不得志先兄而卒平  
生友愛鄉論佳焉娶清河張氏其外女兄也賢善爲族嫻所美生  
二子長卽都官其後令終考追贈尚書屯田員外郎以仙游爲母  
湯沐君幼喪父羣穉見之踈然改觀及長與兄某俱有才名學者  
稱二丁焉母疾刲股肉以進孝行聞于閭里弱冠而孤侍世父尤  
謹明道中與仲氏比牒充賦明年建元景祐春當試于禮部會予  
爲大宗伯所辟預典試事以親嫌移之別屬二惠俱在選中是年  
同登乙科里門榮之釋褐甘州軍事判官郡通河西城惡且甚獻  
議州將計功治之凡期年而役已未幾夏人果叛岷大擾城完而  
固眾以不恐河出州境歲苦災潦營石堤以捍二者州人賴之鄜  
城宿兵悍吏猶轉運段公檄使莅劇邑中大治再調楚州團練判

官發運使吏部蔣公舉監淮岸局督是漕事秩滿遷祕書省著作  
佐郎知江寧府句容縣幼艾懷其惠老姦憚其明府檄苛求一不  
之聽徙知雅州名山以勞免行遷祕書丞三司舉知舒州太湖縣  
兼權茶禁舊制歲市茶八十萬受上賞前此居邑者淫刑取辦賂  
民售進積苦甚虐舒人無懼君卽歲減三十萬或以爲不可歎曰  
吾寧坐不速之罰安能邀賂民之賞乎自是無暴征無滯積公私  
兩便爲諸邑之最考課遷太常寺博士汎恩除尚書屯田員外郎  
在官五年代還進秩中都通判定州暴中風眩以至含璧君履行  
修敕性資冲厚犯而不校介而能通行己本于信誠治民先于愛  
利未究中壽僅得臺郎報施難原此古人致論于力命也君娶廣  
平程氏胙脂田于安吉柔閒維則以經二紀天死邁閔未亾在痛  
三子曰某曰某曰某世其家學休有鄉譽滋而後大庸或在斯女  
三人長適進士孫詔餘在室孫男一女一皆幼哀號奉其柩歸攢  
諸室參議真宅武進縣懷德鄉薛村原之地命龜曰吉以季冬丙

申寧體魄于茲厥初其孤來赴以葬咨予內屬銘其前人惟疇昔  
之晤言慨頰仰之陳迹且稽遺範以志幽達銘曰篤哉斯士履德  
恂恂氣冲神茂行安節純忘生徇孝紆患庇民宜餉以福尚永其  
身曾是短曆殲此良人爰啓新阡四郊之側言駕輶車來寧兆域  
脩夜弗陽嚴冬將夕寒日無光陰雲寡色永訣千秋齋咨篆德深  
谷有遷茲石未泐


故朝散大夫太常少卿致任李公墓志銘


宋有清德美行之君子曰李公至和元年以七兵郎中典吳郡治  
成辭疾詔以本官分司南京聽家武進吳人飲公和政去有遺戀  
後四年告老除太常少卿致仕以嘉祐戊戌十月二十二日考終  
命于牖下斂以時服家無餘帛素絲壹節嗚呼清哉于時搢紳先  
生相與流涕痛夫若人之不見已公諱仲偃字晉卿李系隴西曾  
祖昇祖璟竝爲江南國主考從浦右龍武大將軍公第三子也生  
而警異幼卽藐孤伯氏仲儀撫養甚篤及長挾策無流志落筆有

奇語弱冠厲節游學知名故翰林梁公顥文定趙公尚書咸器其  
才行召置門下所與游者皆當世知名之士天骨秀爽神情閒遠  
見之者目爲神仙中人祥符中再舉貢都高等八年得進士丙科  
調楚州寶應尉邑多無賴少年喜爲人害前此吏不能禁公至則  
痛繩以法惡子相率改行治以大肅郡守黃宗旦薦其材秩滿授  
常州團練推官未幾丁內艱服除改澧州軍事推官知蘄州蘄春  
縣兼監洗馬茶場從三司之舉也會議茶變法商賈輟行踰期不  
得代書任者四期及還攷課復不應書大理寺舉充詳斷官除本  
寺丞然非其志也先是廷尉丞屬多取經生泥于執文不暢法意  
惟公儒者常得中典時丞相陳公以綱錯領判尤加賞待凡有疑  
讞諮以取正稍遷殿中丞范公密遣論意且欲薦之臺職公以索  
米爲解亟辭不願出知越州會稽縣風政修舉爲諸邑最秩滿除  
尚書屯田員外郎通判台州近臣有薦公才堪治劇中御史者初  
除都官員外郎用知真州未幾召拜侍御史時三院徑路官進者

最稱要捷營此職者多稱道地公屢表衰疾乞郡自障遷秩司封  
除淮南提點刑獄司夷退無競議者嘉焉入爲三司度支判官尋  
除兩浙轉運使賜紫章服居部識大體總綱目應書卽舉遇事敢  
行不爲細苛靡尚曠覈除工部郎中代還判三司度支句院假太  
常少卿直昭文館充契丹國信使還除刑部郎中淮南轉運使翰  
林金華諸公薦公有經術行義當置在左右不宜外遷上覽奏謂  
執政臣朕固聞其名有意且召用之丞相以德行對但年已七十  
惟陛下裁擇上默然章請置第移蘇州以便鄉閭自初筮以至挂  
冠其間四十年所得俸祿多給族中之貧者嫁娶孤遺凡十許人  
篤風義重然諾未嘗殖產治第有田栽一二十廬謝事後稅止官  
舍泊如也平生藏書萬餘卷皆親加校正多手鈔者日置齋中閱  
古今治亂退閒賓客文酒不廢雖晚生候謁恂恂誘接忘德爵之  
在已前後推轂拔取寒畯無慮四百人有至臺省者文集十卷祥  
符初瑞物仍降時文載郁諸所著撰華實兼映詩筆清婉殊有思

致才焉蓋貴仕德焉蓋高爵終歿少列豈命也夫享年七十七公  
之配曰楊氏文定趙公甥也賢和作合湯沐原武冢子孝嗣秀州  
崇德令次子孝直試校書郎女六人長適祕書丞陳操次進士許  
佺期次大理寺丞黃秉次三班借職靳渭次光祿寺丞周延年次  
長洲尉富翽孫元規太廟齋郎孫女三人尚幼以嘉祐己亥十一  
月二十三日葬常州武進縣安善鄉合命里字書無命字疑  
修字之誤音託初  
冢子以月日來赴家老以閱閱見屬宿于公義則師友情同州壤  
銘竈之事所以不敢辭且史官以實紀銘曰李白開寶言朝于京  
中間踣斃凋落弗榮及公穎特秀世而生仙風遠韻人莫不傾彬  
彬其章儀我王國榮利匪懷比辭憲職不耀厥文有隱其德夸者  
退慚談者歎息金華薦論上稔公間奈如命何乃以老云遂巡逝  
水奄忽浮雲天道力命幽遠難分真宅用靈輅車言引治命有詒  
先慈惟近背高城之夕陰遡寒郊之悽緊些營魄以安之哀風流  
兮頓盡





文恭集卷三十八

志銘

宋故朝散大夫尚書工部郎中充天章閣待制兼集賢殿修撰知  
越州兼管內隄堰橋道勸農使提點銀場公事充兩浙東路屯  
駐駐泊兵馬鈐轄温台明越衢婺處州等諸州軍并都同巡檢  
兵甲賊盜公事護國軍清河縣開國男食邑三百戶賜紫金魚  
袋贈工部侍郎張公墓志銘

嘉祐二年春天章閣待制兼集賢殿修撰張公以靜退之性勞侍  
從之事聞東南佳山水而會稽第一章請自效詔俞其往在郡三  
歲政清民恬方且合符歸奏計于天子無何暴疾以己亥七月丙  
辰卒于州廨之寢郡邸奏公計仁宗盡然傷之亟命錄諸孤賻其  
家所以惻近待恤師臣之後焉嗣子奉公喪還京師權窆城南園  
舍放卜龜策得癸卯十月丁酉之吉葬河南之登封從丞相文懿  
公瑩治命也公諱友直字清卿晚更字曰益之其先世系翰林葉

公撰文懿公志刻詳矣曾祖裕試金吾衛長史莅陰城監院乾德中榜陰城爲軍今光化是也遂占籍焉大父廷節養素隱德爲鄉丈人及文懿公貴並累贈太師中書令兼尚書令封楚齊二國公曾王妣胡氏追封燕國太夫人祖妣趙氏兩龐氏李氏追封魏韓魯越四國太夫人禰廟士遜開府儀同三司守太傅鄧國公致仕薨贈太師中書令兼尚書令諡文懿公王妣蔣氏黃氏封鄧鄧三國太夫人馮氏許國夫人公文懿公之長子母曰黃夫人公生而骨法奇峻體性和厚少有學尚尤修志介文懿公任壽春郡王友友直七歲以蔭補太廟齋郎非所好尋除守將作監主簿三遷監丞館閣讀書再授詔編三館書籍天聖中以本官充祕閣校理同知太常禮院明道初特賜進士出身遷祕書郎文懿當軸自以丞相子避遠權勢出通判蔡州歲餘移倅鄭下時文惠陳公以碩老鎮圃田屬公以州事公以悉心無所遺力及文惠入相薦公于朝直史館遷太常博士同管句國子監事康定初充三司鹽鐵判官

改判都磨勘司慶曆初除尚書祠部員外郎知襄州甫至郡而張海賊起且壓境上公治州兵募丁壯得敢勇願行者數百輩令邀擊穀城多斬首級賊潰去後爲比郡禽剪首挫銳氣繫公之力丁內艱去郡褫服除舊官與職歷判戶部鹽鐵二句院遷刑部員外郎史館修撰文懿公薨釋服除刑部仍前修撰嘗感蔣氏妣恤典未及表讓史職移慰先慈從之詔以郎爲太夫人封國上以捐己爲美仍換公集賢殿修撰成美志也糾察在京刑獄改判尚書刑部嘗與侍講學士錢象先奏事便殿已而上目送公謂象先日張友直占對容止宛如其父其見賞待如此以先公冢舍甫就表碣未立章累上求便郡出知鄧州入辭之日仁宗遣中使至第以舊德之碑四字篆文懿公神道又賜公御書飛白及鳳茶以將其意眷焉南陽民饑捐瘠者眾官有儲麥轉運使以便文自營而不知恤公發廩以救多所全活還朝除天章閣待制修撰如故尋出知陝州代還侍宴于集英殿公坐侍臣猶衣五品服仁宗見之愕然

遽命取三品服即御前以賜公拜手謝殿上觀者榮之至是出知  
會稽越俗奉竺乾法為龍華每歲又大祭天于塔廟僧俗士女雜  
然並會施金帛者趨走之惟恐其後公不教一切禁止舉籍羨數  
入學談者避之卒時年五十八至今會稽父老猶懷其清公莊重  
介直濟之以和明道寶元之間文懿公三人相進退天下士公時  
在子舍應接賓友談間未嘗及時事雖密昵屬不敢委以私無他  
恩紀故譽亦鮮焉惟雅識者重其潔慎文懿既上相印告老于家  
公晨夕侍旁將順顏色孝性謹如也家人入息乃敢寢焉文懿公  
薨時年過八十公哀毀骨立生平薦任子弟必先疏屬及其亾也  
幼子未有官公精小學能篆籀楷法尤好篇詠得美書善善本必  
手自傳寫色無倦焉仁宗在東宮起居語默文懿公必疏記之祕  
世未有知者及薨公類以成篇自之曰資善錄出南陽日從容面  
獻之上甚說詔藏諸太史氏有文集十卷公娶劉氏度支郎中明  
恕之女柔慈賢善凝範六嫔封宜陽縣君嘉祐明堂以子在朝著

進封長壽縣太君贈公工部侍郎子八人德淳尚書屯田員外郎  
德潤內殿承制德源大理寺丞德温大理評事德演太常寺太祝  
三子早喪女十二人長適起居舍人知諫院呂誨而亾次刑部郎  
中集賢殿修撰陸誥未嫁而卒次適司封員外郎梅清臣次適太  
常寺太祝王端臣次適宋彭年三人天亾四在室公之將葬冢子  
以日月來赴且求銘于石宿雅出門下復與公游冊府以茲分義  
誠不可讓文斐無次今但直記其實云銘曰巖巖鄧公俊德之雄  
三陟台袞告老顯終有哲者嗣時惟冢子雅行敦修端誠率履炎  
炎相閣赫赫洪鑪視權弗有處勢若無和而匪流介然弗倚四臨  
厥藩其清如水年塗才半志力尚強曷云與善乃爾殲良履鼎原  
兮開阡面松峰兮靈體陪真宅于先公尚慶靈之彌啓  
宋翰林侍讀學士朝請大夫尚書右丞提舉萬壽觀公事句當三  
班院上柱國隴西郡開國公食邑二千五百戶食實封六百戶  
賜紫金魚袋禮部尚書諡恪李公墓志銘

嘉祐己亥冬十月上將裕享太廟前三日庚午齋于大慶殿翰林侍讀學士尚書右丞李公入侍帷幄次屬疾大困有詔易人侍祠告許還家治疾乃輿歸崇慶坊之舊第翼日上命謁者臨問復馳賜湯劑聞其未平也又敕中使太醫往視既而寢劇癸未卒于正寢計聞上恫悼之命內史納書以禮部尚書告其第法賻加等公諱昭述字仲祖其先鎮陽人也曾祖沼國子毛詩博士贈太子太師祖昉太宗朝宰相司空致仕薨諡文正累贈太師尚書令韓國公考宗諱章聖時翰林學士累贈太尉並國史有傳公第二子也幼而風性機警神清穎秀文正公常以吾家寶器目之居母清河郡太君張氏喪刺血寫佛經毀過成人年十五能屬辭學通志立太尉屢欲任之官比辭不就移讓近屬卒被敦迫起家守祕書省校書郎其侍親也孝于承順省視飲食起居無不適其意者典幹家事大小皆有倫脊丁太尉憂號瘠在疚恩例改太常寺太祝服除召試學士院賜進士出身監內香藥庫嘗奏局事進對詳敏真

宗目送之既而謂左右曰積善之家固有餘慶遷光祿寺丞薦充刑部詳覆官秩滿除祕書省著作佐郎通判越州遷祕書丞樞密使曹利用薦其材召為羣牧判官汝人隱障牧地吏不能究受詔按視舉籍鈎校凡括實數千頃時議伏其精遷太常博士知開封府開封縣未幾遷屯田員外郎為本府推官坐舉將曹利用被譴出知常州治稱仁平稍遷都官員外郎入為三司度支判官上言五事朝廷嘉獎充契丹國信使再遷封汎恩除工部郎中出為荆湖北路轉運使荆南屯禁卒譁言倉粟腐不堪食公命掌廩者給為己俸因會客日試取作飯舉匕而盡曰孰謂不可食耶譁者遂息范諷貶武昌公素厚善以嫌移湖南路虎翼戍卒長沙監軍遇之酷一軍憤欲搆亂或指公廨舍曰奈李公何我不可以負長者事遂寢公聞然猶未信因戒監軍不復敢暴他日還都其眾遮道羅拜指妻子曰向非公無噍類矣因感泣而去還朝除淮南轉運使兼發運事直史館賜紫章服奏計京師以漕職修舉移陝西轉

運使邊柝久弛元昊以夏臺叛至是增屯戎馬五倍于前上慮邊  
餉不支遣近璫問狀公潛計度以必辦對畫則與賓客談宴閒泰  
如平時暮夜立吏于前口占以策黎明移文盡出兵食乃集移河  
北轉運使觀日上諭其勞畱糾察在京刑獄尋除三司戶部副使  
受詔經制陝西糧草因以安集土兵還爲鹽鐵副使嘗乘間奏事  
疏笏爲記之屢目之公摺笏以對條奏益詳除諫議大夫河北都  
轉運使至澶淵值河決斷浮航具舟欲濟而風甚公禱于河風息  
遽濟至北岸而風復作後嗣皆不得渡未幾契丹非次馳書遣劉  
六符來使朝議懲澶壁之惡公受旨以完隄爲名選將吏調兵農  
入萬城之踰旬而畢初戎使之過澶也第且治隄及還覩雉堞城  
守之具頗備甚駭愕初詔置義勇人情訥懼公乘疾置日行十舍  
所至開諭父老置軍之意卒置義勇如詔書焉安平有文正公膏  
腴上產歲租入簿深守按鄉原租例索主者質劑歲願附益二十  
萬錢公辭之曰租乃大門所定脫有遺利義不敢受郊吏獻計減

保塞軍濫食公重于裁損遂弗納及公移澶後保塞軍亂如公所  
慮焉宣撫使任中師表治行詔書嘉獎除龍圖閣直學士移知澶  
州遷給事中代還領三班院秦州言糧道且乏不足支數月除公  
樞密直學士陝西都轉運使至卽開入粟之策發輶車之運塞下  
實焉尋及近藩未報無何掘地得古銅符文曰許昌詔下治許郡  
中西湖名勝引爲曲水日與參佐觴詠亭下餘力治磴迄今賴焉  
期歲移亳州河北四鎮初置安撫以公充使領眞定路兵馬都部  
署之職知成德軍歲饑籍僧廩羨粟萬斛官作淖糜以救所全活  
者甚眾武衛悍卒以爲盜城中恐懼公密遣帳下十卒翦戮之信  
宿被遣者梟六首而至自是將屯肅然無敢逸者西山聚盜肆害  
累稔下教諭以禍福未幾以罪自歸除尚書工部侍郎龍圖閣學  
士充秦鳳路兵馬都部署經略安撫使未行詔再任成德其後秦  
中關帥范祥城古渭戎落大駭議者謂公若在秦決不生事擾邊  
遷刑部侍郎還朝領三班院會置三輔除翰林侍讀學士知鄭州

是年秋歸侍適英閣知通進銀臺兼門下封駁事判太常寺兼禮  
儀事提舉萬壽觀領三班院再遷兵部侍郎尚書右丞至卒年九  
十九夫人曹氏故楚王彬之孫贈中書令璨之女賢明令淑以經  
內外湯沐鉅鹿爲夫人之封先六月而逝息男六冢子正卿卒大  
理寺丞直卿左班殿直宜卿尚書職方員外郎上卿殿中丞二子  
幼亾巨卿未仕益卿守祕書省正字息女二長適文思使任昱次  
適東上閣門使張希一十孫士彥士方士立士燮並太常寺太祝  
士亨士衷士衮士稟士肅並將作監士簿士恣未仕公夷粹開敏  
外寬中勁怒而不校和而不流生于貴勝恂恂如也朝廷儀範事  
典多所該識家世七葉纒無異煙門內之治有規治尚仁恩休澣  
宴集昆弟姪在焉必以孝弟學行從容勸導未嘗言及資產清素  
孝謹爲舊族之冠嘗言我家三世學士論者以爲美談吾歿後汝  
等勉之無隳素業性有巧思精于曲藝通音律善奕棊家有名園  
尤善種樹珍叢嘉植周阿而生親朋之來罇酒相對歌詩筆翰自

守家法不爲時變有文集二十卷領使凡七臨州者六識大體略  
細苛不以皦覈取名主于忠厚而已薦引多拔寒畯往往不識其  
面推轂數百訖無謬舉之累豈非誠歟族黨治喪墨龜以告卜明  
年正月七日惟食舉鉅鹿夫人柩合葬于河南府河南縣諸葛村  
之原耐太尉之塋兆于昭位家丞以世系官次請銘于石宿辱公  
之舊得據其實銘曰李之根系成紀姑臧滋而後東趙郡贊皇益  
從而北厥惟鎮陽日西者李仍世其昌有覺賢公時惟文正相我  
太宗光明熙盛英英翰林風華是映器于真宗垂付以柄慶源之  
濬回復在公行本諸孝性安于冲正固以幹開敏而通治家有篤  
順睦其風六殿于藩七漕其職北土置兵西師調食旣勤諸神亦  
勞厥力治略其苛政幾于德蚤更近職晚侍邇英禁林三葉未有  
茲榮同庖七世弗忝爾生闔棺于寢愍策以卿曷不期頤遽然窀  
窆九鼎舊原萬安先域體魄靈茲輟嵩在側爾雲爾來重圭亾極  
右監門衛率府率世堅墓志銘

太祖皇帝三世孫右監門衛率府率世堅字温其慶曆戊子十二月二十六日以疾卒于睦親之吳邸年若干有司以品卑不在詔葬之例上憐之惻然見于玉色特命入內供奉官梁克明往護喪事以黃金五十兩白金三百兩賻之令內史卹詔贈以右監門衛將軍公會祖吳懿王大父某永清軍節度觀察留後安定郡公烈考從審寧國軍節度觀察留後宣城郡公母渤海郡君吳氏公幼性敏悟長有學尚筆札工賦詠有恭順之志無怠惰之容日奉內朝翼如也稱爲老成謂將遠到初命猶隸三班廷臣景祐初大更宗室官制纔除率府率至是再遷而卒君以天屬生王家不秀而苗旣榮而隕痛矣夫公娶李氏贈尚書令隴西郡王繼勳之女孫東頭供奉官舜舉之息女育二女並幼初藁葬于某所嘉祐庚子十月癸酉葬于河南耐永安之封城此下當有虞曹郎中妻亦略而不載疑有脫漏故陳留縣君鄭氏墓志銘慶曆乙酉二年甲寅陳留縣君鄭氏卒明年自晉陵舉其柩歸族

南譙之墓且耐先姑之次以十月十五日辛酉窆之于清流縣蓼湖之原筮日甫定家老以鄭之世系請銘諸窆謹按宗牒鄭蓋厲王之支子始疏華下之邑乃在寰列之內周之東遷我實從焉再闕虎牢之封厥居榮圃之地春秋之後布濩蕃衍漢晉之際咥赫盛大或革履見識于上或雲屏分間其坐司農二學名于當世有唐四姓號爲盛閥因亂僑寓今籍定平曾祖纓贈漳州團練使祖彥華仕南康領九江節制歸朝歷右千牛衛大將軍贈上將軍父文寶兵部員外郎累贈工部尚書沈毅倜儻好談兵策淳化至道間總領陝計經略河曲功不及究議者惜之事具國書及南陽文公所撰之銘縣君諱信陵字仙儀卽兵部之息也閒華令淑稟諸自然端粹莊修蓋有餘裕以守龜之吉年十六歸于今虞曹郎中清河公偕哲人歸冢婦虔共上下參和內外德性之尚不妄喜愠以禮防持動適中節召南采繫所謂能守法度者陳留有焉天禧初以郊類之慶用朝闈之例封滎陽縣君前後汎恩進封管城永

樂千乘陳畱最凡五邑享壽六十五三子長次津太子中舍次次立擢進士第試祕書省校書郎次次道太廟齋郎咸貞惠以承世德開敏而續門業孫三人望堅學皆幼一女適著作郎直集賢院呂溱虞曹之止臨海郡印歸老晉陵陳畱深鑿止足內相然贊及得可詔相隨還西翩翩二雛接翼而歸方將優閒家門含飴弄孫先露奄忽惠風已而豈至數之常然信天時之不齊銘曰榮圃之姬國曰鄭後世衣冠爲大姓東南避地藉延年累葉相仍覃厚慶惠風勝範在陳畱姿度莊修循德性清門合作三紀餘內外參和資輔正川上之水何悠悠韶華委逝不復畱人間華屋去北里江外丹旄還西州仍從先姑安舊隴永託松柏山之幽

文恭集卷三十八

文恭集卷三十九

碑表塔銘

宋故朝散大夫尚書禮部侍郎致仕上柱國樂安縣開國侯食邑一千三百戶賜紫金魚袋贈吏部侍郎蔣公神道碑

宋有大雅全德之老尚書禮部侍郎致仕蔣公以皇祐六年三月辛酉考終于吳郡靈芝坊私第以至和元年九月乙酉葬于吳縣堯峰之魯塢門人邵必志其壙議者謂公朝廷偉人東南首望宜有石刻以表神道既葬十年宿得以申尋遺烈章示于後公諱堂字希魯常州宜興人弋陽本系出于周公義興至唐蔚爲盛閥累世絳冕訖于五代本朝未有達者先大夫賢常有中興門構之志聚書延客以教諸子公在伯仲間穎特秀整不勉而學益進既冠而業大成西遊京師遍交英俊卓然文行見稱諸公名聲飛翔迅于六翩祥符五年登進士甲科授楚州團練推官嘗權州事閱器仗牙門軍校不待白己輒啓庫鑰公械而治其罪郡中肅然丁先

大夫憂服除吏部試甲乙判文在優等陸見日章聖命取所試判  
視之嘉賞焉改大理寺丞知撫州臨川縣縣有大姓李甲積爲民  
害乃復僭擬亾制動作不法前宰無敢摘其罪公至緣事捕治之  
盡得其姦狀卒坐棄市害根鋤去闔境慰說厯眉吉楚三通判改  
太常博士知泗州惟眉差小而三郡類劇沛然神用治罔弗舉召  
爲監察御史時樞密使張者章聖藩邸舊臣嘗有德于獻后后方  
臨朝耆數移疾弗治務公以其慢朝虧職宜加顯黜疏比上不省  
及仁宗復辟同僚語公益辯前疏答曰彼已失勢言之傷薄吾弗  
爲也未幾同僚躡公前跡而言疏入之明日仁宗見稱敢言擢居  
近侍執政知公抗疏在前他日見之有慰安之語公曰言責本職  
豈規賞耶禁中火有司欲文致其事委罪宮人公上言火災天意  
也陛下恐懼修省猶恐未至如聞吏議欲以宮人爲解女子一問  
卽承然天可誣乎上悟遽命原之日官上言內酒坊直國家福德  
所在宜徙置他所宦者喜興作希土木之賞隨而贊然事下公府

公逆奏曰內酒坊枕大內西北隅四世矣祖宗以來少福德耶無  
名改作所宜慎重事遂寢歲餘遍厯三院判三司度支句院賜緋  
衣銀魚時三司使范諷高虛廢務公以爲憂頃之以侍御史出爲  
江南東路轉運使辭曰面陳諷放逸不事事大隳厥職仁宗領之  
未幾諷罷至江東數月會朝廷廢江淮發運使均歲漕錢帛之數  
取辦六路以公爲淮南轉運使兼發運使更張甫至綱目未立凡  
百經制出于心術歲終奏計六百萬壘書褒美焉未幾就除尚書  
吏部員外郎復以勞賜金紫坐部吏犯法按舉失實移知越州漢  
太守馬臻所治鑑湖在焉無慮溉田八千頃至是越人奪湖水以  
名己田故水日堙湖田日廣貧民失水利豪姓擅地產公條奏利  
病詔復爲湖俗信姦巫奉淫鬼境內所祀非舊典者皆翦治之取  
其像棄湖中材瓦悉送官眾初駭以爲蔑神公乃尊禹祀新馬侯  
故祠歲時齋薦之民靡然而趨正享知淫祀之無福焉徙知蘇州  
代還判尚書刑部三司戶部句院厯戶部度支鹽鐵三司副使乘

西師之後關中困乏及夏人送款疆事略定公建白一切蠲去橫賦以紓其民東川饑受詔爲梓州路安撫使勞徠安定全活甚多還朝除戶部郎中天章閣待制充江淮發運使承前居是職者每歲上計必取大編載奇物輸權門以售進公再任前後五年未嘗一至都輦章奏皆附驛而上除河東轉運使未行徙知洪州又改應天府兼南京留守司歲餘遷左司郎中知杭州會高選名臣以殿右蜀遷樞密直學士知益州蜀人偷浮不識敦本前守如乖崖承寇亂甫平一切權宜務安遠俗後之來者以爲治蜀適然耳而又增益侈費十倍于前公曩官于眉習知敝俗常曰國家承平百年聲教萬國蜀士學尚不減鄒魯惟此習俗尚安餘風二千石恬而不怪豈承流宣化意耶乃興學校省廚傳凡過泰無名之費姑息不正之事多所裁革未始顧慮耆舊有識者竊喜公所爲咸言庶幾數年吾俗且變貪吏醜正惡不利己復有肺腑舊族逋責列肆累政不敢治公裁之以法遂入訴近習且造險語飛聞于上謂

公變亂舊制蜀土且搖遽移公知河中府迄今蜀人歌思之不已公至蒲嘗感危疾表求便郡再知杭州遷左諫議大夫復徙知蘇州明堂汎恩改給事中公治杭與蘇俱有遺愛及重臨二州幼艾相攜迎拜道路吳人于虎邱生爲立祠明年表還官政朝廷崇禮耆碩閔煩事物以小宗伯秩聽行其志力是時年耆者類不卽退公在杭州日業已治第吳下旣而得請角巾休舍摺紳高其識平生愛客應接不倦亦旣告老精力尚強佳賓至前清談不廢所居溪館有芝草產馬一孫少孤二子皆幼至是參侍左右咸以爲陰德之報感疾旣革遺言誨以力學口占後事命弟之子之奇疏于牘背己與親友訣神色不亂含玉之口壽七十五吳中士大夫若吏與民莫不相與流涕朝廷公卿表其德範宜加旌賁天子惻然命以優恤特贈尚書吏部侍郎未三品非例也公學問道本原論議依名節其行己也直其從物也裕人之有善不啻己出孜孜獎進須成就乃己所至以拔才薦士爲己任或譏以太廣勉之少峻

公以峻則遺物卒不易其守歷典會府者七所至之治必先美風俗扶名教不專于簿書聽斷而已治蜀日常召高才碩生會試府寺親校才等勸成學者于府學之側別建西學以廣諸生齋室訖成而公移蒲中其後轉使毀之以增廡舍既而常山宋公尚書至府聞其事歎惜久之且欲成公意乃即其舊址建文翁祠祠之內圖嚴君平鄭子真司馬相如揚子雲蜀土先賢凡九及公之像而十常山公爲之贊至公略云蔣侯挺挺天與嚴方健而文明不逢不將迹其風德從可知耳公有高情富清藻多所綴述尤邃于詩其間所得往往清絕善作尺牘思致簡詣時人得之藏爲名筆及退居林下神機日旺雖飲食寢處未嘗忘詩亦天性然有文集二十卷初義興家墅濱鬲湖之右蔣氏大宗之碑在焉公之曾王父諱幼蟾大王父諱宏謹皆隱德弗官王父諱九皋以公貴贈尚書刑部侍郎妣史氏追封廣陵郡尚氏宣城郡二俱太君公出史氏娶錢氏封壽昌縣君先庚辰十二年而亾後舉以合葬焉子三人

長羣玉早卒次長生次長源皆爲大理評事女四人長適刑部郎中知制誥邵必次適都官員外郎王景芬次早卒次適處州青田縣尉宋寬孫續任大理寺丞通判利州初公捐館遺恩以續簽書平江軍節度判官廳公事自言少孤育于祖乞服衰羸以報朝議以公有子不許遂辭疾謁醫去職行服雖不如禮識者重焉吁哉道之難行以公吏師治蜀美績弗究不登三事其命也夫宿早依門牆稔聞闕闕茲用傳信直無愧辭庶使三吳吏民過堯峰者爲賢公墮淚云銘曰公之志潛于斯民平昔蘊蓄曾弗大伸公之才足經當世華皓卷藏未能殫試刀州之學有像是圖君子雲盛德不孤虎邱之趾有祠特起太伯季札高風孔邇嗟嗟尺璧長掩山阿神明潛翳恫若之何震澤東漸靈巖西峙公雖可以德音不已

故祕書王公墓表

故祕書王君諱樞字慎之姓出魯之屬邑其先句須爲之宰後因


焉漢有丞相衡晉有將軍術乃其苗裔播遷之餘也累世占數常  
州之無錫以避太祖諱上之字改稱王焉曾祖克模祖建寧俱仕  
南唐爲偏將以驍果聞周師圍壽春國主命君祖齋密詔至守將  
劉仁贍所致命而還後積功勞卒于信州刺史考德政仕南唐爲  
資明庫使歸朝卒右侍禁君第四子也幼警悟有學工于屬文體  
裁典蔚天性善書喜爲楷法其落紙也如飛人望之意以爲草卽  
之真美可愛十三歲侍父征南海市舶故工部侍郎凌公策時爲  
轉運使賞其神俊妻以愛女凌公後典成都得任異姓爲官以蔭  
試將作監主簿非其好也鑣廳就本郡之舉取爲首選明年中丙  
科守祕書省校書郎知湖州長興縣治有風迹嚴而不殘丁內艱  
去官焦毀成疾以祥符丙辰十二月十一日卒于京師伯氏函其  
骨歸吳寓于惠山精舍三十九年于翔爲睦州建德令感幼藐失  
恃僑寓未葬赴郡謁告乞治喪事以書來赴曰我先君將葬日月  
孔邇願得銘諸壙中以謹行闕會予受詔聯知貢舉逮已事而出

則過期弗及遂以皇祐癸巳四月十五日卜葬于無錫縣神龍鄉  
義昌里大塋之次是時再世猶在淺土至是舉葬者凡六喪繫克  
家之幹也祕書某人從外兄也總角時以伯氏之命得依其舍爲  
學君太夫人范陽盧氏山東舊閥賢而有範閭門之內不肅而成  
視祕書子均同子姓君之伯氏植器業磊落綽有風義凡所論議  
必依名節吳中士大夫日游其門某以鯁生受教君子恩故彌厚  
歲不我與忽然四紀二惠競爽抱志不伸伯氏嘗舉進士以親老  
不違擇祿後卒于右侍禁君之易簀纔二十五歲貌古神秀行安  
志美時人咸期遠到不幸天闕其後同時儕類多至顯仕使君且  
壽未易涯耶長子曰翔進士擢第葬之明年冢嗣以最遷祕書省  
著作佐郎知河南府壽安縣得告展省咨予以前銘有關且曰表  
其墓可也追惟平昔受訓伯氏義不可辭故同其伯氏云  
故右街副僧錄普印大師賜紫昕公塔銘  
有宋大士賜號曰普印居景德蘭若以至和丙申四月甲戌宴坐

示滅容采若生壽七十有四臘五十有九都城緇俗燎香膜拜者  
日盈其室越仲夏甲申弟子文顯等奉其全身立塔于都門之外  
寶慈寺之別園也師諱昕姓曹氏世占數于丹徒六歲出家奉金  
山沙彌幼仁爲師十五染法衣明年受具戒挺然節尚拔于時類  
未幾臺恩以例賜紫方袍年二十餘通華嚴起信等經論雅好易  
學長誦說山中晨起講經午後說易如此累年未始有懈已而聞  
五祖山戒禪師有佛知見在求印可咨決心疑法要警聞空門過  
解自爾按趾莫非于海印舉足皆是于道場一錫隨緣僑止輦寺  
行願純備名稱普聞王公夫人傾向其風以謂挹之彌冲淵然而  
粹莫不服其清遠去疵各咸願叩擊表之益申方外之款龍潭潯  
陽之勝刹也遣徒迎致求轉法輪師承請驪然業已決矣會兩街  
上首與名勝百數詣京府薦留願廢以僧職乃署左街守闕鑿義  
稍遷右街副僧錄雖居大眾之地不異寂默之境定鑑有來而則  
照洪鐘隨叩而斯鳴素琴寶書蓋泊如也晚遂于易參京氏著論

三篇造至韞常曰三聖極摯本無言說淨名不二法門乃至無有  
言語文字仲尼亦云予欲無言又曰天何言哉老子西出關尹喜  
曰子將隱矣強爲我著書于是述道德上下二篇由此觀之默指  
可見然不離文字而說般若于是有三教會同之論焉未圓寂前  
一月手疏履迹見託狀其淨彷彿緒言猶在而哲人已萎豈非靈知  
逆照其來乎迨踐前言姑銘其塔云有皇庖義思索其極觀化至  
神畫而爲易有師少林妙解甚深逗機諸祖印之以心三極精微  
一乘圓頓孰會其宗導師普印覺門者俊智地妙明昔來江城畱  
舍都城緇素欽風王公挹德定慧參持威儀孔力毗耶示疾趺坐  
云亾感深茲土迹應他方神明曷之話言已矣塔闕全身狀攜隻  
履背宜春兮下苑卽逝迹兮外園瞻大士兮普印寧委蛻兮茲原

文恭集卷三十九



文恭集卷四十

行狀

太傅致仕鄧國公張公行狀

令公本系清河五世祖唐任刺史因僑于漢南曾祖諱某以廷尉

平總襄鄂七州都計居襄帥趙凝府趙凝唐書作趙匡凝疑為

梁所敗走江南因避地鄖鄉卒葬于斯祖諱裕字某試金吾長史

嘗莅陰城監院遂占數焉後榜陰城曰軍光化是也考諱廷朗恬

曠卷道翔去弗仕咸以醜德厚行品于州曲慶靈回復克開厥嗣

其後公貴三世竝追贈開府儀同三司太師兼中書令尚書令以

邠楚韓三國公啓之封曾祖之配曰郭氏祖之配曰胡氏封燕國

晉國太夫人妣趙氏封魏國太夫人繼母二曰龐氏曰李氏以韓

魯越竝加太夫人之號初魏國產公七日疾且革有姑適全氏以

公屬其姑曰娠是兒覺有異今疾不支以是長累姑矣語訖即絕

姑感慨鞠養同于己生公生百餘日甫能嘔幼即穎特習貫如素

及其長也身長七尺天骨峻擢隤然志量莫挹其際受經于嵩陽  
張恕先生恕有道之士見公學尚根本行中儀矩歎謂之曰子天  
機如法未易可涯後與濟北戴國忠廬陵歐陽慶學于鄴城淳化  
初本土勸駕端園覆試于時取士優先舊人初詣公車者臚傳報  
罷公颺言曰襄漢人士陶化尚少必欲諷勸學者乞從隗始占奏  
條暢太宗聳然異之即賜公第解巾郎鄉簿先墓在焉初政有條  
眾畏且愛秩滿除射洪長蜀盜甫平瘡痍迄起賦重俗惡不堪長  
治或恤公曰得射洪何哀盍易他邑公曰事不避難志不求易有  
民與社吾何懼焉至即安集勞徠恩意甚著夏旱郡邑馳禱靡神  
不舉公初至邑齋戒外次禱于白崖山陸使君之祠既奠而竣  
版以俟時陽驕熾天無纖陰須臾繁雲大合而雨連屬三日遠近  
霑足涓辰報貺刻文識其祠下剽聚盜保匿境內公廉知主名  
陰設方略詭以輕事一切捕繫數日州果符下牙將提兵捕劇賊  
陳漢遇八人至則賊已獄矣咸稱神明轉運使檄請治郵便道詣

郡射洪民數百追路邀持公馬首以歸曰我邑官人也郡以其狀  
白外臺檄至聽還本治其得民心如此張貳卿守左蜀有采訪使  
至郡詢屬吏之賢否雍曰本郡十邑屈得一指惟張射洪耳後除  
襄陽長內艱不赴除喪趨冬集出許下故內閣查公道時領漕京  
左嘗更守蜀郡高公射洪之政館致累日以書薦于楊文公大年  
文公遂于風鑿少所許可一見大加器賞便期以公輔促公獻文  
闕下自攜其副介于執政業有俞旨行給試札會有澶淵之幸事  
從中寢以薦例應格除祕書省著作佐郎知邵武縣民喜訟吏詆  
欺前後宰守經常繫者不減一二百公平處悉當劇易迎解訟源  
自閉牢戶至空軍帥武白訪公詢今昔煩簡之殊致以何道公答  
曰前以精密致煩後以疏略成簡白尤歎語致之美嘗手植海棠  
于庭中後之爲邑者欲伐去老吏以爲不可泣諫乃止迄今訂之  
甘棠焉遷祕書丞監在京折中倉除御史臺推直官楊文公薦才  
堪御史兼除察視時貢舉新格始用糊名張設科防間有未密公

受詔巡鋪巡經學已因白主司有親戚在進士中明當引試于巡  
體非便請出以避嫌迹主司以令甲無有公自表引去不俟可報  
眞宗覽奏深加歎息因記名于禁屏自是著令與主司有雜嫌者  
移試別頭江南轉運司闕中書兩上擬目已再見卻矣特有宸旨  
越次用公封禪汎恩就除殿中侍御史在江南歲餘除侍御史移  
廣南路轉運使公以南海饒寶惹以足鑿雖所須藥物皆自北營  
致而南到部市無私焉章聖意在試用故嘗以公番禺一二所爲  
伺知治行時朝家獲元命之符因佩馭之格訪四方州郡置觀榜  
以天慶公上言嶺服僻陋不堪大役建議諸舊有觀處宜改用金  
額別增一殿以虔朝謁朝廷從之班下著比時太尉王文正當國  
歎其有體識西祀慶成就除尚書兵部員外郎被召入對延見數  
四言皆意合去輒目送以將漕之重除河北轉運使詔徙棣州以  
避水害城中糧餉滯積議者難于遷運時濱河諸郡歲飢艱食公  
裁畱支計餘竝貸以與民約以來歲輸還新州公私便之如期率

集明年主上出閣高選僚友召還除戶部郎中充壽春郡王友規  
中入謝上面諭選卿來久幸煩友教公俯伏祇詔恪勤授經敷譯  
聖言開導元良德必依孝動則循禮上御齊而敦敏學緝熙而光  
明卓然曰躋繫于體訓授詔充契丹國信使辭于便坐趨入殿戶  
馳遣中人召入引至上前諭以元子煩卿誨接朕嘗以卿語宰相  
最憇于訓導輟卿不可以使材之難少逾卿者公因敘謝趨下再  
拜復召升殿再諭此行出境惟當執禮答問以實若關兵要辭以  
他語賜坐啜茗謁者贊罷復趨陞石對揚天子之休命公初入壽  
邸及主上一經之畢眞皇皆賜御詩褒美焉至是聘北復有宸藻  
寵行朝野榮之前無此比使還稱職以國藩初啓除昇王府諮議  
參軍東宮旣建除右諫議大夫兼太子右庶子未幾升左同知審  
官院事四年兼太子賓客知審刑院判史館兼樞密直學士審官  
如故眞宗治定淵然凝監太清機政參裁旁倚儲德始以二府正  
弼通領官職除公太子詹事會靈觀判官餘如故五年以本官拜

樞密副使尋遷給事中皇初紹宅三遷戶部吏部侍郎尚書左丞  
充祥源觀使並居內密之職六年拜禮部尚書同中書門下平章  
事集賢殿大學士明年罷相遷刑部尚書知江寧府九年來朝京  
除定國軍節度使鎮許下十年拜刑部尚書行中書侍郎同中書  
門下平章事明道之元落成宮寢職在使領二年遷兵部尚書升  
冠宰席兼門下侍郎昭文館大學士監修國史獻懿二后祔洛以  
公充使領護園陵尋除山南東道節度使同中書門下平章事判  
許州景祐二年有保釐西洛之命五年復以夏官尚書升序上袞  
寶元郊類充大禮使籌相儀之勞進封鄂國公上方倚任舊德挹  
仰者訓機務大小一咨決公亦竭精盡慮彌補察讜言善策隨  
事獻納自以儲帷階進感會聖恩潔進退之分全君臣之美欲  
後世莫窺其間于是七露章推善已意求還時柄天子憑賴中旨  
批諭有公無困我之歎進見乘間又懇懇乞骸上亦感悟其言閔  
勞職事冊拜太傅致仕進封鄧國公許朝朔望及大朝會綴中書

門下班都城出入許施青蓋師瞻主睠終始尊顯國朝宰相自中  
書致仕惟公一人而已艾服官政五十餘載內修孝悌以廣親親  
外崇禮樂以接天下保誠任素履中蹈和乾興受遺繼秉相軸皇  
初遵晦獻后參制近習藉寵勢有放焉公與一二雋弼同心彌縫  
闕漏消弭間隙援進忠睿選用儒碩備諫正勸講之任開益神睿  
綱紀疊穆厥功茂焉冀州上曹某急變構碁者規中樞老二宮召  
質諸弼俱無言者獨公保任大臣無異志言色詳正卒指以厚善  
罷公政事出金陵上終眷之後復其爵土還所籍田廬甄其子孫  
公中不自欺大較如此凡所解釋多見全度好獎進士類喜掩覆  
人過不念舊惡特稟純孝感姑撫育事之如母姑亦早寡一子文  
秀後卒復棺之際公適在外及還盛暑堅求發棺已而視之哀慟  
殆絕姑爲之輟泣曰吾子雖死汝在固無憂矣公悉心奉養先意  
孝順姑後病死行服營葬身相昇柩徒跣墓次行路觀者歎息純  
至及在樞宥表陳前恩特贈姑南陽縣太君姑之子文秀贈太子

左贊善大夫刻石以紀其事今宣猷原武鄭公之文也每語及姑  
兄泣然流涕武當鄖鄉先坐焉嘗表求置寺以紓罔極詔以乾  
興賜之額營築之際王徒艱水溪路回遠疲于行汲一旦墳側靈  
泉自出役夫持鍤隨而浚之淵澮甘清絕異常水飲者皆足眾不  
病渴日月引長施及墟落公刻文志異名其泉曰孝感錢思公美  
而作頌併序其事公奕世滋善深奉竺乘公學力之強妙悟性理  
寂默常照疵吝隨遣不使纖芥點于太清以至歷四方經百物神  
用無滯機應不差干將莫邪所至立斷隋珠和璧未嘗自珍初服  
小官晚都大位久幽不改常操三人而無喜色所謂器博用大道  
周性全者也出殿大邦克勤小物不養虛體務收實迹所至有愛  
利之風無苛畱之獄許田患水築隄以捍堅完峻厚歲息愁墊許  
人至今蒙其賜及得謝神明克壯且起玩易老閱華嚴諸品與赤  
髭白足之士對談法要得名教之樂忘形役之累城南賜園殊爲  
名勝暇日後車載客相從文酒雅題探賦清篇賡屬野興所適或

累日忘返公綴文根道尤邃于詩峻整平淡通有二體登科日嵩  
陽張先生以詩寄公云全篇合雅道一舉得仙枝乖崖張尚書以  
雅道自處少所推挹嘗覽公詩云巨峻如天設看來字字精功夫  
能到此心意可知清酷愛張水部籍詩嘗評之云語雖似近思致  
清遠淺于詩者不足游其藩闕保釐西洛有三游嵩少詩及還政  
事與故相宮師陳公角才聯唱詩筒日至摛紳多傳諷焉况之劉  
白公嘗受詔主作皇太子及寶元尊號二冊文典厚深重世稱名  
筆撰集則有明道藉田謝廟二記箋註御集譯潤經文公咸預焉  
文集十曰應制曰春坊曰舊帚曰江嶺曰許洛曰歸政曰過家曰  
小集曰雜文曰表章內七集自作序冠其前行書遒勁毫髮殊逸  
尺牘所作人竟藏弄歲時伏臘太官珍甘班賚兼優勞問不絕元  
會誕節參綴宰聯抃舞稱觴百僚聳觀龍光體貌爲時元老上嘗  
遣近璫持賜公飛白千歲二字神毫奮迅天然攸縱公進長歌二  
百言稱謝優詔賜答模以琬琰龕于西堂翰林學士宋公子京爲

之序前後所賜宸翰積百餘軸居常祕奉公以乾德甲子九月二十一日生于皇祐元年正月己酉晡後薨年八十六歲上聞而震悼詰旦車駕臨奠哀慟數四賻中金三千兩輟視朝三日冊贈太師兼中書令翼日便坐決事上顧宰相曰張某可惜昨日有言庚戌是朕正本命未可致奠朕以其師臣舊德首于藩邸輔導遂定志而往宰臣進而言曰陛下如此過于唐太宗辰日哭張公謹也茲事不惟張某之幸實惟陛下聖德之美乞宣付史館庶幾光輝行遠上從之二月某日皇帝出哭于外次百官奉慰哀榮之極人臣少比初公卜葬父母遇觀之蠱十者曰易所謂幹裕其父母吉孰大焉上九不事王侯高尚其事公將終身履之貴而有壽其後三師就第十年棄事養和綏福得上九之象馬間歲一還鄖鄉拜埽塋墓三世墳典皆至極品上者幹裕之說不其信歟未薨前二日猶之園墅晨起感疾初不甚苦方答親客書簡俄而委順公起布衣爲王者師三持化樞再領台鉞任德爵之重爲典刑之老易

之大有上吉書之五福嚮用公皆全而履之初無缺者初娶蔣氏追封晉陵郡夫人再娶黃氏追封英國夫人三娶馮氏封舒國夫人皆賢明婉靜儀諸中閫男子四人長友直任尚書刑部員外郎直史館友偁殿中丞友正將作監丞友誼奉禮郎蚤卒女四長適工部郎中安積次適刑部員外郎集賢校理李昭邁次適太常博士呂公孺次適刑部郎中王素適安氏王氏者先公而公龜筮襲吉日月有期周咨家臣參稽官闕敢陳有覺之行願摘無愧之辭謹狀

李太夫人行狀


後封沂國太夫人

太夫人姓李氏古數晉陵世爲賢家曾大以來敏德厚行名諸州曲考諱某力學早殞不階宦達娶強氏生三女太夫人卽其第二息幼挺淑質長蹈雅性姆教匪習自安于中行女功不勉皆臻于妙趣以守龜云吉遂歸于我先君寺丞逮事大門及侍公姑朝夕恪共儀止淑慎躬親執煩辱之事造次亾喜愠之容旁絕間言動

得餘裕及大門捐館尊姑在堂時年八十餘矣能候慈色不失美  
意時先君患舊華隘甚謀攷新室或計土木之費旁沮其議太夫  
人曰不然今姑年迫矣脫有不諱外姻且來是間何能周旋治第  
庇族差勝他費及姑生存安得斯寢饋于是粥于是歌于斯哭于  
斯足矣乃出奩中之妝得金數百趨市材瓦落而成之未幾而祖  
母亡于是弔祭有所焉洎先君不祿泰山其頽泣奉几筵親持門  
戶訓諸子以學勸諸女以順歲時伏臘祠祭必誠諸物內外姻族  
慶弔皆躬其事或有匱乏至為經恤外祖之亾一子尚幼自零丁  
孤苦之中使之成就樹立皆出勸養之勤遂成其家逮至暮年數  
見重孫篤羊棗分遺之慈盡鳴鳩均一之愛持禮由于繩墨用心  
過于丹青黎明以興盛服而坐習知四諦之苦歸信一乘之法神  
珠百餘誦觀音名號持般若心經像前焚香日繫其合貌是諸子  
尸諸外官至于賦政緒餘立身本末莫不提耳蒙教持心俾厚奉  
戢悔尤得免罪戾實繫慈訓平反之故寶元中郊類汎恩啓封上

元縣太君慶曆三年孟夏交吳興郡章奉版輿寧里閏昊天不弔  
大禍奄至以中秋八日感疾終于常州孝仁坊之私第享年七十  
有五臨終神色如常初不怛化顧視諸子徐以手握某之臂良久  
合掌加額曰願汝無忘善性諸子以有為之法乞營佛事頷而許  
之言訖疾終初太夫人以丙申八月壬寅生于某復以癸未八月  
壬寅委棄諸孤至慈無窮大恩未報追誦寒泉蓼莪之什劬勞顧  
復之施恨不得先從地下驅馳螻蟻苟延視息亦何忍焉子五人  
長曰某至性純至次日宿任太常博士集賢校理曰實曰賓  
舉進士南省下女二人長適進士朱況況姓名見唐詩鼓吹所  
選胡宿七言律中元好問  
既誤以宿為唐末人于況自  
不暇深攷此足以證其失次適桂州司理參軍葛武皆先太夫  
人而亾孫宗度宗陽宗堯凡二十四人宗堯擢進士第任饒州團  
練判官餘或干試有司或纔習緒業重孫元規而下凡六人日月  
有期諸孤相與追記平生狀實乞銘諸竊以光幽壤

文恭集卷四十



右文恭集四十卷宋胡宿撰宿字武平常州晉陵人天聖二年進士歷官至樞密副使以太子少師致仕諡文恭事蹟具宋史本傳有文集七十卷見陳氏書錄解題者今已久佚乾隆中館臣從永樂大典輯出詩文一千四百餘篇釐爲五十卷交 武英殿以聚珍板印行時復刪去青詞樂語十卷定爲四十卷已得全集之大半後有浙江本福建本江右局本學者尚爲易得內有左中奉大夫權尚書吏部侍郎兼史館修撰周綰除集英殿修撰知溫州制按此制時代不合顯系誤收南宋館閣錄周綰字彥約括倉人蔡蕤榜進士及第紹興二十八年十月以權吏部侍郎兼史館修撰二十九年三月除集英殿修撰知溫州又弘治溫州府志周綰直敷文閣知溫州軍事紹興二十九年又趙良弼自豐州刺史除撫州刺史制有云南宮起草事著於彌綸東吳授鉞功存於制勝中外之政終始不渝爰自休閒尤彰操尚宮垣選美俾參調護之職方鎮藉能式委分憂之寄案此制亦誤收良弼係唐人其爲浙東

節度見舊肅宗紀及唐會稽太守題名記為太子賓客見邵說所  
 撰趙叡冲碑與制所云東吳授鉞及官垣選美語正合又目不載  
 太子賓客則制語殊無根必有舛誤二文皆宜削去今另輯得首  
 楞嚴經義海緣起標指集解有序一首建康志有高齋記一首困  
 學紀聞有嘉祐六年制策一首天台續志有七古十首編為一卷  
 附刻於後光緒乙未四月武進盛宣懷跋

夫辨尚書夏商周禮樂書  
 半錄洋書正本脈較太  
 命賦明一制題冊本  
 樂大典註出精文一千  
 自文集十卷景刻及書  
 士恩宜至斷斷隔如以  
 詩文林某四十卷宋貼  
 附刻於後光緒乙未四  
 月武進盛宣懷跋

藟

藟

藟

藟

一

藟

周	廿	氏	卷
林	世	申	緒
鐘	孫	明	乙
韻	鐘	不	宋
一	輯	啟	卷
卷	本	可	誰
	墨	宋	盛

欽定四庫全書總目卷一百三十二

春卿遺稿一卷

宋蔣堂撰堂字希魯宜興人大中祥符五年擢進士第仁宗朝歷官左諫議大夫知蘇州改給事中仍知州事後以禮部侍郎致仕因家於蘇事蹟具宋史本傳案胡文恭集有堂神道碑稱堂以皇祐六年卒贈吏部侍郎此集題曰春卿仍舉其致仕之官所未詳也碑稱其有高情富清藻多所綴述尤遂於詩其間所得往往清絕善作尺牘思致簡詣時人得之藏爲名筆及退居林下神機日旺雖飲食寢處未嘗忘詩亦天性然有文集二十卷本傳亦稱其好學工文詞尤嗜作詩與碑文合所載文集卷數亦同然原集今不傳此本乃明天啟中堂二十世孫鑽掇拾佚稿而成凡賦一篇詩三十七篇記一篇不及原集十分之一其間惟詩獨多則碑所云尤遂於詩者信也其詩雖興象不深而平正通達無雕鏤纖瑣之

習北宋遺集流傳日少錄之亦可備一家焉

一編不文原集十卷之一其間詩話詩餘多與本朝相承

與中堂二十世紀詩話詩餘多與本朝相承

與中堂二十世紀詩話詩餘多與本朝相承

與中堂二十世紀詩話詩餘多與本朝相承

與中堂二十世紀詩話詩餘多與本朝相承

與中堂二十世紀詩話詩餘多與本朝相承

與中堂二十世紀詩話詩餘多與本朝相承

與中堂二十世紀詩話詩餘多與本朝相承

與中堂二十世紀詩話詩餘多與本朝相承

與中堂二十世紀詩話詩餘多與本朝相承

習北宋遺集流傳日少錄之亦可備一家焉

春卿遺稿目錄

北池賦 并序

謝李兵部詩 并序

隱圃詩 有序

溪館二首 有序

南湖臺三首

和梅摯北池十詠

詠金竹

吳淞江 附張口口和題

蘇州府重修大廳記

附公姪之奇遺稿

題孤嶺


寒亭暖谷銘 有序

奇獸巖銘 有序

遺稿目錄

附

本傳



春卿遺稿

北池賦 并序

宜興蔣堂希魯

姑蘇北池其來古矣昔刺史韋應物詩云海上風雨至逍遙池  
 館涼卽其地也韋與白樂天皆有池上之作盛詫其景自韋白  
 沒僅三百年寂無歌咏者余景祐丁丑歲被命守蘇池館必葺  
 常賦北池宴集詩是時端明張安道爲邑崑山亦畱風什傳刻  
 於石故事在焉去此涉一紀余復佩蘇印感舊成賦聊以寄懷  
 云

澤國秀壤句吳故城其野齋之勝者有曲池之著名環碧曉漲迴  
 光晝渟接琅津之餘派分銀潢之一泓危橋跨波迅若走鯨虛閣  
 延月清如構瓊乃飛蓋之所集鸞芳塵之不疑主人一去余去此十二年  
 春草羅生賦詠幾廢欽寄未平今茲稅鞅之日復慰臨流之情目  
 與景會神將喜并是時霽色疏淨羣動紛盈魚在藻以性遂龜遊  
 蓮而體輕禽巢枝而自適蟬得蔭而獨清科斗成文書之象龜鼉

有鼓吹之聲以至鷗鳥羣嬉不觸不驚茵苔成列若將若迎崖產  
并柯之木波孕紫莖之萍灘露沙而全紫垣疊鮮以衣青新蒲鏘  
鏘挺水心之劍綠竹整整轟羽林之兵別有島檜高聳枝幹相撐  
水石結操冰霜薦英若古君子與世寡偶而獨立特行吁可異也  
噫景之勝者可稱物之秀者可旌故萬狀在目吾得顯評者已吾  
方岸野噴踞風亭觴賓友奏笙坐或獨繭靜釣或扁舟醉乘惟蔗  
有漿用以析朝醒惟菊有花可以制頽齡而况庭無畱事身若遺  
榮泯得喪乎意表育平粹於心靈姑徜徉於池上亦何慮乎何營  
謝李兵部詩  
靈芝坊在杉瀆橋西侍共巷內阜祐五年爲侍郎蔣堂立初名  
難老兵部員外郎李晉卿守郡之明年因所居產靈芝故名  
黃菌誕邱園靈貺賁醴泉至和非我召美化自公宜秀色鄰三逕  
幽光被一屨時髦秉筆者爲我列羣編  
前題

使君有意飾門閭雅爲靈芝揭表初招隱溪邊往還者從茲認得  
野人居

隱圃詩

隱圃在靈芝坊蔣樞密堂所居堂兩守蘇謝事因家焉自號遂  
翁圃中有水月菴煙蘿亭風篁亭香巖峰古井貪山等景自賦  
圃隱十二詠

雅得菟裘地清宜隱者心綠葵才有甲青桂漸成陰獨曳山屐往  
無勞車駕尋湛然常寂處水月一菴深  
溪館二首

宅南溪上結宇十餘楹名溪館及築南湖臺於水中亦皆有詩  
皇祐中於溪館知州李仲偃集賓僚賦詩爲壽因立靈芝坊胡  
宿譔溪館記

年來納組去林下得身還泚泚清流處重重碧樹間淵魚樂且靜  
庭鶴壽而閒粗有淮安趣誰同賦小山

其二

野意本自遂茲溪稱獨醒雲蘿環靜室水石照疏櫺殺竹編書古  
紉蘭作佩聲王通昔不遇時亦坐汾亭

南湖臺三首

有序在前

危臺竹樹間湖水伴深閒清淺采香徑方圓明月灣放魚隨物性  
載石作家山自喜歸休早今勝賀老還

其二

曉樹水中央茲為隱遯鄉小園香寂寂一派曉泱泱煙草碧彌岸  
霜桃紅壓牆鴟夷倘在此未必入滄浪

其三

水次揭危亭煙堤四面平栽蘆延宿鷺種柳待啼鶯雪霽清流漲  
風來夜艇橫輕肥莫臨顧我老懶逢迎

和梅摯北池十詠

池上有虛閣暈簷迅若翔百壺多盛集四座仰惟良薛印文綦綠

蓮依桂楫香何由陪嘯咏敷衽納微涼

其二

池上有奇桂青青歲紀深舊枝憐茂植時亦欠清吟夕月漏孤影  
秋霜滋勁心今方遇真賞風什播瑤音

其三

池上有孤島影搖波底天蓬壺欣髣髴仙客得畱連岸草襯丹轂  
灘蘆隈畫船羨君休澣日寄傲一尊前

其四

池上有修竹遙聞手自栽幾因風韻響時感隼旗來粉籜經梅脫  
虬根遇石回嬋娟綠陰下小閣為誰開

其五

池上有垂柳煙籠濯濯枝芳根逢茂育老翠勝平時體弱因風舞  
詞清入筴吹金城久不到遙想歎羈離

其六

池上有叢菊繁英滿舊蹊金刀惜頻翦粉蝶得幽棲醉卉誰同插  
香牋手自題遙思清賞處野步岸東西

其七  
池上有時釣閒忘侍從身波平方浸月吏退閒無人藻映魴魚尾  
風搖獨繭綸一亭容膝地雅飾免荒榛

其八  
池上有時宴笙簧沸欲凝歡多漏移刻坐久月和燈席客詠持螯  
女倡歌采菱醉來忘萬事風靜水波澄

其九  
池上有雛鶴來從淮水壩舊巢離海樹清唳入吳天骨峭翹霜月  
翎疏刷野泉使君宜得伴仙格本千年

其十  
池上有馴鹿亭臺深處行長隨熊軾慣且兔兔宜驚遙草眠多穩  
流泉飲亦清寸岑有靈囿可使遂微生

詠金竹

百鑑先寒一徑深潛疑造化鑄成林貪夫或有凭闌者不見修篁

但見金

吳淞江

江人見我謂誰何行李無羈野意多六幅青帆趁潮去一樽白酒  
扣舷歌沙邊歷歷辨雲樹島外濺濺弄月波興盡歸來還更喜舞  
鷗相送入煙蘿

和蔣希魯前題

春後銀魚霜下鱸遠人曾到合思吳欲圖江色不上筆靜覓鳥  
聲深在蘆落日未昏聞市散青天都盡見山孤橋南水漲虹垂  
影清夜澄光合太湖

張□□

蘇州府重修大廳記

姑蘇受署廳新成當兵部員外郎李公晉卿守屏之明年冬十月  
也政修事舉所至精明完葺之初見梁間有題識乃有唐乾寧元

春稱  
年刺史成及所建乾寧距聖宋一百六十有餘年矣刺是郡者接  
跡不絕凡受署訖即臨便閣煩鞅沈迷其於廳事或旬日不一至  
以至年禩寢遠棟將撓焉余昔兩縮蘇印班祿餘閒每浚隍濠構  
臺榭以館過賓以備宴衍以追韋白二公風跡雖自以爲適然於  
是廳繕完有所未至今觀李公之爲有過人者圖新補廢俾唐末  
之遺構巍乎顯明吏民瞻之靡不胥悅君子謂李公急於先務知  
布政之本焉余自是事憮然自咎因書本末云時皇祐六年三月  
日記

春卿遺稿續編

題山亭

山亭深處枕清溪萬木回環盡翠微  
梅萼破香知臘近柳梢含綠認春歸  
風前列嶂琴三疊雪後羣山玉四圍  
顧我此來盤礴久塵勞瀟洒頓忘機

過葛墟讀蔣烈大宗碑

天寶年中立此碑軒裳鱗次美當時  
自從寂絕牛頭夢力振家聲

合在茲以上二首見沈

遊松江

曙光東向欲瞻明漁艇縱橫映遠汀  
薄面白煙昏落月嶺頭殘燒混疏星  
鳴榔莫觸蛟龍睡舉網時聞魚鼈腥  
我實宦遊無況者擬來隨爾帶笭箆

五

月晃長江上下同畫橋橫截冷光中  
雲頭濺濺開金餅水面沈沈

臥彩虹佛氏解爲銀色界仙家多住玉壺中地雄景勝言不盡但  
欲追隨乘曉風

堯峰新井歌并序

堯峰顯暹禪師有道行居常遊吾門一日且曰山中鑿石造井  
踰歲僅成既列而甘大爲叢林之利願得紀述以久其傳因作  
歌云

白雲莽莽青山頭一穴四面飛泉流其初山間舊井涸枯腸燥吻  
海眾羞於時大士寶雲者頤指土脈智慮周山靈所感道心夾檀  
施聿來工力鳩雲鋪齊下遠雷動石光內擊飛星稠百尺虛空廓  
地表鑿井求水出土一尺卽一泓清冽呀深幽人疑從天墮月窟  
有一尺虛空見內書或問何處移龍湫次則其徒駭殊勝競持應器嘗甘柔飢狄連臂  
喜跳擲渴鳥引喙鳴鉤輒碧盞光中輒曉曉銀牀側畔梧桐秋寶  
坊金地互相映谷酌坎蛙難此畱傍睨江形小衣帶下窺湖面卑  
浮漚何茲鑿飲有功利一掬入口醍醐優熱者濯之昏鈍決病者

沃之沈痼瘳而我時邀墨客去松澗遠挈都籃游淨瓶汲引試香

薺雅具羅列無腥甌茶經爐鼎腥甌非器也比之玉乳不差別曲阿有玉乳泉請彼

鍊丹多謬悠俗傳天竺有鍊丹泉今茲泉眼在魯塢所喜雲液鄰

菟裘魯塢乃堯峰地子苾芻旣往之鑿者水記未載予將修此山

此井永不廢此歌其庶傳南州

再題半峰亭

何名半峰亭堯峰路之半遊客趨層崖斗上多股戰寶雲構此軒

接引心不倦所冀冠蓋來少休松石畔雄視金仙居魏乎倚雲漢

自此更攀緣須臾跡彼岸

絕句

歸來深隱太湖濱天與扶持百歲身雖是浮雲隔雙闕丹心愛戴

在君親

吳江橋

雁翅橋橫五湖北輦飛亭屹大江心魚龍淵藪風月窟若比廣寒

宮更深

春卿公弱冠成進士才名籍甚公卿間王魏公楊文公亟愛重之公以春官侍郎再守姑蘇有吳門集二十卷歲久逸不傳鑽修世譜博稽往牒自漢末至今載在史官者無慮數十人其詩賦雜文散見各編悉哀集之公文載郡乘暨故家遺篋中僅二十餘篇而已公先後守姑蘇數年自韋刺史白司馬後文章政事風流蘊藉輝映千載唯公一人至於勳勳中外偉議熙績勒在太常公始自義興遷吳城七葉管纓甲于江右宋季式微羯虜遷鼎含華隱耀身名雙逸聖祖蘊隆迄於成弘間科名繼起泝厥源本實公載造茲編帙雖渺爲賦爲詩爲記三體具備取材超遠託寄澹蕩盛世珪璋居然不朽讀其文想見其人庶幾函牛一臠矣求多乎哉旣以壽諸梓用述其崖略綴於編末天啟元年閏二月下浣二十世孫鑽書於蒼梧署中

春卿遺稿補遺

閔山詩

越之府山亦名臥龍爲一境形勝予視事之明日見其竹樹零悴僅有半在問吏吏曰爲昔人剪伐使然問民民對如吏因悵然久之自謂非予守土卽茲山殆將童矣於是申約束止樵采作閔山詩云

東南亘羣山形氣或斷續茲山窮軒絕孤峙越之腹鬱蒼瞰城闔勝秀爲民福所宜禁樵蘇主者在嚴肅不知平昔時誰氏來班錄私庖計薪爨無時代良木官膳利貨財彌年翦修竹忽忽事斧斤丁丁響川谷萬葉壞密幄千竿倒寒玉輪囷無完枝檀欒鮮遺族戕賊殊未厭峰巒翠將禿鶴侶怨且驚雲容慘以惡非唯挫生意抑乃傷雅俗王者有仁恩行葦亦沾沐嗟嗟若人者忍不思化育今予剖信符於茲憩丹轂謂山豈無靈胡爲人所贖呼吏對泉石申禁護林麓庶幾養翹英勿使罹殘酷來者賢使君斯言願爲復

題曲水閣

危構跨大淵淪清滌世紛飛湍逢石轉漱玉隔山聞影亂林花落  
叢幽澗草嘉泰會稽志作守會茲為禊飲地何羨右將軍

諸官詩成因書二韻於後

嘉泰會稽志作守會稽日修永和故事作

一派西園曲水聲水邊終日會冠纓幾多詩筆無停綴不似當年

有爵觥

昔蘭亭賦詩不成者十人各罰酒三觥

寄題望湖樓

城上危樓勢孤峙樓頭盡見湖中水水色澄明游者多古來雅以  
鑿為比家家畫舫日斜歸處處菱歌煙際起清漣蒙濶一都會碧  
底涵空三百里溥哉利及鎮東人而我常嗟馬臻死今滋史君多  
感慨所以望湖心不已頻登雉堞追古往盛集賓朋為宴喜樓南  
極目芙蓉花萬疊紅英照千騎

寄題西園

西園昔日多遊從迴流屢泛卮酒空前亭後亭草茵輒曉景晚景

煙嵐融角巾蕭灑竹林際履綦來往花陰中時方偃蕃適四體不  
料游宦如孤蓬數移五馬臨大屏幾悵之毛成老翁昨去鄰封亦  
甚邇謂守餘杭也祇限一水無由通錦城此舉又遠適流觴雅會何時  
同錢塘山色望不見稽山沈在錢塘東

棹歌

湖之水兮碧泱泱環越境兮潤吳疆蒲羸所萃兮雁鷺羣翔朝有  
行艫兮暮有歸艫菱牧狎至今漁采相望漑我田疇兮生我稻梁  
我歲穰熟兮我民樂康馬侯之功兮其誰敢忘蓴絲紫兮箭筍黃  
取其潔兮薦侯堂酸罍具兮簫鼓張日晡暝兮山蒼蒼侯之來兮  
雲飛揚隔微波兮潛幽光念山可為席兮湖不可荒惟侯之靈兮  
與流比長萬斯年兮福吾鄉樂吾生兮徜徉

飛來山

有山昔飛來神怪安可測萬壑鼓風雷千巖為羽翼胡為忽移徙  
到此無傾側靈越得奇峰琅琊失遺跡煙雲隨而至杉篁古所植

如何草創時偶作瞿曇宅聞之有苾芻歲久苦刑刻鑿聲響深崖  
火燼淬層壁詰之州人云向有僧旦暮鑿是山鑄平為土木基茂  
有蒼翠色金粟千億身窄堵百餘尺回廊盡復疊寸地無間隙一  
聚紅塵中萬瓦青煙羃成彼有為善斯可長太息我試來尋山山  
形俱變易方念此嶄絕安得如往昔不謂山之足下落言偃室知  
是騫翥時於茲墮巖石屹爾畫疆畔其誰敢侵蝕隨宜得形勝觸  
目見齒岸小桂結濃陰清露有疏滴巾履日可賞琴樽雅成飾多  
謝對幽岑亦足開煩臆若在祇園閒豈更存餘碧

題妙喜庵

并序

閻公者越之大士也今年秋於濫湖中得有唐妙喜寺遺址結  
茅而居昔刺史李遜作記云雲霞草樹橫在一目即其地也予  
嘉之乃以寺之昔名名其庵復贊道行形於鄙句云  
禪公覽古意裴徊偶結雲庵向北來滿目滄洲圍野景一枝金策  
卓秋苔沙邊水鳥銜花至月下漁人施供迴或訪稽山舊徒侶樵

風應為送浮杯

以上會稽  
掇英集

送梵才大師歸天台

老被詩名繫此身

師以詩名多為  
士大夫往還

思山深去避人羣寶臺千尺隔

江見清磬一聲歸路聞巖上開扉燈照月庵前掃地雪和雲終焉

此是清涼處淨住無慚相國文

師建般若  
為之立記

經臺丞相宋公  
天台續集

贈陳虞卿

寵秩拜春坊歸休識慮長埽門卑魏勃設醴謝元王一水葦鱸國

羣山橘柚鄉喜君添老社煙駕尚徜徉

過葉道卿侍讀小園

秀野亭連小隱堂紅葉綠篠媚滄浪居士自注道卿自號也無歸意

卻借吳儂作醉鄉自注蘇人多游飲於  
此園以上吳郡志

贈惟政禪師

禪客尋常入舊都黃牛角上挂瓶盂有時帶笠穿雲去便好和雲

作畫圖

西湖高僧事略

春甫

三

清陰館種楠

手植榎楠二千樹時當慶曆五年春還期莫道空歸去畱得清陰

與後人成都文

東齋

守土無畱事休居有靜齋文纔化鶴陋術未迨乖崖古帙書參畫  
秋陰竹間槐西人安枕外聊此息筋骸上同

附公姪之翰之奇遺稿

換蘇印和弟穎叔

之翰

從來疏拙嬾身謀攬轡登車已倦遊幸有醉鄉為樂地何妨吟笑

老東州吳郡志

題孤嶺

之奇

蛟綃翦下碧雙垂歸挹清流背紫微北向更登孤嶺去此身還入

白雲飛原輯

春帖子

昧且求衣向曉雞蓬萊仗下日將西花添漏鼓三聲遠柳映春旗

一色齊丹陽集

和鮑娘題兒溪驛

盡日行荒徑全家出瘴嵐鮑娘詩句好今夜宿江南清波雜志

和兄之翰寵換蘇印

早同侍宦向長洲今擁旌麾訪舊游自古風流詩酒地韋蘇州後

蔣蘇州吳郡

贈海陵天慶觀樂子長真人碑

瑤壇三級滿蒼苔想像真人飲赤杯颯颯仙風動杉檜只應颯馭

暫歸來徐神翁語錄

和祕閣曝書會

宴豆追儒雅簪纓成禮容中天開璧府左海見鼇峰汗簡陳三館

緗圖煥九重紫薇方思敏十吏筆能供事文類聚後集

奉敕宿齋于上清館儲祥宮

日月園丘吉前期告上清竭來修祀事齋潔奉祇明靈圍賓瑤館

仙遊列玉京丹青浮象魏盛典照蓬瀛合璧事類外集

寄米元章

京城汨沒興如何歸棹翩翩返薜蘿盡室生涯寄京口滿林圖籍

鎖巖阿六朝人物東流盡千古山河北固多為借文殊方丈地中

閒容箇病維摩淨名齋帖

即事

渭水岐山不出兵卻攜琴劍錦官城醉來身外窮通小老去人間

毀譽輕捫蝨雄豪空自許屠龍工巧竟何成雅聞岷下多區芋聊

試寒爐玉糝羹詩林萬選

遊朝陽巖遂登西亭有序

朝陽巖在瀟江之西去治城不遠唐永泰二年元次山為道州

刺史避兵至零陵訪而得之以其東嚮遂名朝陽方是時結有

盛名于世故永之守丞獨孤恹賈泌為之翦荆棘建茅閣結又

為之銘與歌其後柳子厚繼為之詩予以子厚詩攷之正所謂

西亭者也復為之亭而系以詩

昔遊不在遠幽巖臨治城欽岑俯瀟碧寥豁延陽明綠澗可徑入

滑路偏仄行泉源自何來涓涓玉鏘鳴疑穿雲雷窟常帶魚龍腥

寒江淨瀉鏡怪石坐開屏幽鳥馴可羅潛蛟深莫習梯險接層棧

冠巔聳危亭俯睨極元窻仰攀窮青冥蹇曠出物表高虛挹元英

惜哉非吾土不得憩此生舊業寄陽羨故園依晉陵秋風漏湖白  
春色頤山青一從紳笏去遂使猿鶴驚迂疏暗時機孱瑣叨官榮  
謫棄分所宜媿惡顏已盈人生詎有幾世累吾方輕願言解羈紲  
上疏還簪纓空居召魂魄恬養休性情紛華屏外慕冲澹巖中局  
窮年伴農圃畢志先疇耕

澹巖

零陵水石天下聞澹山之勝難具論初從崖口入地底始見殿閣  
開重門乃知茲洞最殊絕洞中金碧開祇園寬平可容萬人坐仰  
視有若覆盎益虛明最宜朝日照陰晦常有黑雲屯盤蚪天矯垂  
乳下巨獸突兀巨石踞木香一株在巖壁人跡峭絕不可捫靈仙  
飛游亭此供常駕颿馭乘雲軒我來正逢春雨霽氛翳開廓陽景  
溫呀然雙穴露天半籠絡萬象將并吞只疑七竅混沌在五竅忘  
失兩竅存神奇遺跡未泯滅至今猶有斧鑿痕雲牀石屏極隈隩  
昔有居士常潛蟠避秦不出傲徵召美名遂入賢水源咸通曾爲

二蛇窟元暢演法蛇輒遷從茲其中建佛刹棲隱不復聞世喧惜  
哉此景久埋沒但與赤子安枯禪次山予厚愛山水探索幽隱窮  
晨昏朝陽迺迨若就狴石角禿鬣如遭髡豪篇矜誇過其實稱譽  
珉石爲瓊璠環觀珍寶欲奄有不到勝處天所慳嗟予至此賦未  
覩不暇稱讚徒驚歎恨無雄文壓奇怪好事略與二子班蕪詞願  
勒巖上石勿使歲久字滅漫以上零陵志

清光亭

鄭圃僕射陂漢陽郎官湖郎官何爲名張謂佩使符泛觴江城南  
乃與太白俱明月一萬頃清光天下無

萍鄉卽事

地接長沙近鄉名自古聞毛山千嶂雪玉女一堆雲拱木扶霄上  
飛泉觸石分霜風萍實老目斷楚江濱以上湖廣通志

重湖閣

宮亭彭蠡接揚瀾浩蕩橫空六月寒試問風波何似險老僧只管

倚闌干廬山志

水西示劉尉

役役塵埃倦客情偶逢佳節得閒行憑君為把如椽筆便向蒼崖

記姓名甯國府志

題到氏田舍

六朝冠蓋俱塵土到氏今無苗裔存當時任昉過田舍野老猶記

查林村宜興縣志

南雄昌樂驛

城東瀆水碧淵洄楊僕樓船向此來我亦編蓬今下瀨擬尋韶石

上崔嵬

續武溪深

滔滔武溪一何深鳥飛不渡獸不能臨嗟哉武溪何毒淫以上馬援辭以

下余所續飛湍瀑流瀉雲岑砰激百兩雷車音吾聞神漢之初始開斷

史君姓周其名煜至今廟在樂昌西苔蘚殘碑僅堪讀武水之源

自何出郴州武縣鷓鴣石南入桂陽三百里峻瀨洪濤互深射其

誰寫此入新聲一曲馬援門人笛南方耆舊傳此水樂昌之瀧茲

乃是退之昔日泛潮陽曾到龍頭問瀧吏我今以選來番禺事與

昌黎殊不類未嘗神色輒驚慌何至形容遽憔悴但憐歲晚毛鬢

侵故園一別至於今溪光菴畫清且淺朱藤覆水成春陰何為在

此嬰朝簪翩然走馬馳馭馭南踰瘴嶺窮崎崙梅花初開雪成林

韶石彷彿聞舜琴曹源一滴清人心遠民安堵年穀稔百蠻航海

來獻琛嗟余才薄力不任報君夙夜輸誠忱布宣條教勤官箴有

佳山水亦出尋樂平吾樂何有極不信絃歌武溪深

望韶石

當日昌黎□□□曾瞻□□□冠履致君□舜今□是想像□□

□□□以上粵東金石略

石門山

呂嘉妄欲抗中原積石江心尚巋然豈料王師到尋陘挫鋒困粟

遂無前

樓船伏波安在哉會兵曾破石門來昔年已過獲嘉縣今日更登朝漢臺

峽山

昨從滇陽來暮過峽山寺適聞新昌寇道路傳者沸余時不敢留一葦翻然逝雖經絕妙境已負清幽意捲簾坐船舫極目望蒼翠有如逢珍寶不暇貯篋笥又如過屠門大嚼涎垂喙每欲問其詳曾莫得圖志道人山中來為我譚一二犀去金鎖沈猿歸玉環墜趙胡垂釣石巋然出江際穆王雙車轍想像常按轡漢晉五仙人曾騎五羊至俊靄二禪師神力與迎馭岩堯五岳塔初自崑崙施三祖石堪奇僧祭嘗所憩上方獅子臺下視見雲氣異花成帳幄紅紫嫣然媚蒙茸綠崖草莖葉相覆被或黃如金釵或白如珠珥造化窮天巧肖像名殊異梁間許渾詩壁上李翱記但知攷事蹟何暇評文字清遠古中宿俯壓南海溼退之貶潮陽亦曾經此地

幢碎逢颶風雷電助其勢我來幸無恙恬然不憂畏祥飈送輕帆默已荷神賜此歸會有日維舟就津次當為小盤桓歷覽賞夙志浮邱山

此山從古號浮邱攜手城西是舊游法從未容穿豹尾守藩聊得步鼇頭傍連玳瑁遺亭近下有珊瑚廢井畱得道丈人如可遇秋

風挹袖上瀛洲以上廣東通志

過蕪湖

除地誅茅懸左偏三山一碧正當前舍人為寫湖陰曲禪伯請題城上篇帳下勁兵纏象魏樞中飛騎控巴滇至今庭竹根延蔓尚想當時七寶鞭

遊狼山

一綫橫大江千螺簇層巒空外飛鳥沒煙中片帆還

鸚鵡洲

落日漢陽孤閣對秋風鄂渚渚數舟橫偶吟萬里飄流句獨倚滄洲

憶禰生  
朝漢臺

不終強屈蠻夷上稍復低回禮義中自若一時成霸業至今千載

仰英風

菖蒲澗

撥破紅塵入紫煙五羊壇上訪神仙人間自覺無閒地城裏誰知

有洞天

泊武昌

圓壇展祀日樊山開宴時釣台高嶼嶼離殿鬱參差以上輿地紀勝

休休亭

勢利煎人漫白頭休休去是良謀應須買取堪騎鶴跨入芝田

閬苑游山西通志

題慧山寺

釋子幽居遠俗紛停橈登覽日將曛湖光已歎千年變山勢猶驚

九隴分迸溜冷噴雙沼雪煮茶香透一杯雲偶因流落尋佳致何

意聲名世外聞

遊慧山

還家豈不樂生事未應間朝日已復去征鞍方更攀傷心百道水

閱目萬重山何以忘羈旅脩脩醉夢間毗陵志

萍鄉

人家白雪中鳥道青雲裏耕斲競畝田魚樵喧會市秀出羅霄山

倒流楊岐水三真不可尋寥寥忽千祀更想用兵時徘徊甘卓壘

志萍鄉

愛山堂詩

我愛通羊好民居山作城眼前無俗事枕畔有灘聲

我愛通羊好環回雲水間重巒與疊嶂真是翠屏山

我愛通羊好清無半點塵峭山多洞戶樵牧識仙人

我愛通羊好青山便是城白雲深處宿一枕玉泉聲

我愛通羊好煙霞冰玉間不須乘羽駕飛入翠屏山

我愛通羊好深山不染塵數家原上住疑是避秦人

我愛通羊好樓高入錦城青山常在眼瀾水不聞聲

我愛通羊好雙泉咫尺間不須尋謝屐步入九宮山

我愛通羊好宗英迥出塵文章與政事今復見何人通山縣志

會山

我愛蓬萊編復此會羣仙仙人笑拍手索我瑤華篇通山縣志

大泉洞

涓涓石含泉扁舟過其下大旱日望爾神功一飛灑同上

失題

三十六湖水所瀦其間尤大為五湖中間可以置郵成隱然高阜

如覆孟大開名園治亭榭時燕朱履為歡娛燕時高臺雄跨一千

尺熙熙樂國遊華胥華胥堂軒峻疊青壁滑老蚌放開明月珠珠明

亭 蒼龍脫角瑩且澤鮮瓜自與風雷俱郊家女子已仙去尚有故

井存通衢井玉女凌波羅襪塵欲起冉冉玉水翻紅藻玉水搖輝蘸

影弄姿媚粉黛醉倒無人扶搖輝牡丹芍藥開四達四秀品第未

必揚州殊武陵迷春無處問迷春杳杳仙路來盤紆流杯插花歡

客飲樂聖霏霜濺雪來坐欄序賢祈爵發鳴鏑序賢傳花疊語爭

喧呼主人能詩有仙格錦囊麗藻紛披敷擬驅輕駕逐煙客煙客

曠浪塵外天為徒塵外夢得池塘生春草一句我知今古無西歸

定躡瀛嶠頂氣象早已居蓬壺甘棠留愛在他日好事傳作淮南

圖夢草亭輿

九峰寺地紀勝

沿澗扳崖入翠霞寺僧猶寄舊鍾家芙蓉秀出天河外我欲名為

小九華

九子芙蓉畔傳燈彼一時誰無男女相試問末山尼

雲末峰 遙睇青冥絕險生山翁相指亂雲橫不知身世在何許但覺滿懷

風露清

飛雲峰

翠巘龍葱瑞色分嵐光遙映縷絲芬無心謾作奇峰勢何礙金鳥

出海門

香爐峰

天風飄飄浮紫煙誰把雪山香草然氣息不教落人世直上紫皇

青案前

翠霞峰

輓金頰玉翠流輝天嬪新開雲錦機西望赤城標起處宦情欲逐

野雲飛

蒼玉峰

翠滴溪橋水沍澄更深斜月映寒星巉巖何代點頭石臥聽高人

夜讀經

芙蓉峰

擎天一柱萬山低九朵奇葩秀一枝多少好山僧占住空王曾會

範圍基

流清峰

飛泉練白地無塵欵起千波湛寂身靜挾飛仙忘世慮卻嗤塵世

夢中人

峨眉峰

翠黛輕拖促曉妝雲歸鬢岫鬢蒼蒼道人欲識普賢面西蜀重燒

十願香

天竺峰

藜杖芒鞋興不窮萬山螺簇碧龍蔥青天一餉開圖畫激灑收歸

慘淡中

生雲石

藤陰稜石煜金科磊砢常將風雨磨剛被閒雲生罅隙禪僧迷失

舊盤陀

以上上高縣志

燕窩石

墨窩化石鎖煙苔岩上茅空煙又開塵劫一聲清磬裏至今猶有

燕飛來

德化縣志

萬年妙蓮閣

佛隴遺芳鮮麗蹤王張三觀揭禪叢圓明珠繫衣襦裏淨妙蓮生

涇淤中再現石橋真法界重興銀地舊家風未應賦述誇孫綽序

倡稱揚復有公天台續集

松石峰

晚向津亭泊畫船忽聞佳處在雲煙松根化作千年石山寺蒸為

一澗泉祖意供看亭下柏禪交同結社中蓮明朝輿笻還躋嶺聊

借僧房一覺眠福州府志

望海歌

我來靈峰滄海夜起坐望海亭沈沈水面正陰黑六龍銜日

未平更陽谷光氣發五色變怪不可名洪濤洶湧鼎沸蛟

蜃伏匿魚龍驚金鴉騰暑若木末煙消霧散下明狂風喧厖

巨浪猶似百面雷鼓鳴崩騰蕩沃五岳鱗鬣磨碎鯨與鵬嘈

忽駭陵谷變雪山千仞際橫飄飄番船隨上下出沒僅若水

萍忽然風霽籟息金斗熨帖一練千碧波湛湛千萬頃參錯島

嶼杯罌之江五湖亦甚大視此乃類蹄中泓琉球佛齊日本國

隱隱微見煙林青三山歷歷亦可數突兀下有頭撐惜哉秦王

不到此勞心徒欲求長生我雖流落海上獨此寄寓亦可矜行

當結茅鍊金液以待九轉丹成仙飛羽化會有日直跨三島梯

青冥他年故人或相問請來訪我於蓬瀛福州府志

漱玉泉

斷崖天削成半腰為坳窠殿閣在其中乃是釋子家初疑無路通

去必凌紫霞屈曲轉山足雲蘿可攀拏忽然至其上金碧藏谿

卻見岩下路目睛眩生花僧有定慧者來自蜀道賒五代方亂離

相此山水佳卜居不復出焚香擁袈裟嗟余但企仰涉世空喧譁

安得寄遁此可以忘幽遐邵武府志

澹山巖題名

澹山巖零陵之絕境蓋非朝陽之比也次山往來湘中為最熟子厚居永十年為最久二人者之於山水未有聞而不觀觀而不記者而茲巖獨無傳焉何也豈當時隱而未發耶不然使二人者見之顧肯夸其尋常而遺其卓犖者哉物之顯晦固有時何可知也

蔣穎叔題

碧落洞題名

寶文閣待制蔣之奇罷帥廣州移領六口制口發運使攜家來游真陽碧落洞遂宿奉先寺元祐四年五月廿二日

寒亭暖谷銘并序

永泰中元次山為道州刺史嘗巡行江華登縣南亭愛其水石之勝當暑而寒遂命之曰寒亭而為之記刻石在焉治平四年十月余陪公儀至其上見傍有煖谷者方盛寒入之而其氣溫然挾纈

熾炭不若也余甚愛之問其所以名之者縣宰吾族叔祖是可銘也乃為銘曰維時有寒寒不在夏夏而寒者茲亭之下維氣有暖暖不在冬冬而暖者茲谷之中物理之常不以為異維其反之是以為貴茲亭並谷寒暑相配寒暑于秋陰陽反異名自天得待人而彰我勒此銘萬古不忘拓本

奇獸巖銘并序

奇獸巖在江華僅二里蔣之奇穎叔愛之而為之銘曰奇獸名巖巖懷怪異元公遊此潛而未至我陪公儀遊息於此斯巖幽著自我而始勒銘在壁將告來世治平丁未同沈公儀遊拓本 按原文誤

錄端平丙申張敬續銘

武溪深詩跋

李君以神漢桂陽太守周府君功勳紀銘為示碑尾云太和九年五月重修歐陽永叔集古目錄跋云此君檢漢書無之今碑石缺亡其名惜乎遂不見於世也南人紀其所修瀧水即韓文公所謂

樂昌瀧是也至今以為利祠宇甚嚴云余讀韶州圖經云周史君廟在樂昌縣西北一百十八里武漢上舊經云後漢桂陽太守周君光開新瀧故立廟武溪驚湍激石流數百里昔馬援南征其門人爰寄生善吹笛援作歌以和之名曰武溪深其辭曰滔滔武溪一何深鳥飛不渡獸不能臨嗟哉武溪何毒淫周史君開此溪下合真水碑在廟中郭蒼文但云府君字君光而已其名訛缺不可辨圖經說周史君亦不著其名李君嘗往詣碑辨之乃是煜字永叔但得墨本故莫能考也余讀退之瀧吏詩云南行踰六旬始下昌樂瀧獨疑樂昌昌樂之名不同遂移書以問李君答曰樂昌縣五里有樂石尤高大當是樂昌以縣名昌樂以山名瀧在今縣上五里今乃釋然無疑矣因感馬援之意續而成之為武溪深一章云元祐二年十一月卅日番禺府中書廣東金石略

碧虛巖銘

瀟水之陽九疑之口清池涵鏡亂峰插口廟臨溪口寺在山口誰

其愛之義與穎叔

缺之奇奉

缺

因口口登九疑

缺

為口口無為

洞口口石室遂口口福寺憩口茲口勒銘口口治平甲午

湖南

金石志

湖南

寒巖銘

寒巖水石怪特殊異下臨銀江上接雲際公儀穎叔志樂巖谷詣而得之賞愛不足為近寒亭寒岳是名何以表之穎叔作銘治平丁未十月陪沈紳公儀遊蔣之奇穎叔作湖南金石志

附傳

蔣堂字希魯常州宜興人擢進士第爲楚州團練推官滿歲吏部引對眞宗覽所試判善之特授大理寺丞知臨川縣縣富人李甲多爲不法前令莫能制堂戒諭不悛白州以兵索其家得僭乘輿物置於死慝通判眉許吉楚州以太常博士知泗州召爲監察御史禁中火有司請究所起多引宮人屬吏堂言火起無迹安知非天意也陛下宜修德應變有司乃欲歸咎宮人以之屬吏何求不可而遂賜之死是重天譴也詔原之論奏郭皇后不當廢坐贖再遷侍御史判三司度支句院出爲江南東路轉運使徙淮南兼江淮發運事特廢發運使上封者屢以爲非便堂言唐裴耀卿劉晏第五琦李巽裴休皆嘗爲江淮河南轉運使不聞別置使名國朝卞袞王嗣宗劉師道亦止爲轉運兼領發運司事而歲輸京師常足時雖用其議後卒復在江淮歲薦部吏二百人或謂曰一有謬舉且得罪何以多爲堂曰十得二三亦足報國坐失按蘄州王蒙

正故入部吏死罪降知越州州之鑑湖馬臻所爲溉田八千頃食  
利者萬家前守建言聽民自占多爲豪右所侵堂奏復之徙蘇州  
入判刑部徙戶部句院歷戶部度支鹽鐵副使安撫梓夔路擢天  
章閣待制江淮制置發運使先是發運使上計進大舟數十載江  
湖物入遺京師權貴堂曰吾豈爲此歲入自可附驛奏也前後五  
年未嘗一至京師就除河東路都轉運使未行知洪州改應天府  
累遷左司郎中知杭州以樞密直學士知益州慶曆初詔天下建  
學漢文翁石室在孔子廟中堂因廣其舍爲學宮選屬官以教諸  
生士人翕然稱之楊日巖在蜀有能名堂素不樂之於是節遊宴  
減廚傳專尚寬縱頗變日巖之政又建銅壺閣其制宏敞而材不  
預具功旣平乃伐喬木於蜀先主惠陵江濱祠又毀后土及劉禪  
祠蜀人浸不說獄訟滋久之或以爲私官妓徙河中府又徙杭  
州蘇州以尚書禮部侍郎致仕卒特贈吏部侍郎堂爲人清修純  
飭遇事毅然不屈貧而樂施好學工文辭延舉晚進至老不倦尤

嗜作詩有吳門集二十卷

宋故朝散大夫尚書禮部侍郎致仕上柱國樂安縣開國侯食邑  
一千三百戶賜紫金魚袋贈吏部侍郎蔣公神道碑

胡宿

宋有大雅全德之老尚書禮部侍郎致仕蔣公以皇祐六年三月  
辛酉考終于吳郡靈芝坊私第以至和元年九月乙酉葬于吳縣  
堯峰之魯塢門人邵必志其壙議者謂公朝廷偉人東南首望宜  
有石刻以表神道旣葬十年宿得以申尋遺烈章示于後公諱堂  
字希魯常州宜興人弋陽本系出于周公義興至唐蔚爲盛閥累  
世絨冕訖于五代本朝未有達者先大夫賢常有中興門構之志  
聚書延客以教諸子公在伯仲間穎特秀整不勉而學益進旣冠  
而業大成西游京師遍交英俊卓然文行見稱諸公名聲飛翔迅  
于六翮祥符五年登進士甲科授楚州團練推官嘗權州事閱器  
仗牙門軍校不待白己輒啟庫鑰公械而治其罪郡中肅然丁先

大夫憂服除吏部試甲乙判文在優等陛見日章聖命取所試判  
視之嘉賞焉改大理寺丞知撫州臨川縣縣有大姓李甲積爲民  
害乃復僭擬亡制動作不法前宰無敢撻其罪公至緣事捕治之  
盡得其姦狀卒坐棄市害根鋤去闔境慰說歷眉吉楚三通判改  
太常博士知泗州惟眉差小而三郡類劇沛然神用治罔弗舉召  
爲監察御史時樞密使張耆章聖藩邸舊臣嘗有德于獻后后方  
臨朝耆數移疾弗治務公以其慢朝虧職宜加顯黜疏比上不省  
及仁宗復辟同僚語公盍辯前疏答曰彼已失勢言之傷薄吾弗  
爲也未幾同僚躡公前跡而言疏入之明日仁宗見稱敢言擢居  
近侍執政知公抗疏在前他日見之有慰安之語公曰言責本職  
豈規賞耶禁中火有司欲文致其事委罪宮人公上言火災天意  
也陛下恐懼修省猶恐未至如聞吏議欲以宮人爲解女子一問  
卽承然天可誣乎上悟遽命原之日官上言內酒坊直國家福德  
所在宜徙置他所宦者喜興作希土木之賞隨而贊然事下公府

公逆奏曰內酒坊枕大內西北隅四世矣祖宗以來少福德耶無  
名改作所宜慎重事遂寢歲餘遍歷三院判三司度支句院賜緋  
衣銀魚時三司使范諷高虛廢務公以爲憂頃之以侍御史出爲  
江南東路轉運使辭日面陳諷放逸不事事大隳厥職仁宗頷之  
未幾諷罷至江東數月會朝廷廢江淮發運使均歲漕錢帛之數  
取辦六路以公爲淮南轉運使兼發運使更張甫至綱目未立凡  
百經制出于心術歲終奏計六百萬璽書褒美焉未幾就除尚書  
吏部員外郎復以勞賜金紫坐部吏犯法按舉失實移知越州漢  
太守馬臻所治鑑湖在焉無慮溉田八千頃至是越人奪湖水以  
名己田故水日涸湖田日廣貧民失水利豪姓擅地產公條奏利  
病詔復爲湖俗信姦巫奉淫鬼境內所祀非舊典者皆翦治之取  
其像棄湖中材瓦悉送官眾初駭以爲蔑神公乃尊禹祀新馬侯  
故祠歲時齋薦之民靡然而趨正享知淫祀之無福焉徙知蘇州  
代還判尚書刑部三司戶部句院歷戶部度支鹽鐵三司副使乘

西師之後關中困乏及夏人送款疆事略定公建白一切蠲去橫賦以紓其民東川饑受詔爲梓州路安撫使勞徠安定全活甚多還朝除戶部郎中天章閣待制充江淮發運使承前居是職者每歲上計必取大編載奇物輸權門以售進公再任前後五年未嘗一至都輦章奏皆附驛而上除河東轉運使未行徙知洪州又改應天府兼南京留守司歲餘遷左司郎中知杭州會高選名臣以殿右蜀遷樞密直學士知益州蜀人偷浮不識敦本前守如乖崖承寇亂甫平一切權宜務安遠俗後之來者以爲治蜀適然耳而又增益侈費十倍于前公曩官于眉習知敝俗常曰國家承平百年聲教萬國蜀士學尚不減鄒魯惟此習俗尚安餘風二千石恬而不怪豈承流宣化意耶乃興學校省廚傳凡過秦無名之費姑息不正之事多所裁革未始顧慮者舊有識者竊喜公所爲咸言庶幾數年吾俗且變貪吏醜正惡不利己復有肺腑舊族逋責列肆累政不敢治公裁之以法遂人訴近習且造險語飛聞于上謂

公變亂舊制蜀土且搖遽移公知河中府迄今蜀人歌思之不已公至蒲嘗感危疾表求便郡再知杭州遷左諫議大夫復徙知蘇州明堂泛恩改給事中公治杭與蘇俱有遺愛及重臨二州幼艾相攜迎拜道路吳人于虎邱生爲立祠明年表還官政朝廷崇禮耆碩閱煩事物以小宗伯秩聽行其志力是時年耆者類不卽退公在杭州日業已治第吳下旣而得請角巾休舍摺紳高其識平生愛客應接不倦亦旣告老精力尚強佳賓至前清談不廢所居溪館有芝草產焉一孫少孤二子皆幼至是參侍左右咸以爲陰德之報感疾旣革遺言誨以力學口占後事命弟之子之奇疏于牘背已與親友訣神色不亂含玉之日壽七十五吳中士大夫若吏與民莫不相與流涕朝廷公卿表其德範宜加旌賁天子惻然命以優恤特贈尚書吏部侍郎未三品非例也公學問道本原論議依名節其行己也直其從物也裕人之有善不啻己出孜孜獎進須成就乃己所至以拔才薦士爲己任或譏以太廣勉之少峻

公以峻則遺物卒不易其守歷典會府者七所至之治必先美風俗扶名教不專于簿書聽斷而已治蜀日常召高才碩生會試府寺親校才等勸成學者于府學之側別建西學以廣諸生齋室訖成而公移蒲中其後轉使毀之以增廨舍既而常山宋公尚書至府聞其事歎惜久之且欲成公意乃即其舊址建文翁祠祠之內圖嚴君平鄭子真司馬相如揚子雲蜀土先賢凡九及公之像而十常山公爲之贊至公略云蔣侯挺挺天與嚴方健而文明不逢不將迹其風德從可知耳公有高情富清藻多所綴述尤邃于詩其間所得往往清絕善作尺牘思致簡詣時人得之藏爲名筆及退居林下神機日旺雖飲食寢處未嘗忘詩亦天性然有文集二十卷初義興家墅濱南湖之石蔣氏太宗之碑在焉公之曾王父諱幼蟾大王父諱宏謹皆隱德弗官王父諱九皋以公貴贈尚書刑部侍郎妣史氏追封廣陵郡尚氏宣城郡二俱太君公出史氏娶錢氏封壽昌縣君先庚辰十二年而亡後舉以合葬焉子三人

長羣玉早卒次長生次長源皆爲大理評事女四人長適刑部郎中知制誥邵必次適都官員外郎王景芬次早卒次適處州青田縣尉宋寬孫續任大理寺丞通判利州公初捐館遺恩以續簽書平江軍節度判官廳公事自言少孤育于祖乞服衰屨以報朝議以公有子不許遂辭疾謁醫去職行服雖不如禮識者重焉吁哉道之難行以公吏師治蜀美績弗究不登三事其命也夫宿早依門牆稔聞閥閱茲用傳信直無愧辭庶使三吳吏民過堯峰者爲賢公墮淚云銘曰公之志潛于斯民平昔蘊蓄曾弗大伸公之才足經當世華皓卷藏未能殫試刀州之學有像是圖君平子雲盛德不孤虎邱之趾有祠特起太白季札高風孔邇嗟嗟尺璧長掩山阿神明潛翳惘若之何震澤東漸靈巖西峙公雖可亡德音不已

蔣之奇字穎叔常州宜興人以伯父樞密直學士堂蔭得官擢進士第中春秋三傳科至太常博士又舉賢良方正試六論中選及

對策失書問目報罷英宗覽而善之擢監察御史神宗立轉殿中侍御史上謹始五事一曰進忠賢二曰退姦邪三曰納諫諍四曰遠近習五曰閉女謁神宗顧之曰斜封墨敕必無有至於近習之戒孟子所謂觀遠臣以其所主者也之奇對曰陛下之言及此天下何憂不治初之奇爲歐陽修所厚制科既黜乃詣修盛言濮議之善以得御史復懼不爲歟所容因修妻弟辭良孺得罪怨修誣修及婦吳氏事遂劾修神宗批付中書問狀無實貶監道州酒稅仍榜朝堂至州上表哀謝神宗憐其有母改監宣州酒稅新法行爲福建轉運判官時諸道免役推行失平之奇約就庸費隨筭錢高下均取之民以爲便遷淮東轉運副使歲惡民流之奇募使修水利以食流者如揚之天長三十六陂宿之臨渙橫斜三溝尤其大也用工至百萬溉田九千頃活民八萬四千歷江西河北陝西副使之奇在陝西經賦入以給用度公私用足比其去庫緡八十餘萬邊粟皆支二年移淮南擢江淮荆浙發運副使元豐六年漕



粟至京比常歲溢六百二十萬石錫服三品請鑿龜山左肘至洪澤爲新河以避淮險自是無覆溺之患詔增二秩加直龍圖閣升發運使凡六年其所經度皆爲一司故事元祐初進天章閣待制知潭州御史韓川孫升諫官朱光庭皆言之奇小人不足當斯選改集賢殿修撰知廣州妖人岑深善幻聚黨二千人謀取新興略番禺包據嶺表羣不逞借之爲虐其勢張甚之奇遣鈐轄楊從先致討生擒之加寶文閣待制南海饒寶貨爲吏者多貪聲之奇取前世牧守有清節者吳隱之宋璟盧奐李勉等繪其象建十賢堂以祀冀變其習徙河北都轉運使知瀛州遼使耶律廸道死所過郡守皆再拜致祭之奇曰天子方伯奈何爲之屈膝耶奠而不拜入爲戶部侍郎未幾復出知熙州夏人論和請畫封境之奇揣其非誠心務守備謹斥候常若敵至終之奇去夏人不敢犯塞紹聖中召爲中書舍人改知開封府進龍圖閣直學士拜翰林學士兼侍讀元符末鄒浩以言事得罪之奇折簡別之責守汝州閱月徙

慶州徽宗立復爲翰林學士拜同知樞密院明年知院事浣州蠻擾邊之奇請遣將討之以其地爲徽靖二州崇寧元年除觀文殿學士知杭州以棄河湟事奪職由正議大夫降中大夫以疾告歸提舉靈仙觀三年卒年七十四後錄其嘗陳紹述之言盡復官職之奇爲部使者十二任六典會府以治辨稱且孜孜以人物爲己任在闕薦處士陳烈在淮南薦孝子徐積每行部至必造之特以畔歐陽修之故爲清議所薄子堦至侍從曾孫芾別有傳

蔣希魯家有楊文公與王魏公一帖用半幅紙有折痕其略云昨夜進士蔣堂攜所作文來極可喜不敢不布聞子瞻日夜得一士旦以告人察其情若喜而不寐者世言文公爲魏公客公經國大謀人所不知者獨文公得與觀此帖不特見文公好賢下士之急且得一士必亟告之其補於公者亦多矣

徐都官山亭在胥門外都官名祐郡守蔣希魯公爲作七石詩時杜祁公亦有詩其卒章云上列希魯詩英詞何縹緲此出之

奇語之奇者卽希魯公姪也



楚黃陶子麟承刻

右春卿遺稿一卷原補一卷宋蔣堂撰堂字希魯宜興人官至禮部侍郎事蹟具宋史本傳傳稱其有吳明集二十卷而晁陳兩目均未著錄是集在宋時已佚今傳本乃明天啟元年堂二十世孫鑽掇拾佚藁而成凡賦一篇詩二十九篇記一篇不及原書十分之一提要謂北宋遺集流傳日少存之以備一家今彙刻桑梓名家更何敢因其一鱗片甲遂爾棄置因為校刊復收吳郡志會稽掇英總集成都文類西湖高僧傳略得十三首以益之吳郡志有題吳殿丞應之新葺紅梅閣吳有姬名紅閣詩有云深鎖煙光在樓閣旋移春色入門牆之句惜佚其全首原附希魯姪之奇詩一篇文二篇今輯得詩六十三篇文七篇并錄之奇兄之翰詩一篇以識蔣氏一家之學原書附本傳今并采之奇傳附焉光緒乙未正月武進盛宣懷跋

